

海
之
樓
詩

王
之
白



下 册

海藏樓詩卷第八

續雜詩 以下壬子

天意有所革欲治必先亂黔首冥無知驅之遂爲幻賢
達獨違天堅貞終不畔譬諸風雨晦雞鳴甯失旦狂愚
方得時明哲當自竄深居味此理長歌白石爛其四十三
避世不見人長望天與日天日彼何知我意若有失人
生似朝露用意徒鬱勃萬形來入眼閉目已自滅忘形
未忘意耿耿成內熱其四十四

答陳伯嚴同登海藏樓之作

恐是人間乾淨土偶留二老對斜陽違天長叔天將厭
棄世君平世亦忘自信宿心難變易少卑高論莫張皇
危樓輕命能同倚北望相看便斷腸唐人詩云此樓堪北望輕命倚危欄

MAY 15 2001

答沈子培

老向窮途道更窮
膝痕穿榻稿書叢
堂堂白日人誰在
杳杳高樓世豈通
守死自甘等丘貉
逃虛未暇託冥鴻
行逢宿草何妨哭
留閱興亡祇兩翁

五十三歲生日放言

斯人非吾徒
閉戶聊示絕
紛紛穉且狂
爲禍乃爾烈
宗周何赫赫
竟爲褒姒威
鸛獺實毆之
魚雀彼何別
老夫生不辰
坐視國被竊
願爲伍胥眼
更向城門抉
苟生誠可弔
囊底智未竭
萬一落吾手
猶得日月揭
惟道援天下
就之有不屑
放言自傾聽
又用自怡悅

孝欽爲革命黨魁其餘皆

亂臣賊子耳

張讓三聞余不出枉視相唁且求作詩

宴居何所念一坐歷千劫半年不出戶世變方岌岌初不知有漢魏晉亡愈急小園花事過迸筍又戢戢綠深春已晚惆悵風雨集客來或見唁不語久於邑張君素相重文字積慧業染鬚事後生愠色在眉睫彥回故名士垂老乃被脅我曹宜深戒晚節且孤立

趙堯生侍御屬題萬松深處卷子

入山恨不深入林恨不密苟非違人者此事殆難必去年在京師恣意尋松栢一訪慈仁寺數過法源剎當時有所詠出語極哀裂知音或先覺果爾國不活吾曹當餓死避世未爲潔流離携短卷俯仰媿明哲雲間松層層屋頂山鬻鬻世外多此境不去定何說君今曷自題遣意向幽絕夢中聞松濤灑然解煩熱

時堯生病
瘳新愈

題沈文肅書扇

不帶湘淮惡習來眼中此老最崔嵬道因碑外儒酸氣
君實何妨喚秀才

金鞏伯求題端午橋詩後

京官稱端四節府推甸齋收藏甲天下文采騰當時死
忠誠得所聲價孰與齊平生辱見知泣下視此題

題林學衡詩本

少年縱筆美才人老去枯腸稍逼真喜子能詩通性命
何妨取徑近艱辛

文字似非標榜事可教塵土汗毫端靜中別有精微在
莫作狂花客慧看

四月十八夜示中照

少年南北行萬里銷盡雄心最可悲今日滄桑千萬恨
高樓淙雨夜談時

兒曹催我老何辭世事磨人命可疑各有家山歸不得
祇應同穴是歸期

答樊雲門冬雨劇談之作

久於南皮坐習聞樊山名老矣始一見趙璧真連城落
筆必典贍中年越崢嶸才人無不可皎若日月明春華
終不謝一洗窮愁聲南皮夙自負通顯足勝情達官兼
名士此祕誰敢輕晚節殊可哀祈死如孤惲其詩始抑
鬱反似優生平吾疑卒不釋敢請樊山評

嘗序伯嚴詩持論闢清切自嫌誤後生流浪或失實君
詩妙易解經史氣四溢詩中見其人風趣乃雋絕淺語

莫非深天壤在毫末何須填難字苦作酸生活會心可忘言即此意已達

窮愁良易工憂患甯愛好奮飛挾世網結習猶煩惱午怡論詩骨見謂飢不飽心知小潺湲河海愧浩渺何期樊山老閨荔喻益巧荔甘而詩澀唐突天下姣庶幾比諫果回味得稍稍嗜澀轉棄甘攢眉應絕倒

詩云世人無此骨餐之不療飢

胡鐵華求題大山松所畫卷

閉目念家山開眼顧已失誰言畫非真猶勝夢一瞥蜀山插天外蜀士滯天末披圖忽驚叫還我舊巖穴林屋摹大癡得意留此筆一朝君獲之松所見突兀居然得八九注視神爲奪重煩趙叟詩

堯生

說盡鄉愁切中原

正喪亂骨肉殊存歿莫歌蜀道難歸思恐難遏

五月十三夜同中照望月

君言對月宜臨水無水真成負此樓
鷗榭豪堂無覓處還如落月在心頭

題吳劍泉寄愁小草

少年自喜良堪笑老閱滄桑却自哀
鬱鬱一生懷未展滔滔舉世意全灰
偶尋斷夢閑情在試檢殘編舊恨來
莫信寄愁有天上人間何術遣愁回

書女景扇

刺天汝亦厭羣飛賃廡春申即是歸
焉用關心看朝報娛人正有乳嬰肥

六月十五夜月下

風穿月透海藏樓坐近蟲聲已似秋流水關龍潮乍過
停雲顧兔雨旋收微行士女應忘反縞夜園林信壯遊
可惜舊情衰謝了只堪偃卧看牽牛

沈子培屬題山居圖

賢者當辟世其次乃辟地故山雖見招居之殊不易看
君展此圖中有經天淚終年不下榻神往屬天際別來
值翻覆未死幸相視當時謂必爾果爾豈足異吾儕即
山鬼能知一歲事相携山之阿風雨娛晝晦

弔日本大將乃木希典詩

壬子秋八月日本葬其天皇大將伯爵乃木希
典夫婦皆自殺列國驚歎日俄之戰乃木以第
三軍攻克旅順名震一世其二子皆戰死素喜

爲詩或傳其軍中之作云征馬不前人不語金
州城外立斜陽又云愧我無顏見父老凱歌能
得幾人還甚有唐人格法遠神篤意入人肝脾
也

性情挾禮義勃然在一發百世猶興起壯哉此賢匹君
臣與夫婦同盡意何決似含厭世旨棄濁自成潔知君
百戰餘視死遠勝活功名出至哀垂老鬱勁烈苟非斷
脰舉殊負一腔血平生信詩書助汝舍生熱中原今何
世誰復識名節綱常既淪喪廉恥遂漸滅聞風獨酸鼻
感動爲悽絕低回誦遺篇夢魂逐豪傑

嵇叔夜

事見靈鬼記

人間久矣知音絕燈下誰來聽履霜滅火罷琴真解事

不須魑魅更爭光

題顧升瘞琴銘及其妻莊宣書多心經經後跋
云顯慶三年八月一日莊宣爲夫資福書跋後
又有二行云檢遺篋感深意福無靈人先棄勒
貞珉還資施升記

原文民作已闕末筆

遺詞掩抑瘞琴銘下筆沉吟資福經畢竟乞靈文字好
生天成佛總無靈

九日與鑑泉介庵同遊徐園

空將目力送歸鴻意氣頽然一禿翁
辟世猶能作重九
汙人終自厭西風
無山易敗登高興
得酒聊忘失路窮
霜刃名園堪徙倚
未妨同戀夕陽紅

題吳鑑泉鑑園圖

有序

金陵城中以東北隅爲最勝當大中復成二橋之西岸望鍾阜夭矯東翔而北顧若將止若欲起青溪至此流清而波闊倒影入焉凡東水關之船其在水關如不足回旋者上泝至吳園之前則放棹容與若鳥之出林若魚之縱壑也金陵人謂鑑園曰吳園光緒中葉以來吳園擅金陵之勝者且二十年其始予與鑑隱散步於水際見鍾山而異之相顧私語得此以構園林當極佳耶然皆病於無力鑑隱久居金陵遂買其旁得隙地僅尋丈稍稍拓闢以自廣累年乃成數畝屬於岸側於是種柳植竹雜蒔花樹編籬以圍之又彌年望之鬱然矣爲軒爲廊爲池爲

隄爲臺爲樓南皮張公孝達題其堂曰賞寂賦
詩稱之鑑園之名由此盛傳於白下鑑隱雖以
官爲家然其爲人哀樂過人跌宕自喜嘯傲於
園中者十餘年其心輕一官而重斯園不啻一
毛之於百鈞也噫人之情乎形資之神必樂之
身息之心必歸之平生釣游之所雖尋常巷陌
田里恒有惘惘不去於懷者矧以天下名勝又
爲吾所手創而心營之者乎一園區區而不能
忘則故君故國之思以視斯園不又將什伯倍
蓰而不能自己者乎辛亥亂作鑑隱與余俱辟
地於海上出圖卷屬余記之其意有未盡者以
陳於詩時則壬子九月六日

金陵往來二十年夢落復成橋水邊疎林叢竹隔水看
蔣山如屏當我前此園未成先造意翦取溪水收雲烟
縛茅編籬極慘淡口不能道心謂然眼前風景人未覺
引子入勝中有天來遊何止千百輩誰者領略真蕭閑
我去復來如燕子濠堂無處尋巢痕喜君久爲此園主
收拾世事歸詩篇豈知興亡一彈指故國安在園空存
君雖未歸歸亦得但恐百感傷心魂圖成哀歌予和汝
默數舊恨毋多言

金莊生

武祥

屬題所著書三種

帥師次蒼梧未及酌水井嘗自比漫郎戎旃亦踰嶺君
作漫泉亭心若隱之冷相看真逸民刻詩娛晚景

右題
永泉

唱和集

紙城而鐵人壯哉劉防禦赤溪考銅鼓作書表其墓邪
說方彌天勢若蚩尤霧子書豈春秋欲使亂賊懼

右題表忠

安節義不屈自稱王堅子戰死非徒忠孝者亦視此石
公與金叟弔古憐微旨名教既掃地背義何所恥

右題思忠

答鑑泉亂後歸鑑園

入城南嚮覓龍蟠尾脊騰空最耐看橋到復成波儘闊
堂窺賞寂地饒寒幾時少壯憑回首一局興亡付倚闌
苦道名園無俗味滿牆舊句作悲酸

通州徐貫恂屬題梅花山館讀書圖

幾生修到想居諸換骨奇方政賴渠何似愛梅劍南老

勸人只讀晦翁書

答左笏卿並示介庵

亡國大夫誠可恥避居海濱幸逃死本心未死有鬼神
縱抱遺經亦妄耳少年各欲立奇節老大落魄乃至此
苟活仍遭舉世非杜門猶被千夫指君詩博引到古人
身世略同定誰比彥回名德既不昌何用長生貪久視
幼安元亮或庶幾風雨雞鳴見君子

答沈子培

往者心甯逝類然跡愈疏交期龔語隗相視祀憐輿挂
月樓常迴凝寒歲向除思君須雪後訪戴未爲虛

朱丙君求題張瑞圖草書長卷

崇禎定逆案閣臣居其四生祠誰書碑二水敗以字其

書頗精熟實則有習氣豈不勁且巧所乏蕭散味豎眉
復努目俗筆在刻意對策列第三立論却有致用人古
不分稱職足爲治君子與小人強名乃多事人汙言不
廢此理未爲評朱君得此卷喜看騰擲勢在廬亦許可
絕歎龍虎臂吾意獨輕之一說聊可備在廬擅三絕詩
筆挾忠義莫持張比吳逝者有餘媿

陳仁先聽松圖

颯颯尋徐至颺颺久未停崩騰赴空闊蕭灑出沉冥倚
石夢初覺推窗酒欲醒勸君勤洗耳凡響不須聽

陳仁先種菊圖

鞠族多異姿幽人好佳色年年我有秋寄興在籬側淒
風風始馨凝霜霜作魄翦苗資勤灌迸蕊務細摘忽然

吐殊妙誰信出心得白黃誠高
清紺紫尤奇特一時美
所鍾未免愛而溺君能輕世事
正賴有菊癖菊亦何負
君何云耐岑寂

仁先別號耐寂

惟菊有騷心對菊宜自醉看君
留菊影畫手遠不逮淵
明魂難起菊意誰能會蕭蕭天
地秋獨秀霜風外海濱
菊最盛種類極繁碎時事莫挂
口刻意徇所愛可憐才
未盡哀怨出天籟餘生依草木
聊復娛晚歲

蒼虬閣觀吳仲圭畫松

以下癸丑

何時失路竄巖底捲山怒濤龍
欲起筆下風聲來似水
道人胸中乃有此斑斑古苔含
墨理作鱗之而極可駭
心知化石或未成定有茯苓堪
作餌嘗觀許遇畫長松
半身埋雲高不止峰顛隱隱動
天籟猶恨近前難逼視

豈若此畫任摩挲坐卧時疑風入耳

劉宣甫六十生日

宣南遊蹤光緒初忍齋西齋嘗共居讀經聲中溫舊夢
此味忘老真有餘蓮氏行年六十化吾儕不化誠空過
出頭且放與諸郎虎變龍攄任稱霸

莊思緘濠上觀魚圖

苦愛莊周信子與知魚知我定何如蚤知熊掌非真味
漸覺年來悔舍魚

愛蒼示聽松詩因及濤園種松事賦此答之

般若臺前松風吼以濤名園從許友烏山戴石石戴松
石上翻濤山欲走山荒松老何人識共愛頤香名在口
忽看園址變祠堂更種新松伴蒼叟問公出山今幾歲

滿眼滄桑又陽九歲寒後凋空太息爲我言松黯回首
未能相從歸踞石想見松陰可盈畝夜深濤作誰來聽
二老英靈定攜手

許顯香壽園
顯香文肅

今爲沈文肅祠二老謂

過义袋角映盦所居

有樟騫雲鵬有藤竄修蟒衆木紛蔽虧翳若張天網繁
枝上交陰盤根下錯壤迴飈不能振鳥語闕幽響夜氣
晝不開日色含莽蒼河流繞其外穿漏微眩晃森森百
餘樹樹樹堪俯仰誰知入林樂遂古涉冥想拊楹試一
嘯驚視來罔兩詩心正厭世得此恣獨往何當風雨夕
瞑坐搜萬象勿愁語太玄寥閬吾能賞

曉起

正月二十一日

清霜曉月滿闌干曙色橫空夜已殘凍殺梅花誰管得

只將瘦骨敵春寒

程白葭屬題精忠柏斷片圖

世方憎忠義君胡表此柏移之置岳墳終古配毅魄吁
嗟墓中士湟背字歷歷萇叔苦遠天天傾血成碧

長尾兩山屬題倪鴻寶手稿

造意如垂雲隱隱吐雷電使筆如縱兵颯颯刺刀箭爛
然驟圍點率爾恣塗竄妙處堪熟思精極耐細看斯人
誠過人表裏俱可見籌餉卒無功海運纔得半渠甯亡
國臣暴屍餘恨歎由來翰墨緣千載等昏旦矧茲忠義
感密切逾親串兩山獲此稿手校補殘卷昔哀鴻寶心
今見鴻寶面勿令俗手汙閑戶潛展玩平生曾南豐好
蕪香一瓣

又題雨山所藏黃石齋文治論卷子

尼山論人先史魚有道無道直如矢石齋可與史魚匹
畢生不屈得其死奇哉斯人乃多藝文辭書畫皆絕美
迂僻疑當含瓦石廣平梅花定何理忍盦昔藏潑墨卷
蓮葉戲蟹半入水孝經論序雜駢散蔡夫人書尤可喜
忍盦久亡不可見今見此卷毛髮起雨山端人能寶此
殷勤使我題紙尾我與石齋雖鄉里亡國則同他無似
略談文字尚難追北山遺臣誰敢比

二月初一日雪中作

驚蟄昨已過草根青欲活北風忽一怒作此漫天雪散
花塞空際著地亦不滅松竹各離披殘梅益妍絕樓窗
明耀眼終夜疑出月凍雲壓曙光日氣爲之奪密林如

鹽粉淡墨妙新潑
庭除止勿掃獨賞留
皓潔寒雀何羣
羣聚語俄驚瞥欲爲體
物語鹽絮孰工拙不須效
白戰誰可假寸鐵

李審言室趙孺人詩

黔婁未爲窮固窮在其妻
貧賤有難言言之傷肝脾
爲子事丘嫂爲子奉阿嬈
子有析居叔迎養撫其兒子
有未嫁妹教誨迨于歸
子獨厲節操家法衆所儀
子獨治詩書名聲人所師
子居秦南倉一鄉誰與齊
子冠興化學一縣誰能希
方子初應試宵中綴敝綈
及子出適館客中寄新衣
子窮而好施貸錢與子揮
子貧而善病質田爲子醫
命貴且問相戲言子豈嗤
夜冷不甘寢知言子誠癡
子疾身欲代子愁顏愈嬉
彼實一好婦食貧色

以衰彼實一健婦持門體以羸忍涕行不顧歸來子何
爲妄意晚相報迂哉子奚追幸子有文字自書自傷懷
文字身後名生前事事乖豈若不識字白頭伴荆釵彼
釐不恤緯又與宗周哀何如歎糟糠何如炊粳粳

劉步溪見語閩事並示新作

閩士褊狹自風氣我聞劉君言小異汀漳水利可富閩
此議堂堂起人意建溪高屋如建瓴水力驅機天所遺
誰能斷取萬丈瀑激電鞭霆作機事富以其隣我何害
反掌當令收萬倍莫從鼠窟尋生活且引眼光出牛背
老夫豈妄衆勿訝或君不哂前言戲深人作詩語不淺
多歧徘徊尤堪味

劉詩云多歧
我欲少徘徊

我如馮婦恥攘臂技癢

自嫌囊底智誓心鐵石問弢庵晚節相期在風義

春陰簡李審言

審言與我年相若我觀其書頗驚愕清言移人味甚正
讀書得間趣尤博乾嘉學者各有就一語舉要遺糟粕
前輩著書政如此後生或識伏案樂近來文士絕囂張
雅俗未分妄自爆範圍名義潰欲盡亂耳使人意緒惡
速持羯鼓爲解穢絃外餘音不寂寞論詩君勿謬見推
此事散原真傑作我今心折在四靈才力自知甘守弱
籬間垂柳黃可念澹蕩櫻桃花已著春陰竟日能見過
無益有涯待商略

櫻花

離合神光看不厭乍陰乍陽明復暗開顏弄日影成雲
吐蕊含姿花愈澹春風莫吹鳥莫啼從渠爛漫壓枝低

傾城政有無言恨倚市休論桃李蹊

其二

雲停煙活風日鮮堆花滿枝弄嬋娟
施朱太赤粉太白始信微醉由天然
花光如水水欲逝開到四分方絕世
近前細看更沉吟休向花間問才思

桃李

成蹊由好事桃李初無言君子如桃李
驚俗何足論撫已誠有得世喪我固存
使彼會從我徐行迴衆奔

答樊雲門

幽憂成簡出苦吟成心疾有詩不與人
聊自嘔抑鬱故人偶相從借酒道契濶
樊山忽入坐真若山排闥感君已再顧
詣謝意久闕微雨花覆牕小坐極可悅
詰朝出

新句語妙多曲折形骸殊聲氣疏者孰與密庶爲知者
道流俗莫強聒春歸益閉戶刻意還閣筆

江陵張茝衡女士絕命書題後

逝者難自救豈願愛者俱生者甘自絕告絕留此書此
書誰能讀讀之血模糊那堪示兄姊況彼無母離自謂
命窮薄舍生甯從夫未死憂見救將死憂不殊引藥更
進食力爭在須臾毒酖反爲美天親反爲疏處置何周
密多方出不虞一瞑幸已達智計人誰如嗟嗟彼女士
所守同腐儒知爾方厭世舉世非吾徒大義世所棄至
情世所迂爾云酷愛名殉名安足娛爾兄善述哀真實
語不誣嗟爾手足情悽悽一世無

答陳仁先寄栽菊種詩

杜門菰菊冷京曹海上羈吟類楚騷詩卷惟應書甲子
高齋想已沒蓬蒿試尋乾淨半畦土與寄沈冥一世豪
珍重殘株好將護秋來還擬酒中逃

陳詩云何緣庭下
依高密爲愛詩中

有義熙

題董小宛孤山感逝圖

園豈埋香地梅爲感逝花有人憶花影無語自橫斜

徐積餘隨庵勘書圖

北江論藏書數等意甚備推原正缺失考訂家爲最何
人可當此惟數錢與戴其次辨板片錯謬不少貸是謂
校讐家抱經覃谿類又次日收藏異本廣搜致下供博
士覽上或補金匱天一閣嶙峋瓶花齋珍祕崑山傳是
樓海內共驚視又如嗜宋刻所獲多精緻旨意縱未窺

年日務省記鄔鎮鮑處士吳門黃主事斯爲賞鑒家可
喜亦其次乃若錢景開陶氏五柳輩湖州施漢英巧掠
仍販賣舊家有中落賤取計必遂富室苟好書索價每
十倍其風斯下矣掠販誠逐利徐侯刻叢書蕪林極寶
貴庶幾比蕘翁後賢恃津逮雅存語雖謔頗亦饒風味
聊題隨庵圖世變堪嗟慨

題劉聚卿汴學二體石經

汴學經久亡殘石定有幾山夫記五碑爲數疑不止彭

文勤馮柳東揚幼雲所藏著錄僅周禮汴中新出土中

庸益可喜薄家見四冊猶未及丁氏九經得其七三百

數十紙竟爲聚卿得默相有神鬼聚卿負俠氣好古力

尤偉羅君叔蘊勸摹刻輒以翁孫比此議誠大佳我意

欲稍俟祥符陳留間援叟所親履已云多湮匿

亭朱

竹垞

語非是安知開封學石板果盡毀士夫常漏略碑

賈或可恃及今力蒐索竒秘儻再啟石齋斷碑硯珍重
已如彼得石加護持摹刻安可擬天驚石破事亦在人
爲耳却嗟章友直楊南仲輩夙號精篆體蜀經皆題名
此刻胡不爾古人重經學視書特小技用意極尊嚴誰
歟會微惜老夫丁世亂覩此空掩涕兒時真隔生背經
瀉瓶水

病起讀經會

風雨敲窗病骨蘇執經吾道豈愁孤嘯歌不廢聲金石
物論難窺叟智愚危行終哀世澌滅勝天聊緩死須臾
孱軀便是興亡史可信詩人有董狐

恒齋畫鵲華秋色便面

鵲華曾入斯人眼過眼誰知子所之縱使今朝同健在
追歡無處亦成悲

當年放浪恃形骸次第風流地下埋留與工愁王沈鄭
恒齋苦憶更緘齋

謂旭莊愛蒼

風蟬

却暑惟默坐蟬噪意轉煩風聲得所助倦耳生波瀾抑
揚亦可喜衆籟不能喧五更誰來聽夢斷初忘言

雨鳩

雲陰作晝涼雨到鳴鳩外午倦喚欲覺隱几猶夢囈忽
然自驚起諦聽故未逝窗前過疎點竹樹交深邃

吾分

老死雖吾分銜冤欲一言辟人終辟世爲鶴亦爲猿樓
夏天沈月秋悲葉去根儒生機屢失端已絕乾坤

黃石齋蓮葉戲蟹卷子

秋荷張敗帆霜蟹挾利刃離披更出沒深淺皆可辨道
人不畫水水趣自瀾漫尖團得八九或泳或奔竄蓮蓬老
如石黑皴堪摘玩蒲荇氣青冥映波作重暈荒涼各成
就凜凜意誰見回思光緒中忍盒藏此卷西齋我下榻
累月常在案重逢真腹痛窮老入世亂欲題自傷晚何
止存歿恨

張楚寶求作石老人君子居詩

辟世欲何往飄然海上逃離羣從鳥獸孤嘯答風濤此
叟堪師事高蹤謝爾曹題名非石隱試爲問文豪

楚寶
摩崖

題名並作石老人記

白下尋殘夢吾嘗過竹居胎禽養丹頂壁記刻行書鴈
詠懷前輩風流話舊廬宮牆照眼地今日是殷墟

題徐積餘重繪定林訪碑圖

金陵承平多士夫鍾山若爲人所歸此山政是老名宿
荆公放翁嘗追隨吾儕流寓親山色不啻老輩私相依
摩挲題名輒繼刻一暝豈異生同時興亡忽然來見逼
山靈脫命纔幾希名流狼狽鳥獸散海上存者真子遺
當時圖詠謂可久轉眼灰燼空餘悲君今再圖重收拾
卷中人物殊參差後來觀人益論世未免變節留深譏
何年更往待事定聊破寂寞鏤巖隈

九日病愈出游

鬱鬱藥鑪經卷邊偶聞重九意蕭然國亡安用頻傷世
病起猶思一仰天幾換園林吾亦老休談人物夢何年
菊前桂後秋光斷却負登高半日顛

答乙盦短歌三章

仰見秋日光秋氣猛入腸相守蟲嘯夜相哀葉搖黃枕
書窗間人二豎語膏肓日車何時翻一快偕汝亡寂寞
非寂寞煎愁成沸湯同居秋氣中一觸如金創

人生類秋蟲正宜以秋死蟲魂復爲秋豈意人有鬼盍
作已死觀稍憐鬼趣美爲鬼當爲雄守雌非鬼理哀哉
無國殤誰可雪此恥紛紛厲不如薄彼天下士

秋氣雖宜詩鬼語乃詩病君詩轉西江駕浪極奔勁云
何弄細碎意屬秋墳夏四靈若靈鬼底足託高詠人間

匪佳味孤唱淚暗迸故交去堂堂關張等無命共君伴
殘歲後死聊自聖

先考功生日歸虹橋路

十月十一日

雨餘黃葉欲辭林曉霧纔收又似陰
久客竟踈忌日拜新寒正動履霜吟
携孥海上成遺子縱步田間即陸沈
苦道白雲近親側望雲悵斷恐難尋

愛菊二首簡陳仁先

愛菊愛其淡菊類晚愈奇豈能遂不愛
臭味殊差池秋花復當令佳種忍棄遺
恨不起淵明究窮花之姿頗疑東籬意
匪逐世情移尚淡不尚奇此理將語誰

衆芳競媚世菊乃傲者徒窮秋風雨中
閉門足自娛詩人有寒骨氣類惟餓夫
周粟誠不義餐英追三閭千秋

屈與陶知己良有餘對菊懷二子悲吟意何如

幽思

幽思破殘夜禁寒彌懽悽野蒼霜氣白窗曙月痕低我
倦不能寢鷄鳴真欲啼旁皇殊未已覓句奈無題

答叔伊

荒池老樹皆吾夢夢境故人聖得知二十九年煩省記
只能尋味不能詩

題明登萊巡撫陶朗先遺集

陶撫獄甚冤明史失其傳申耆與衍石補作殊有見同
罪若襄愍同類若忠憲師友皆大賢才質尤相近東林
黨人碑名字豈妄竄黨籍誠至榮汗青何足恨

雜詩

恕齋名藉甚一敗遂塗地苟活纔彌年甘死殊不易武
昌知必亂養癰固宜潰不戢而自焚弄兵實衆釋咎公
在操切姑息豈得計奄奄歿牖下易主真隔世平生諸
宗元過門空雪涕

司齋性素懦臨難乃不屈其弟能同死節義兩無匹入
川不能止別酒成永訣使吾在軍中亂事或可過前師
赴成都重慶止勿發徐收秦黔兵叛者良易滅求助辭
甚哀拊膺獨嗚咽

題慈烏村圖

冊中有金西叔茂才自作隱居賦一首甚妙

金村幽人隱居賦樹老峰環資掌故能文只用說田園
辟世誰如守丘墓年年返哺還養雛共愛君家屋上烏
切莫離巢思遠舉出村恐有黑雲都

周少樸中丞留飲

主人好士真天性邂逅衝筵便盡歡
身外惟留詩卷在歲寒轉覺酒杯寬
謀人家國腸空熱老我田園興已闌
慙愧梅庵厲高節深衣相對岸黃冠

革命後李梅庵著道士服

湯蟄先求作明遺老朱舜水詩

後樂園中好樹石海波吞天滯魂魄
九原想與夷齊遊徙倚祠門長太息

後樂園中有夷齊祠

當年東隣重忠義藩侯倒

屣迎賓客駒籠私第址堪尋
龍麓高墳碑未泐我遊江

戶嘗憑弔竊敬此翁世莫識
忽聞學社噪杭州歸骨建

祠爭甚力斯人辟世雖不返
故國舊君心匪易紛紛正

欲廢大倫謬託同心定何益
策名委質義難背自許英

靈照肝膈善學柳下有不可
妄附紫陽渠所斥

朱氏家傳云或

持請明朱文公有子爲餘姚令遂家於是族人
欲附之舜水不可曰人貴自立不必攀附紫陽願持此
意入社來儻訝異端從見聞

姚賦秋六十生日 以下甲寅

六十忽已及初見如目前回頭顧諸郎略如君少年當
時不畏險妙手矜飛仙豺狼與蛇蝎狎玩長周旋毒物
不能害脫命誠有天世人空吐舌至今知子賢譬彼善
游者深入萬重淵嬰鱗探其珠不驚驪龍眠君今已老
成狡獪甯猶然往事偶一談頗堪娛酒邊舉杯爲子壽
相期絕世緣

劉聚卿屬題枕雷圖

忽雷流傳千餘年大小二器歸此閣楚園好事繼燕庭
鐵崖東塘不寂寞前有花坡後瑞山解操唐音聽者愕

畏廬復爲寫此卷殷勤不憚再三作宜春堂中勸我酒
宣統三年事如昨忽然夢覺今何世遺老江湖各零落
怪君風流殊不減猶能出圖責前諾當時已有萬種哀
欲寫輒成數日惡興亡過眼更何如忍倩琵琶轉絃索
名流紛紛競綺語誰倚新聲續夢鶴莫誇尤物留佳話
且伴殘年專一壑猛看題字絕驚嗟震耳波濤嘯蛟鰐

味雪軒圖

辨味必以口未可與言味雪味尤玄孰解推其意謂
雪味在茶舌本得深致非甘亦非淡仙境吸沆瀣或疑
味在梅蹠枝耿窗外天花正交舞幽香忽微至又疑味
在酒却寒宜薄醉沖然適其適醕旨若可會不然味在
詩思發覺有異雪中獲神助逸語夤出世尋味入非非

得味自天際試約軒中人衝寒共驢背

江盧奴

王恭辟長史江鼓素所憚凌晨往自言囁嚅辭甚異盧奴出帳中對客罷漱盥聞之若未聞默爾意傲岸獨酌不及賓臧獲待再喚頗怪卿亦須杯中物甯羨解慙恣一吸未醉頰在面逡巡幸脫去伺隙誠可竄自量固爲難出戶震微歎

朱游

田野幸亡事東閣且小留四方多奇士來者良可收丞相備賓主於禮蓋至優請君爲郭隗趨風或爾儔薛宣語從容用意殊未周遠不如丞嘉一言驚庸流小生廼相吏狂直真朱游

答嚴幾道

故人含淚倚天闌，翦紙能來招我魂。
覆壓終同釐懼隕，津梁誰信佛稱尊。
壯年屢棄猶知恥，邪世羣飛孰訟冤。
從此休論王霸事，區區名節已難言。

嚴詩云事過無端感霸才

楊龢甫集二李篆譜書後

楊壽彤之父令西安殉難

斯冰去人遠，遺蹟按麟鳳。
炎炎六百言，爾雅辭可誦。
千文集逸少，傳習世已眾。
孰與持茲編，攷古極有用。
豈徒窺篆法，小學繫尤重。
先生厲名節，死義事絕痛。
何時手自書，整暇兼飛動。
避俗意殊奇，合汙甯足諷。

答樊雲門踏月之作

酒罷各引去，初月猶在西。
且談且徐步，餘興如忘歸。
樓臺隱星漢，林影紛路歧。
夜色使人幽，幸無車馬馳。
誰知

道傍客寥寥皆子遺
樊山素鬪健萬戶比千詩
左叟能作達聞歌情稍移
我亦耽行吟意行從所之
海濱聊可避莫辨望與夷
清景良易失追摹記分携

櫻花

朝日滿園春過半絕艷爲雲雲欲散徘徊已倦更淹留
醉夢雖酣難把玩微紅漸褪旋成暈淺碧獨傾尤有韻
一年能得幾日看却對半開愁爛漫

答陳仁先看花

閉門春晚耐餘寒強爲花枝共倚闌
深色數叢休恣賞碧雲一樹試迴看
綠櫻一株尤麗已拼酒病華年過却俟河清
笑口難行近高樓渾世外從君寂寞更盤桓

自海復鎮赴崇明過古墓柏林甚茂

海角無山中墓田如雲豆麥欲連天斯人畢竟憑何力
卧擁幽林過百年

送長尾雨山北遊

江戶舊遊非夢寐眼前雨山嘗同醉人閒陵谷事堪驚
無恙吾儕默相對此心歷劫終不改我與乾坤孰堅脆
但持常理待無常蒼狗白衣從變態春申流寓忽數載
文字相娛加篤愛君今北行何所覽闕里岱宗思一拜
尋碑捫石或有得弔古哀時必增慨知君平生重忠義
邪說安能容鼠輩莫嗟孔氏久無徒回首滄桑老夫在
徐室女新華哀詩

女子幼入學稍長絕可喜所患在務外相率風斯靡
瀕盛學校吾見亦衆矣家家掌中珠化作蛇與虺異哉

徐室女天性秉孝悌其兄遠遊學閨室奉祖妣能承大
母歡以女兼孫子戀親且好學不嫁嘗自矢文字漸有
名浩瀚若秋水徐君出示我涕下不可止女亡二十一
短折定何理盈盈玉雪枝忽作塵土委人言才妨命悔
痛實無比所餘僅翰墨魂魄必依此誰能哀以辭吾女
將不死我聞心骨悲彌明次女亦長已彭殤那足較飄
忽同逝晷妄歆人間福欲纂厥世史此哀何時忘淚面
不必洗

題懷素自叙帖

草書初學患不熟久之稍熟患不生裁能成字已受縛
欲解此縛嗟誰能獮獠解事趨平淡筆下風雨常縱橫
觀其能速不速處蟬蛻一切如無情沒人操舟誠妙喻

舉止自若完神明子瞻甯未見此帖毋乃會意翻忘形

七月十七日昧爽

曉霧殊未明墜月欲無焰樓頭彈指人忽有山河念

斜日

二畝庭陰足斂魂松寒竹瘦對閑門空哀臣壯今將老
未信凡亡楚獨存斷簡殘編銷熱血秋風斜日付黃昏
長歌慟哭何須比到骨深悲在不言

吳興周慶雲爲其生母董夫人造塔於杭州西湖
理安寺自書金剛經且乞丁女士恆繪圖刻
石列置塔壁

逝波所捲倏萬劫成壞變化隨諸緣熒熒一念偶不滅
坐使金石爲精堅有人心傷母鞠我報以罔極穿重泉

瞿曇遺文勸出世血淚化墨書盈篇繪圖建塔儼彈指
神鬼冥助非人權湖山照耀佛守護見者悲涕垂窮年
故知斯義了無壞陵谷改盡誰能捐世間莫非父母體
何苦造孽空滔天

重九雨中作

風雨重陽秋愈深却因對雨廢登臨樓居每覺詩爲祟
腹疾翻愁酒見侵東海可堪孤士蹈神州遂付百年沉
等閒難遣黃昏後起望殘陽奈暮陰

陳仁先自杭州歸見示詩卷且餉山泉二瓶

淞江翦水著沙澄終覺天然味不勝坐想泉源出天目
應知詩派壓吳興松明火活紛生眼竹塢雲深獨曲肱
政恐啜茶致無寐繞廊殘夜思騰騰

題沈友卿太史湖山介壽圖

人生惟事親亂世足自免生我復庇我始識愛日煖世
人初弗慕藉口揚與顯宦遊孰念歸雖在不愁遠匪孝
欲何移作忠說尤誕澆風既如此賢者乃愈罕我讀友
卿詩惻惻頌聖善又觀介壽記至樂殆忘返湖光助承
歡山色來慰眼誰家母與子濟勝自成伴旁人爲感動
羨極當屢泣我生抱終天愧恨視此卷猶餘性中語願
子親益健

殘菊

秋來舉酸尚能空日日東籬繞晚叢老去詩人似殘菊
經霜被酒不成紅

漢江秋望圖

虎帳牙旗事未央
空教漢水管興亡
五年黃鵠磯頭客
待與何人說武昌

江哀漢怒此爭流
斷送愁人又暮秋
今日中原應失望
莫將淚眼更登樓

陳仁先南湖壽母圖

幽居得勝情性中有真樂
南湖奉母地羨子專一壑
吾觀子養志所貴在天爵
娛親惟節義菽水豈爲薄
彼蒼焉置子山水聊可著
巖翠曉窺窗波光晚搖閣
氤氲助舞綵酣適等飛酌
詩心窮靈竒覓句如採藥
長生乃固有仙骨自嬰鑠
摘辭散原奧旨匪輕作
揮毫玉梅庵妙手試般礴
杭州咫尺耳辟地苦自縛
披圖恍登堂詠歎破寂寞

十二月廿四日伯嚴仁先冒雪見訪

倚樓三士送殘年有酒無肴雪滿天
薄醉愈知寒有味放言自覺道彌堅
收身遺子雖人外歷劫沈霾奈死前
便欲將君比松竹離披相對轉蒼然

[illegible]

海藏樓詩卷第九

春寒

以下乙卯

入春只道寒無力，叵耐春寒不可當。
好爲花枝留十日，春陰陰後作春光。

三月十七日丁衡甫于晦若余壽平許魯山同
遊天平山范文正祠

五年在夢中，未得山入眼。
今朝忽驚覺，對此高巉巖。
數峰石戴土，翠色耀近遠。
長松約萬株，重疊倚雲阪。
希文留祠宇，門外春水滿。
石橋緣曲折，小閣昔止輦。
老樹儼侍臣，離立根抱蘚。
孟泉聲掩抑，躑躅紅將隕。
徘徊各無語，望古空一泣。
九原誰與歸，高義仰天篆。

純皇
題曰高義

雜詩

學書欲何爲坐使百事廢規規摹古人久之意不快冥
追愈向上聊以避前輩人云似某某竊用引爲愧雖古
亦猶人面目那可對作真不如草稍悟竟奚異誰能起
自運寫此蓋世氣每奇王介甫下筆風雨至聊爲宋仲
溫千紙勿惜費

宋克仲溫杜門
染翰日費一紙

能書由天資成就在學力徧搜古人奇一悟或有得篆
分絕矜嚴取勢常以逆草真趨雋永神味務自適唐庸
宋益弛晉魏誠造極掃去殊未能豈免爲人役幼年慕
從祖淳古仍宕激中年觀忠端獨往深莫測米顛恨其
手坐受談口兀縱手且勿談破柱來霹靂

米元章詩云
有口能談手

不隨

清道人五十生日藏園寫山爲壽使余題之

往丐祝宗祈一瞑卽爲福今乃願無死留看然臍酷道人纔五十日撫便便腹恐非住山人未可遽斷肉藏園作密林自喜絕塵躅持此爲君壽殊勝不義粟

陳仁先侍御屬題錢南園畫瘦馬

南園可敬尤可愛獨喜畫馬窮殊態一瘦至此有餘慨尻肋蛟螭爾何憊草枯林禿想長饑原頭躑躅將安歸他年駿骨千金日莫遣人間伯樂知

市樓有號新世界者八月十四夜與聘三錫之
鑑泉共飲翫月

醉中惟覺燈光熱暗處方知月色清萬戶市聲散空濶九天夜氣入新晴同遊骀儼應相許舉世披猖信可輕

穿盡人羣聊睨放歌還欲拊簷楹

丁衡甫中丞屬題張力臣符山堂圖卷卷中有
子晦若侍郎題云梅庵欲削龔芝麓余沈同情
各有詩却憶竹垞和厚語蘇卿豈絕李騫期謂
舊交二故人先後南來相見感梅庵語故爲此
詩以廣論交之義余謂竹垞雖有請看蘇子卿
豈絕李騫期之語然於明詩綜不錄黃太沖義
亦嚴矣余爲此詩或異侍郎和厚之意而頗不
背竹垞屏黃之旨時晦若已於六月二十五日
卒於崑山舟中矣言笑永絕可勝愴然

符山題卷墨猶新屬國騫期語已陳今日披圖還攬涕
侍郎名節是完人

古稱朋友以義合義絕深悲道已孤掃地名流今日盡
莫將故舊誤吾徒

丁衡甫中丞屬題傅青主書卷

幾動應知事將至世亂何人能負氣霜紅遺集忽重刊
相感無端豈天意太原節署三年序宣統辛亥所刊學術人心
鬱深慨空將節義比斯人竟作遺民有餘愧傅山垂老
見太平天下洶洶頃誰賴所憂邪說勢未止歲月蹉跎
不堪待安知冥冥留公等僅博狂歌資一快清談如坐
不夜庵短卷摩挲黯相對

題勞玉初勞山歸去來圖

入山跡易窮意不若入海連峰上觸天此去通真宰我
過勞山灣驚浪沒其趾朝霞弄黛色萬變作奇采刺船

久在望竟莫窺首尾來遊欠登頂惘惘如有待山靈留
公孫危行俗所駭曰歸真殉道異國友善士依山更講
學欲使衆知禮相逢訝焉往圖卷表微旨大義猶未明
世難何時已願從勞勞山蹈海覓不死

唐元素同年蜀題湖山招隱圖卷

涉江真畸人山水興不淺築庵傍林舍宿願久未踐偶
然獲此卷失笑頗自遣居然洞庭西縹緲窺疊巘亂作
今五年歇浦等潛遯湖山嗟被汙欲往空餘憤卷中乾
淨土寄意固已遠畫人辛至乙巧合事尤罕我生實胥
門羈吳亦忘返何時結夫子聊作尋梅伴所憂名爲累
姓字端可變身隱焉用文相視應一泣

李審言望廬圖

緣愛生哀事亦微故人義重獨歔歔還思久客歸來味
此日歸來未是歸

答洪鷺汀同年

鷺汀見贈預
祝生日詩

不辰正有逢天恨一讀君詩更黯然敢道朝廷用人晚
坐看陵谷入殘年

滔天四顧無歸日強醉聊過覽揆辰却羨愚園好懷抱

能將餘事作詩人

時洪寄
居愚園

文孫十歲摹周鼓日課偏旁授說文娛老知君定忘老
竊雛漸長欲凌雲

陳叔通求題袁爽秋許竹簣遺札

以下丙辰

節義豈無人戊庚略可數摧殘及辛亥士氣久已沮毒
后憎諸賢要領膏鎖斧女戎真自滅烈士首袁許何怪

國亡時相率作首鼠衣冠遂掃地竊弄啟狂豎重黎極
厚我默契有深語隔窗領而行回思乃終古戊戌九月
在譯署與
爽秋別遂
不復見

正月廿二日先考功忌日適梁節庵自梁格莊

寄貽 崇陵祭品遂以設供

禮終自媿求仁粟戀 主深悲拜祭餘冥漠只知本朝

臘涕洟還展隔年書守陵論欲過炎武復楚心誰繼伍

胥他日焦山啟書藏應憑佛火照欹歔乙卯十一月
節庵焦山書日

考功詞今日送入書藏告庵僧
夜間佛燈前有異光為此書也

禱天代夫圖

鄭道乾母吳
太淑人事

脩短理難明安得私所愛誰歟有大力能令死相代禱
天天為泣誠極志竟遂救夫乃舍子事與恒情背守鰥

誓不偶生死見雙義惟餘孝子痛却恨天公隘冥冥果
有宰任怨尤可畏

園花盛開

五月十日

海棠凝脂已絕倫櫻桃薄醉如離魂粉光玉色難逼視
露華乍斂騰春雲數株出簷滿空雪日光穿林雪中月
近竹高枝見碧花便覺茶香暗蠲渴去年惡風傷吾花
今年花事休相誇朝朝召客立花下空攬鬢絲對落霞

十七日又作

昨日沉酣光射眼中酒朝來韻微損却顧穠華在別枝
苦戀夜寒厭暄煖絕代風神纔一瞥回首盛時已難返
從衰得白可奈何悵恨攀條春又晚

朱象甫求題海天夢月圖

縹緲仙山波不測環珮魂歸更無迹海月茫茫到屋梁
纔是夢中見顏色月影含愁影共沉淚珠入海海增深
空餘魂夢迷離處天上人間底處尋

書事

天柱猶傾況地維堪嗟造物太兒嬉
鼉靈豈望歸鵲魄燕噲公然得子之一亂五年應共盡孤懷
厯却獨難移案頭宣統官邪記會鑄神姦與世知

雜詩

遺山求修史自謂忠於金委蛇貴臣間枉尺豈直尋碑
版諛佐命降辱良已深致書于耶律薦舉誠何心後來
託國史蒙面羞儒林實彼階之厲流毒方至今諒哉謝

山語堪作俗士箴

結靖亭集外編云云

子房雖助漢其志專報韓滅秦復破楚韓後終難存苟
能存韓後何爲棄人間漫云天授漢封留殊未安亦如
中副車負氣非萬全赤松知君心自苦空加餐

五載居海濱避秦幸有此士夫稍奔集偷活賢轉徙鬻
字聊自存俯畜繁食指同年互弔唁屈指八九子諸公
各厲節可敬亦可喜所嗟負君國碌碌何足齒吉甫真
包胥義烈誰與比當年登科錄寶祐照青史吾儕曷交
勉牖下非善死

酒樓燈下飯飛蟲爭投盤肥濃久見欺腹疾驚夜寒昧
爽起盥漱朝飢得澄觀五味初無根屏除豈爲難泊爾
忽見道蕭然罷晨餐麥糗足自活捫腹殊閑安百邪甯
妄侵有欲真吾患辟穀雖未能不貪乃金丹

法華經疏九
凡仙降滬市涉江往觀之社公忽開白靈真當泣斯須
與稱洞賓字如風雨馳笛聲吹江城一字已小奇淚盡
爲蒼生六言次猶疑坤乾妙用韻咨騷還涕洟將亡聽
於神我意不欲爲哦詩三太息回仙良吾師天津路富
東西里巷
星樓上有扶藹者呂洞賓留詩曰梅花玉蕊吹江城春
滿蓬瀛醉上仙我爲蒼生流盡淚更無良法轉坤乾涉
江旁觀
大驚

登樓不見海朝夕望海氣鷗飛態轉遲始覺海已至憑
高目難窮胸次必小異心知鷗所樂造物靳我翅柳州
慕爲鷗毛翮有仁義泰清果忘飢惡世良可棄
落日已將盡斜照氣萬千羣鴉弄餘景翻飛忽蔽天光
燄何遽收沈沈成暮烟微禽亦知警歸思茫無邊逝者
固如斯一闕偶當前坡公觀不變我意方留連

秋草鴈來紅爛斑幻奇彩朱黃色獨明百卉殊不逮丹
楓與烏柏經霜葉亦改西風萬物老絢爛意何在壯夫
迫遲暮才盡有餘慨草木競一時後凋須我輩

高穎生環翠樓詩

其大父棄官歸
養築樓藏書

有書誰能讀有樓誰能居君家百尺樓兼藏萬卷書當
時有哲人棄官賦歸歟抱書閱四朝高行驚里閭與樓
兩崢嶸始知德不孤聞君述祖德感時還嗟吁亂世能
自免保家惟業儒此書與此樓皎然無所汙太息賢公
孫潔身真吾徒

恭題

御書爲劉澂如京卿作

服衣若干尺已能爲正書冲齡嬰世亂舉國負此孤逆

豎不足言滿朝無士夫汗顏雖感舊大義當駢誅劉卿
藏數紙每觀涕與俱時流自謂黠匿笑嗤其迂狂夫閒
處看冤憤空張須未敢頌天縱妄同諸臣諛何年從少
康重來收桑榆

秋分

碧雲翻墨墜秋光殘暑長廊一雨涼松竹欲成樓漸隱
陰晴數變桂初香隨波籍湜應俱叛易暴夷齊故不亡
歲歲登高須強起霜風好爲作重陽

重九

雲斂吳天日愈涼風生雁影氣初霜添衣猶覺樓難倚
入肆翻憐酒未嘗短髮誰從藍田客放歌聊試接輿狂
栖遲自是違天者莫爲違人訝海藏

陳仁先自西湖寄書云聞九日逸社

有高會先生臨臨於何處登高
耶杜有九日藍田崔氏莊詩

劉幼雲潛樓讀書圖

秉書以事君自處在忠孝惜哉非甲冑救國乃無效抱
書竄窮島舉國孰同調潛樓非人間東海意已蹈此中
不廢讀放眼藐羣盜紛紛亂未止恃此昌吾道狂且天
稍厭反正誰能料何妨堅信書南山占霧豹

左子異求題文襄公二十九歲小像

文襄復新疆首刊吾學錄禮壞而慝作響應一何速及
序馬君集原亂論尤篤犯上由放言遂爲天下毒傷哉
今日禍老輩固已燭治世行同倫禮義衆所服邪說興
幾載遽令廟社屋逸民秉家法毛骨見卓犖吾生晚可
哀披圖想河嶽

十月二十六夜作

曉色微茫霧未收
夜珠鬱鬱對銀鈎
殘宵誰待東方白
只有幽人獨倚樓

徐積餘屬題常醜奴墓志

崇甯寺壁亭林記趙氏味辛猶云八九存聞道興平修

志日欲尋殘石已無痕張瘦同舍人修興平縣志時病訪不得然趙味辛跋在乾隆四

十八年吳江楊龍石乃謂此石佚於明季故少拓本非也

人間墨本絕寥寥葉石君李香巖毛意香藏蹟已遙却

喜隨盒有新得楚園秘篋不能驕劉聚卿得石塊徐氏藏本自云勝於毛本

如絲如鐵筆飛空葉翰裳語石中語語隋石風規故不同莫與前

賢論南派晉唐小楷在胸中

唐元素屬題清溪耕樂圖元人陳琳仲美所作

空嗟舊隱慕躬耕吳市誰知變姓名舉世縱無乾淨土
此溪猶是在山清

授經講學仍餘力金石圖書恣品題儻與門人尋樂處
孔顏不似似夷齊

題史督師墨蹟

鷺鳥翻飛自有時圖功布局不妨遲驚駘四鎮終俱敗
太息揚州史憲之

十一月十八夜

夜起久成癖晦明觀吐吞苦寒知月味銜恨斂霜魂衾
影曾何愧荆凡定孰存惡聲聞最熟不必蹴劉琨

江陰趙煥文茂才殉節紀書後

天下行同倫中國本無患賊臣倡犯上舉世乃好亂排

滿實邪說不義豈尊漢斯民既趨利倒戈復何憚能發
不能收瓦解變愈幻人人懷異志所務在爭篡神州遂
陸沈深谷化高岸名教益掃地丈夫殊可賤倖哉趙茂
才一死定眾眩夷狄猶有君諸夏竟俱叛行天揭日月
順逆所必辨薄俗誣大同相率入焦爛網常彼何罪小
康足爲善老夫雖遺民未死火在炭救民誠吾責衛道
待義戰

送升吉甫東行

蜍志厭厭久厭看巍然達道出江干祈天可恃孤忠在
復辟誰言國勢難動地波濤送殘歲傷心關隴話嚴寒
因公雪涕陶齋語祇許留侯解報韓

陶齋嘗語余友朋
中惟升吉甫異於

人

沈子培屬題靈武勸進圖

以下丁巳

君父有危急臣子當自效事成福宗社不成死忠孝元
宗不先請此語實知要奈何裴冕等首務上尊號名利
驅天下豈免害名教肅宗繼元宗慙德在少躁史臣論
黃巢用意頗深妙涪翁譏太子大義堪止暴乙盦賦此
圖尊主警羣盜丁年卜中興吉語解衆悞所執吾雖殊
相視真同調

贈李經彝觀察

時方業
醫滬上

長沙亂後失相聞抗節難汙始見君誰識伯休真賣藥
還從太白細論文子遺聊勝蟲沙盡危行甯妨鳥獸羣
稍喜等身書已就埋頭端欲事邱墳

君著諸子文
粹不日刊行

壽攷庵太保七十

餘生海角望中興帝座扶持賴有人德望卅年來畎畝
難危孤立此君臣清吟謝客應爭席細楷涪翁愈逼真
自是天公眷忠義依然相敬見如賓

篠崎求題畫蘭

流芳與遺臭理欲方交戰我亦楚靈均心哀蘭芷變

唐元素屬題吳攘之小像

包慎伯名之曰如愚圖

安吳矜其書自詭已入聖攘之實高弟孔顏隱相命此
圖名如愚不違意可並一時號復古秘訣擅撥鐙援碑
強入帖懔怍說難罄吾觀古書體風氣各自勝學之得
形似要亦近其性誰能受束縛一一待指證不如盡掃
去縱筆且乘興何須鑿妍醜今日我爲政

吳巽宜山深林密圖

辟世欲何歸意中挾悲憤入山路已絕下筆猶恨淺峰
巒鬱千疊松樾森萬轉泉聲自洗耳雲氣長在眼先生
江海士游屐不憚遠含毫偶寄興孤往似忘返圖成但
自賞俗客未許展謂余久慢世道合古狂狷何時約買
山共逐巢由隱

喻兆蕃出示所藏

高宗純皇帝書畫小冊敬題

石渠編寶笈

御筆燦星辰

太上春秋高

翰墨尤入神小冊仿米倪超越無昔人何時落人間詞

臣秘竒珍傷哉玉座移法物幾蒙塵微聞隨弓玉流轉

歸諸隣吾

皇似

高宗書勢極雄妍他年收舊

物祀夏還配天

題濟甯李一山所藏唐搨武梁祠畫象

唐搨舊傳唐氏本荆川父子留私篆國初鑒賞得朱查
武梁祠象名初顯衍齋秘藏凡幾載旋入揚州玲瓏館
佩今割愛遺汪君轉贈秋盒意殊欵秋盒嘉祥獲遺石
重立武祠挾幽隱前後石室文益多載籍未收剔苔蘚
殷勤持此寄覃谿好古天教福雙眼盡資兩漢記金石
辨證詳明助新纂後叟賦詩石洲繼道光季年事非遠
濟甯李氏久失之寶物何緣出京輦

何忼跋云賈潤生太守自任襄修當

為此冊錄所適何子貞詩注云梁子恭同年從賈潤生前輩處攜來此冊張石洲詩注云價八百金蓋賈君攜此在京求售乃己酉之春實道光二十九年也

十四圖纔存十一餘燼居然脫
兵燹流傳先後粗可稽題跋如林幸無損李君自序具
顛末時士續詠見盛晚老夫斂筆復何云聊快任城壁

終返

題晉安黃氏古蘄山莊圖

昭穆成行勝聚居慎終追遠意何如徵題編作山莊集
便抵伊川說葬書

題金陵蔣氏遺訓卷

蔣生素好禮諸老所激賞金陵吾舊居交遊殊不廣聞
君守遺訓德業久培養曾侯擅八分精楷時無兩爛然
書盈卷相重非標榜審言致儷語淳雅冠吾黨二公吾
所信片語豈虛獎篤行且尊師世風從擾攘

吳柳堂先生罔極編書後

母死國復破此憤可殺身殺身未得所忍死尤煩冤先
生古烈士勁氣苦難吞言官雖其職一言遂去官鬱鬱

栖閒曹偃偃聊自存苟生如久病病在膽與肝處世既不諧功名何足論衝天終一決舉朝爲悲酸 毅皇

誠可哀

景皇遇益艱繼統空紛爭母子還自殘嘗

讀絕命辭俯仰四十年餘生未可死人定期勝天

東台吉通士求題紹熙殘塼

厯劫塼殘趙家地入手摩挲紹熙字頽垣廢井萬斜陽
吉君錦囊作珍秘紹熙明昌各一天可憐紹熙纔五年
孝宗廟號信無愧可惜生兒非象賢陽武崩隄河一變
南派入淮彼曾見紹熙五年河決陽武從此南流不驚能復塞吉君云得此塼於合肥
湖鹿洞莫紛爭坐羨徐君堪斲硯張芑堂得徐君古塼制以爲硯錢竹汀銘之

風雨過

六月初四日

穿徑貪依竹色涼
松濤漸覺到虛廊
雨餘鷗隊矜翔舞
風際蟬吟恣抑揚
忍道長安渾似奕
那知滄海又生桑
匆匆一枕槐根夢
未抵獮飈半日狂

雜詩

高樓插暮空
正作碧雲色
浮雲忽蔽之
遂使虞淵黑
夸父不自量
棄杖成遺跡
沈沈入長夜
誰與護鵲魄
海波深無底
嗟我夢魂隔
赴海斷六齧
猶足立四極

往時慎論人
自謂不輕許
豈知無一中
非璞故爲鼠
過言雖可慙
捫舌駟何補
正欲章吾妄
且以戒羣輩
文字都莫刪
留待天下數
冥冥易墮行
敢責平生語
披猖既不返
憫默將誰與
攬轡待澄清
晚蓋或有取

題張亨甫洪橋送別圖

爲范秋
帆作

慢世才難屈高名遇獨窮平生姚石甫期爾李空同往
事洪橋別交遊國士風風流殊未盡宛在夕陽紅

宛在堂祠

閩中詩人

劉晦之求題瀛國公寶

宋帝賜

趙氏一塊肉史不知所終十二徙上都

至元十九年從中書省言徙瀛

國公居上都給衣糧發遣之

其年猶童蒙十八赴土蕃不娶歸真空

給糧復賜鈔

至元二十五年賜鈔百錠是冬赴土蕃

衣食知不充無後將

遂絕祀宋嗟難同徒聞上尊號懿聖仍孝恭

宋史新編瀛國公妃

益王是即位於福州遜上

帝號曰孝恭懿聖皇帝 豈如是與曷海上留遺蹤忠

義動百世烈士悲其風雅存自伊犁得之歸江東晦之

偶獲此哀歌氣填膺亡國不祥璽姑置何足恫天命誠

未改少康滅有窮

答嚴幾道

羣盜如毛國若狂佳人作賊亦尋常六年不答東華字
慙愧清詩到海藏

湘水才人老失身桐城學者拜車塵侯官嚴叟顏唐甚
可是遺山一輩人

哀小乙

以下戊午正月初三日卒於寶隆醫院

靈真伏我旁我意殊不覺一朝忽然去百身那可贖尋
渠詩中語縹緲如鴻鵠海山不成歸無故輒歌哭既云
厭人世何事猶苦學繁華絕所好惟學爲子毒得天監
其腦解脫誠已酷蓋棺甯無戀號泣羅骨肉修短定虛
名畢生自多福

昧爽赴吳淞落日歸黃浦挾書獨往來海鷗久爲伍錫

名乃曰勝好勝由爾父未明喚兒起去去不言苦回頭
望樓窗目力盡街樹飢飽兒自知風雨兒自禦安知兒
已傷精髓暗中腐卧床未十日到死無一語無窮父子
情草草遂終古倚樓默自失淚眼復何睹

陳尸儼在牀昏眩忽如夢存亡孰主賓非悟亦非慟委
蛻良自佳造化試搏控魚潛爲鳶飛久羈等一縱魂魄
猶樂生億測恐難中哀情譬初割未免護新痛此境行
及我萬古迫相送苟生正可羞不死嗟安用

病革憂交攻惶瞽苦無計一朝氣遂絕心知即長寐眼
看尸入棺骨肉從此棄見棺不見人哀怨將何冀如何
棺又去遺像空相視人尸與棺像變化一至四他年當
爲墳百歲同入地親愛未盡亡死別饒餘味留名稱不

朽萬古付涕淚

天地獨不變未足釋我疑所疑天與地生死亦潛移人生時苦短古今渺無涯昧哉漆園叟無生爾何知旁觀似甚明自逝夫誰欺日月爲我魂山川爲我屍中有弔古者悲歌復在斯造物無所愛萬形紛奔馳死狀竟何如試爲吾言之

文字久不磨形骸倏已改何爲戀人間一瞬即千載強令短者長短長究安在我今恨渠短自謂猶有待朝來昨既失夕至晝奚逮始知逝川歎聖者難自解長逝等無歸豈必歸爲鬼形聲術可留神識還真宰文字固非道聊復託生死

題黃石齋手書詩冊卷首有

御題英光浩氣四大字

婺源一敗得死所至剛塞天世誰伍怪公結習殊未忘
意定神閒視千古知不可爲而爲之厲叔不平猶報言
吾儕忍死欲何爲手捧奎章愧吾主

唐元素求題石齋小楷孝經

石齋自視千載人餘事卓犖皆絕倫晉賢風流所不耐
安能媚世書洛神平生尊經復守道孝經百本爲世珍
五孝五詩實錯簡妙解諦當義乃伸舍經論書亦無匹
用意嚴重趨艱辛此書此人等勁烈何異地上行麒麟
涉江無意忽得此自訝暴富非長貧但當持此一當百
他人縱美難並陳

呂霽川赴水救姪詩

仁者不違仁造次與顛沛斯時念未起犯險曾不悔呂
公有族姪遊反夜方晦嚴寒忽失足水深不可厲同行
空驚叫相顧莫爲計呂公徑赴水挽姪履平地重裘雖
盡濕勇氣真蓋世定知有神助歡喜失狼狽坐言與起
行撫已每多媿瞑目試思之勿遽矜我輩

雜詩

前身爲老卒夜夜登戍樓一生看太白不知春與秋今
我復何爲山川非昔遊杜門獨長嘯兵戈送白頭夙根
殊未忘聞難如有求終年起殘夜哀思變明幽世亂須
至人安知非楚囚及我老未衰爲君著兜鍪

思小乙

挾策頻年似我長論昏未就意幾忘病中淚盡言難曉

身後房空事可傷
叢稿悲涼留宿業
遺姿抑鬱對迴腸
層樓向曙看渠去
却剩危梯望杳茫

題劉公魯所藏明宣宗畫犬

世傳宮貓圖士竒爲之贊
此卷作雙獬馴麗絕可玩
宣德四年春靜慈位初遜
悔稱少年事女寵誠難豢

梁星海六十生日

危言且危行初不求自全
今年君六十得全豈非天
世亂安所歸麻鞋直經筵
君臣幸相保憂患猶無邊
老來益強固勁烈逾壯年
中興可立待會使國命延
壽考兼令名青史已足傳
苟生彼何取期頤嗟褚淵

哭旭莊

期許從童稚君家伯仲間
平生心入土往事夢如山
抱

節殘年盡能貧晚遇艱病中懷舊意惟有淚相還

江甯葉伯夷求題述異圖卷

葉君訪我攜巨卷自記所語出暝眩南行入閩證所見
信有冤報閔彼粲野葬狼腹骨無櫬廟貌鸞驂若仙眷
去周歸葉定誰戀顛倒離奇只餘恨人生春蠶絲難斷
幸勿作繭縛恩怨題者紛紛意徒亂顧五醉墨爲一歎

卷首有顧
子朋題詩

哭愛蒼

共推左癖如元凱酷慕詩流必老坡失路江湖空憤慨
戕生陵谷坐銷磨向來天際真人想昨日寒齋一夢過
垂死犁來雖莫逆鼠肝蟲臂奈君何

叔伊以詩索剪菊插瓶

故人苦憶故山青
拋却東籬只獨醒
病起吟箋能小草
夢回叢菊在雙瓶
客中欲問愁何味
晚景相看鬢已星
且約窗間常促膝
海天寒雨任冥冥

答余堯衢

我去長沙月餘日
武昌亂作如兒嬉
使我率師下金口
舉手撲滅何能爲
與君分袂初不料
陵遷谷變天一涯
出奔歇浦實異國
七年相見嗟予遺
媼生日久空自恨
春秋不作宜無詩
同年屈指六七子
吉甫壯烈尤可哀
辱君見稱我滋媿
共厲晚節毋詭隨

和碩恭親王福晉挽歌

碧魯承 金冊 天潢迓鹿車
河間欽德助鴻烈
相成書風馭隨靈
雨神山出太虛
誰紓隆準慟哀語
散瓊琚

去國捐環珮從亡護棟華遺言薪膽惻逝影鏡塵遮賢
孝輝彤管僊游望落霞東平正深念保乂重王家

挽俞恪士

結茅山水窟哀此荷鍤志辦香爲簡齋自懺一生意貞
疾恒不死冀子當久視遺形呼吸間得爾亦豈易如聞
人琴慟不減微之摯謂其弟壽丞平生盛自許詩卷肯相質
奈何海藏圖負我靳一字行藏各有素抱憾遂入地湖
莊波渺然滿眼故文淚

正月三日昧爽作

以下已未

樓頭燈息夜微明回首倉皇意自驚志氣太强翻一折
奔波苦學竟何成早令從我尋文字或幸延年換性情
今日餘哀兼痛悔彌天縱戢恨難平

六十感憤詩

生我定何爲於世無寸效不辰空怨天所恥伍羣盜
中差了了將智且未毫入年坐面壁一靜却衆躁種松
待聽濤日夜某之禱微聞世人譏舍竈反媚奧親交頗
相閔欲諫奈自暴蒼蒼豈無意留此時未到廉頗得趙
卒妖孽猶可掃

題杜于皇像

世士初心慕采薇幡然一改却難追窮愁欲躡西山餓
真覺于皇舉火奇

于皇云近日之窮以舉火爲奇

貧賤驕人傲不妨居然慢世亦堂堂茶村老去惟貪睡
那管昌黎與子長

雜詩

露氣泠泠瑣碎金初陽到地又穿林南趨新筍渾無數
不覺蒼苔一徑深

亞字闌干鑿石成塼廊縟膩復寬平年年只望松身長
待聽風濤入座聲

呈李星野夫子

粉坊直宣南樹色映雙館弟魯兄且愚師嚴徒猶嬾隱
桓憶口授執卷老每泣功名負所望氣節空自赧膏七
歲入
都居粉坊琉璃街莆陽館師居福州老館自入歲至九
歲與煙弟俱從師受經二年師近與煙弟書曰德門心
法重氣節而薄功名

題林文忠手書日記

績密精勤見意理平平無奇乃如此必有神明逝不傳
但覺尋常猶人耳君臣相知古難言荷戈一去真主恩

名高取忌誰能保忠順勤勞是本根

寄題杭州樟亭

慘淡穹蒼久屈蟠滄波老樹想高寒天雞白鵠愁霄漢
志士仁人傷肺肝一日縛茅成故事諸君抱膝恣游觀
何當策杖追公等徙倚亭前話戒壇

張鈞衡爲母造長生塼塔且募柳誠懸所書金剛經於石求爲賦詩

張君奉母母奉佛爲母造塔募金經敦煌唐榻誠懸筆
筆勢與塔雙崢嶸此經傳世壽無量有若母壽資長生
我聞世間人子意奚翅佛力無不能試觀彼佛亦人子
何待功德侔丘陵適園勝蹟誰來訪柳經鄭記應齊名

余嘗作
適園記

石遺示早睡早起二詩

寐叟深言夜坐非石遺極道曉行奇海藏夜夜樓頭坐
却是晨鐘欲動時

聞雞待旦已爲常早睡翻成減睡方記與壺公論夜色
四時霜月抱冰堂

丁恪敏公挽詩

坐上白虹貫酒卮酒闌人散別君時三人來告欲驚走
一瞑詎知無見期肝膽平生心已許雷霆獨立識堪悲
搗門夜訪從今絕寂寞憑誰說項斯正月六日在涉江宅夜飲公於八日遇禍次日奔視已歿嘗集蘇詩爲公書聯曰高蹤已自襟漁釣獨立自可當雷霆公甚喜之常懸客座

九日

却病因之廢酒杯杜門誰復覽崔嵬一庭秋氣人先覺

累日霜風菊又開
遂付蟲沙期共滅
並疏文字但餘哀
朋儕亂後凋零甚
悵望斜陽更不回

題周子潔募葬徐侯齋啟卷子

昭法死空山其志誠皎潔
畢生絕交遊僅得全名節
世士不能窮無論蓄內熱
小人偶作緣宛轉緇已湮
置身清濁間時名那可竊
吾黨二三子內訟庶不屑

呂秋樵遺墨

其子彥介求題

方我壯年時友朋數零落
零落何太蚤使我老寂寞
精爽在我心酣嬉故如昨
我存彼豈亡不翅九原作秋樵
去我久遺翰猶綽約
季子真象賢風骨見澹泊
栖栖人間世無地著哀樂
過隙聊自豪一洗懷抱惡

消寒會示同坐

蒙難靈脩久苦辛玩時愒日坐諸臣一爲孤注機旋失
再卜中興義未申江左夷吾虛想象黃圖赤縣付何人
楚囚君子吾何敢深覺新亭媿伯仁

小乙忌日

以下庚申

埋骨虹橋卽九原年年草色與愁痕浮生如夢空留傳
宿淚難乾復抱孫以大七次子畫本英雄增短氣人間
成敗動驚魂時德固戰敗小乙所畫鋒鋌休痛干將折
戰士殘骸等負冤

題張叔憲槐陰精舍夜話圖

豐潤當年氣屬天荷戈一去甲申年名流正有人微歎
轉覺王家伯仲賢

謂可莊兄弟

星海成名陵谷後樊山閱世太紛紛槐陰掌故吾能記

半向南皮坐上聞

志贊義養魚圖

寂寂瀛台晚日陰承平貴戚畫堂深埋盆作沼何言窄
中有江湖脫網心

蔣孟蘋樂庵寫書圖

鶴山全集本百卷十卷續入爲新增初聞景寫慮難竟
二年遂畢誠可驚樂庵藏書非豪舉此舉奇絕誰敢爭
平生書法有唐格親爲寫官何精能賓王借鈔益公集
宋定國寫王鈔持此較彼應齊名寒士嗜書若性命得
之吾子尤堪稱九經要義世晚見古今攷最深於經書
老章嘗爲明書欣託稿傳有儀禮宜稼毛詩人所矜
鶴山
本堂

進遺書亦未見上海鄧泰豐氏乃搜獲曹棟亭舊弄宋
本於嘉興士家海內更無第二本遂卓然爲宜稼堂
數十卷之冠何時宋槧落君手一一手寫留典型了翁有知
必相子使子精力貫遐齡

翁紹文求題錢清留別圖

居官有遺愛其人必賢者所患不好名此語非大雅翁
侯遺此圖題者一何寡初無標榜意文字殆可捨紹文
承父志仁政被鄉社棄官久避亂行已不苟且謂余卅
年舊懷抱試傾寫語淺意自深何用事陵跨

錢冲甫求題冷齋勘書圖

警石先生三十七不應鄉試爲校官道光丙申繪圖曰
海昌訓導已十年平生毫髮無外慕氣蓋一世如等閒
冷齋之冷却萬熱更以萬卷培其源中年自視藐千古

獨辨真偽誠要言文章小技在充足洮洮易盡何足論
曾侯自謂喜雄駿徒長躁氣非本根披圖至我識微意
歎歎欲壓仇山村圖記云取仇山村官冷身閑可讀書之句

王聘三十六生日

厯劫真異人脫身自憂患百年雖六十意氣未過半滄
濱磨歲月酷似弦上箭栖栖九寒暑桑海不容玩蹉跎
十年間一擊矢如願沈幾暫斂手東隅未足恨遺民漸
零落天意留好漢鬚髯猶如神佳耦得彼粲懸弧在今
朝天狼已侵且酌酒爲君盡我歌君其亂

金淮生八十生日

手寫細書沈麟士歲讀五經徐野人年年見君不知老
但覺浩氣成天真與子言孝臣言忠耄期著述猶等身

放翁八十作家訓強項端堪付子孫

題尊山谷室圖卷

吳郡張青父昔得頭陀贊尊黃名其室賦詩寄賞玩林
君得誌稿寶愛此爲冠室名尊山谷先後何輝映涪翁
過妍媚側筆頗爲患意態特欹欹於此見氣岸方我客
匄齋累月常在案人生重大節餘事及詞翰紛紛孰可
語懷愴空一歎

爲拔可題黃石齋與喬柘田手札

忠端多名蹟可敬亦可愛略觀近人藏此卷宜爲最東
洲與石洲兩跋已云備乙盦爲六詩逸韻轉奇肆我觀
書品論迂謹有殊致茂弘安石間逸少乃其次正坐書
掩名釣弋等能事學中七八乘作書特末藝豈堪溷長

者曾不辨法意作書莫作草懷素尤爲厲君實與明道
不草究何礙時人解章草黃謝若小異雲間周思兼獨
往擅妙詣行草推覺斯未老鋒猶銳未若倪鴻寶掩蘇
當抹蔡絛紳憚小楷率爾趁筆勢一札纔四行大書那
足貴又與鴻寶書持論主適媚以此攷所見言行實不
背昔嘗覩榕頌雋拔有古味樟猷與千文天壤或猶在
善書輕其書小技故可媿荆公賦顏碑語意絕相類吾
生無死所偷活視前輩猶期樹名節何用託文字

咏月當頭

十一月十五夜

霜蝕月月魂寒可奈當頭隔霧看官闕天高歸已晚
江湖夜永夢將殘未斜何礙懸銀漢自轉休疑失玉盤
白髮丹心人漸老繞枝烏鵲待誰安

余堯衢章江送別圖 以下辛酉

孝欽久臨朝朝士習苟免有國孰與守亂作蓋已晚余
公官江右民教獄未讞殘民以媚外上下色無赧余公
持不可正論獨侃侃棄官歸養母傾國徒一錢當時光
緒末名節立已罕陵夷五六年瓦解果不遠海濱出此
卷追話猶憤懣成名事亦小無補愧言遯中興苟有望
舊習當盡剗守官可矜式相對摩老眼

答周梅泉陳子言見贈問疾之作

鬱鬱十寒暑筋力殊未衰與時相消長任天非盈虧欲
聞治世術隱然某在斯羣兒覆公餗老夫甯爾欺初無
速沽意坐視世運移內熱何自來爲疽蝕吾肌沈默方
自媿刀圭從競施鼠肝與蟲臂亦聽造物爲周陳胡愛

我解慍遺新詩一歡忘所苦春日來前墀

再答梅泉問疾

河東先生作天說血氣壅底爲癰瘍天地元氣亦類此
鳥置得喪兼存亡始知人身一天地萬物變滅如滄桑
蟲生物壞極微渺此功彼禍恒相當聚則一物散萬物
彼蟲非幻吾非常造化不測豈在遠祇此七尺真昂藏
形骸理爲神明用久視却病甯無方戶樞流水有善喻
失攝致疾由疏防君詩爲我解內媿理境奧博誰與詳
入春奇煖頃又雪草木蟲豸嗟逢殃亦如殺蟲已吾患
自詭元氣猶精強欲廣天對繼子厚未克作聖姑能狂

櫻花花下作

非白非朱色轉加微寒輕煖殢雲霞春風省識傾城態

只在樓西幾樹花

初酣卯酒見酡顏出擁朝霞帶霧還著眼分明故難得
却隨塵土在人間

李建甫求題陳白陽石濤畫冊

白陽意有餘使筆若不足試尋簡遠處於此見避俗寫
生貴寫韻失韻豈足錄石濤味獨酣潑墨成濃綠風氣
雖各殊低首猶爲續可與知者道高舉凌鴻鵠

何梅生寄荔支海舟遇風遲二日始至

滔天挾驚飈傾城減風采朱襦褪輕紅濺浪越滄海勃
然聞異香知子性不改相良久摧鬱差喜平生在何人
識此味肝膽付真宰盛時雖已左孤抱猶能待老夫方
病暑進食去若浼豈辭爲一嘗渴吻終无悔

答莊呂塵朱大可

莊生頗耐寒意度殊落落朱生特溫雅可怪耽寂寞二
生皆能詩過我出所作不爲世俗語往往爲驚愕我詩
常自疑瘦澀不堪嚼將爲知己累世議苦見搏有讎緣
有黨相厄定何樂避人亦足豪閉戶專一壑

朱生咏史詩意若有所諷子意吾深了不憚獨違衆舜
文東西夷中國行一統興亡何足道委質義自重賊民
亂無極相斫絕可痛徒爲梟雄資圖霸力徐縱惜哉無
斧柯雖老猶堪用君豈真楚狂長歌亦歎鳳

劉聚卿屬題文徵明石湖畫卷卷中有張文襄
乙未十月題詩翁文恭庚子四月和文衡山三

詩

乙未秋入都常熟招一飯坐間惟恒齋

丁叔斯太史

從此不

再見

余於常熟平生止此一晤

金陵謁南皮拒客若有愠武昌復持

節樞府頗受怨戊戌翁亦去庚子成內亂山中和三詩
自喜得閑散國命難久延大力負夜半二三貴人者憤
憤孰可諫此卷誠尤物展覽歷憂患勝情吾何有話舊
且自遣

耆壽民屬題獨立蒼茫自詠詩圖卷

以下壬戌

春秋不作竟詩亡杜老無歸暗自傷望斷暮烟人未返
却疑天意墜蒼茫

夸父康回事有因觸山逐日各忘身義和弭節崦嵫迫
奈此蒼茫獨立人

題陳子言鶴柴詩藁

子言响於言其詩殊不爾吐屬頗阻深尋味足意理平生絕外慕所得遂至此俗學詡隨波當之必披靡

答周梅泉賦建茶

吳越品茶重龍井雙熏香片來燕京祁門烏龍上番舶
雨前普洱饒時名俄都塲茶近不出建安小種如瑤瓊
碧蘿春者推傾國鐵觀音若誇莖羹平生於茶非酷嗜
所聞若此誰能評巢園善病苦少睡正坐好事兼多情
詩清豈必茶所助聖俞永叔真齊盟老坡論茶忽論史
世賢張禹彼獨輕古今人物等升降我欲效蘇嚴濁清

左臂痛

壯年喜習勞不用頗自惜匆匆過六十未覺減筋力飢
餐倦乃卧恃此神以適猶能勉乘興無事滯形迹去冬

稍不快有氣阻胃膈左肱且酸楚夜寐苦反側豈甘就
逸豫屈指日月積魂夢久未甯漸使須髮白沈思若省
悟何間順與逆恒情猶在已造物詎汝釋觀化自我始
憂樂奚所擇置之成坐忘層霄施羽翼

吳淞望海

過同濟學校勝
在日讀於此

鬱鬱樓居動累年胸中正欠海吞天潮回淞市成高壘
帆落崇沙見葑田傷逝招魂須一放行歌散髮入無邊
人間善敗猶難死却爲童烏廢太元

陳叔通屬題江弢叔墨蹟

拔可梅泉皆善詩聞我說詩必稱善近日獨推伏敵堂
筆力精深語能淺詩境尤難在逼真落落江君去人遠
拔可初示缺後卷未知所終意不滿梅泉詣市立得之

異哉江君神所遣叔通復示江筆迹逸氣票姚紛照眼
詩中頗自矜其書忽來此卷手中展斯人冥冥想顛倒
急覓知音苦難緩名心未死深可哀文字沈埋誰解返

海藏樓詩卷第十

題丁叔衡畫

壬戌閏五月

世人久見輕誰歸念逝者當時相重意得此蓋已寡此
意殊不忘耿耿中難捨偶然見翰墨何異接杯竿恒齋
廢右肱左臂猶揮灑豪情晚未盡中有淚盈把曾侯感
知己風義託弓冶使我書其端愴懷平生雅

答梅泉風雨見過

地曠風號勢始張觸樓益怒轉成狂垂楊萬縷柔將絕
黃雀一羣輕自翔揮扇暫停迎晚雨披襟對坐愛虛廊
灌壇神女應相避可怪封姨戲海藏

陳邦懷室胡珏詩

少年豈知有死別悠悠歸人竟長絕畢生庸行繫人思

不待高文寫冰雪事親何殊膝下兒三載作婦未展眉
九原縱化望夫石應念人間失耦悲

九日

十年幾見海揚塵猶是登高北望人霜菊有情全性命
夜樓何地數星辰晚塗莫問功名意往事惟餘夢寐親
枉被人稱鄭重九更無豪語壓悲辛

沈乙盦輓詩

汙世安足留及尸猶一哭蓋棺事遂已相逼意何速宣
南舊朋侶志業付鬼錄唯君命稍達又際世翻覆甚弘
力違天定鼎繼邾鄆丹心豈可滅摧折遇殊酷病中加
憤慨祈死若飲毒多生證佛果難脫忠義枯百年身遽
盡千載名安屬相期後死責剝極行當復

題恭邸移居大連詩後

皇綱昔解紐舉朝噤無言二王義不從倉卒東南奔十
年極窮困賁志嗟獨存肅邸已薨膠灣不可居遼海聊
棲屯滔天亂未艾孰能正乾坤此來儻天意抱道非難
援孤忠生衆感氣類自相敦一朝事機發羣盜何足論
狂生如夸父追日愁黃昏願王慎觀變延伫依天闕

梅泉屬賦意大利石像

爲雪爲雲石欲起皎然羣姝從逼視神情凜凜絕矜嚴
顛倒搖魂自披靡負劍辟咄嬰躍懷蹴毬注睛羿發矢
寒衾虛幌月窺窗愁君獨居意難止

陳仁先屬題貨畚圖

以下癸亥

貨畚事怪不可詰意必景略所自言一餐之惠猶將報

十倍償直應懷恩治國才與孔明近澹泊退讓誰比倫
獨恨意度稍狹隘眊眊小忿何久存圖中眉宇絕矯異
於法當貴非長貧被褐捫蝨更多事奚取知己來桓溫
宋廖氏世綵堂河東集書後

草窗始稱韓柳集韓集點勘頗流傳謝山跋語又及柳
項宋得此何寂然嘗爲子京牧仲所藏東雅濟美相競出悉祖廖
氏如比肩墨光歐體忽照眼煥若神明當我前樂盒適
藏郭氏本借校儻辨誰愚賢嗟余嗜柳自童稚六十見
此非壯年猶將抱書誦萬徧纖穠簡古期華顛潘君好
古不自秘重價奚吝金累千賦詩容我題紙尾願與竹
垞爲執鞭上海潘氏以三千金得之樂盒蔣孟蘋號

題杜茶邨自書詩卷

世亂遂無山水樂十年面壁海藏樓金陵京口詩成卷
却怪茶邨愛遠遊

蝨蠹蟻蝗了不爭違人何礙負時名區區節義歸窮士
猶喜諸賢未見輕

隱几

壯懷綵筆等無靈隱几猶憐卷帙聲幾樹櫻桃花在否
春寒帶雨晚冥冥

松月居士集印編書後

少喜摹刻稍廢事介節見之戒勿爲

虞臣叔祖私謚介節

所見常

疑後者勝皖浙雖盛難詭隨近年古鉅益競出始知秦
漢猶莫追直學古人法不盡何取派別相瑕疵成邸舊
蓄號至博松月收集尤多奇我雖弃去心終喜當世苦

鐵嶺倉稱老師吾印八九出吳手樸雅視古無媿辭此
編新異又最晚風行一世夫何疑

題乙盦臨終書蹟

蹀躞意未斂沈吟神更遒九原如可作下從忠端遊

酬石遺題盟鷗榭詩

鷗榭三陳隔江居石遺士可及善餘士可健遊善餘病
石遺時時猶我俱當年武漢不忍道朋交變幻誰吾徒
寒盟於鷗復何責老我久化爲鷄鶩更營此榭傍松石
江神竊笑將揶揄與君席地尋舊夢自詡雙鳥殊未孤
傷心黃鶴去不返但見舉世騰羣狙南皮殘客今有幾
甯處溝壑非泥塗

梅泉屬題劉彥冲

泳之

臨明吳次翁

偉修

文會

贈言圖卷

彥冲貧而文養母終不娶母歿亦旋卒故友表其墓其
友江弢叔感逝詩無數乃云最善畫難見空想慕梅泉
愛弢叔短卷孰相付卷中寫人物雋筆生澹趣閒閒若
無意冉冉胸自吐絕非畫工藝祇有天機露平生輕戴
吳少見論頗誤冷冷性真語已過初不護以此思其人
賢達多妙悟江詩不吾欺得之信奇遇

盟鷗榭之北作一峰名碧雲

捫胸極坦蕩何時幻嵯峨爲山僅二仞倒影臨池波袖
中出太華夜負煩夸娥兒童盡驚倒勢欲蒼蒼摩鬼鑿
混沌竅靈探星宿窩碧雲飛未起作態猶婆娑篆文志
其脅安知非皇媧小窗學跣趺盡日對吟哦祇愁風雨

來跋扈如天魔挾山以超海老矣將奈何

孝胥以戊戌九月出京至庚戌七月入京凡十
三年有詩紀之辛亥九月出京至癸亥七月入
京亦十三年且出京皆以九月入京皆以七月
悟而嗟歎自念生逢世亂窮老無所就復爲此
詩

世棄天留等可哀黍離荆棘更能來還從銅輦尋殘夢
早向昆明辨劫灰吞炭漆身殊未避觸山逐日漫相猜
兩朝國士虛名在駿骨聊堪比郭隗

湯山行宮

神京未邱墟狐鼠遽窟穴十年玉座移萬事成瓦裂此
泉有至性不改當時熱我來豈忘敬照影久嗚咽浮雲

水中過修忽幾變滅羣松如耆舊亂事從頭說莫令汙
吾聽洗耳就歸轍沙河雙石橋鬱麗猶積雪停車不能
去悵望念豪傑聊爲洛生詠坐待洪流絕

開縣李節母林夫人詩

爲婦而無子猶以孝自名爲子而顯母何必已所生高
門重禮義節孝良易成豈知有至難蓬戶同艱貞亂世
競放誕恥以義制情相率入儇薄人紀將俱傾勗哉李
使君毋忘世簪纓

張忠武挽詩

受爵於公朝拜恩於私室大義久不明知己皆私暱將
軍懷國恩成敗所弗恤依違爲袁氏晚舉猶未失惜哉
羣疑萃一蹶太倉卒平生欠謀面忠烈感吾筆使我早

識公救敗豈無術猶當歌正氣坐待桑榆日

爲蔥奇題羅兩峯畫竹卷子

竹性勁直又瀟灑難得天機來筆下會心不遠妙能追
取勢誰如兩峯者人言善書必善畫此語似是而非也
陰晴風雨滿卷中置我已在蒼梧野

榮縣趙府君詩

榮縣趙御史告哀喪其兄弟兄過七十相愛猶孩嬰此
世真惡世此事嗟誰能憶昔光緒中天地多青蠅御史
立朝端轟轟有直聲文字絕雄麗才華極飛騰公卿徒
側目親貴誰敢撓府君方力農所居近縣城安知御史
貴惟念手足情食貧久習苦五十衣不繒亡何世翻覆
山河隨傾崩御史能自歸殊非衣錦榮解衣衣吾弟推

食食同生吾弟乃貴人豈逐惡子行吾弟乃賢人豈避
羣盜憎世途從萬變元氣留家庭御史懷才雄無用久
見輕一讀告哀辭使我涕泗零喪恥而趨時知免賴神
明守死幸自信白日非幽冥

入都車中和病山韻

聞命須爲歲暮行敢辭風雪犯崢嶸
暗鳴朔吹車初發浩蕩江聲夜欲明
憂患萬端天正醉蹉跎一老世方輕
病山此作增人氣眾濁何妨號獨清

蒲母謝太君七十詩

儉不患貧殊有味外物難奪理尤至
一生閱歷得名言高明婦人世誰比
從亂人皆託養親誣親鳴孝豈爲仁
蒲君只守高堂訓舞綵稱觴歲歲春

書言母丁夫人傳後

以下甲子

積誠能動天此理難悉究療疾旣無策刲股豈能救事
急天亦窮神識轉昏瞽謬云誠可格愚孝空蒙詬夫人
有高才智出婦女右胡爲屢出此不脫儒者陋智盡誠
乃見至行世罕覲莫疑天無知食報在其後

答周梅泉

霧雨冥濛春暗回柳芽未吐已含苔池魚久伏猶思動
石壁和雲亦漸開運會或隨樞斗轉陰寒休怯越兵來
高情誰似周居士參透天心向早梅

消寒會示坐中

雲霾霧塞不成春密雨旋風暗海濱酌酒可無迴日意
聞雞猶有戴天人未應豺虎窮吾道小集衣冠慰眾賓

只待少康收舊物期君共踏軟紅塵

答莊思緘

跳盪縱橫不足言張顛取勢出公孫甘將故技捐除盡
成就平原屋漏痕

茹蔬諷佛莊夫子自懺平生十斗才應念龍編舊歸客
猶持殘筆守書堆

又爲思緘題所藏二帖

官帖久紛紜何處尋用筆墨卿與古人相見太虛室

宋刻官帖第九卷伊墨卿有題字

既以斷爲連復以斜爲正字字巧相銜得之法當聖

陽信本草書千文

二月初五日內務府夜直

初月猶依魄虛衙欲斂陰星河天脈脈宮禁夜沈沈曙
意鴉先覺憂端蝶獨尋甯知將壓喻未盡杞人心

夜直雜詩

亂後離形更絕蹤倚樓惟覺海吞胸如何束縛酬知己
便向人間事董龍

補履千將敢自珍卅年養氣刃如新淮陰未合尸無賴
孰視真爲胯下人

謬臺厯級苦難窮况瘁終憐效小忠阿堵平生憎出口
而今翻作聶孺翁

恩遇何曾得寸酬蛾眉謠詠轉遺憂冬郎欲畢金鑾記
未必朱梁許暫留

高鳥猶難避網羅營巢幕燕意如何宮中莫愛魚龍戲

四面宵來是楚歌

忍辱懷憂志久違
朝回亦已換春衣
宣南花事何心問
開盡櫻桃我未歸

三月初十日夜直

主辱臣不憂或乃以爲快
盜臣猶稱臣大盜不以械
楚歌殊逼人耳熟亦無怪
忍能扼其吭毒螫過蜂蠆
遠臣來禁近力抗甚矣儼
夢中天壓已無助理當敗

大王事獯鬻句踐亦事吳
以此慰吾主能屈誠丈夫
一慙之不忍而終身慙乎
勿云情難堪且復安須臾

天命將安歸要觀人所與
苟能得一士豈不勝多許
狸首雖寫形聊以辟羣鼠
持危誰同心相倚譬蛩駘

仰觀鬱彼蒼星斗挂宮闕
理亂若不聞碧海行孤月
與

人家國事書空徒咄咄同舟而遇風何敢望胡越既來
忍遽去插手恐難歇倦甚可入夢暫息在恍惚

余紹宋求題梁格莊會葬圖

梁星海葬處

梁墓還依梁格莊一時臨穴比三良人生死所真難覓
未許青山戀故鄉

四月初五日夜直

仙人忍辱在高堂繞指元來百鍊鋼玉碎瓦全真好語
可堪悲壯出君王

班彪王命論猶新又過今年甲子春日者橋邊休縱語
命中終恐是遺民

祈死誰知士燮哀苟全性命且徘徊王城依舊人如海
名德翻推褚彥回

十丈紅塵日暮時
敝車羸馬欲安之
年來已自耽岑寂
却爲聞歌更惹悲

苑樹宮牆返照黃
小窗淨几味偏長
銷磨一日吾何惜
便借衙齋作道場

人間懷璧能爲罪
今日天家念匹夫
持是安歸應自省
兵戈豺虎塞前途

鄜州杜老費清才
誰信忘家有此回
獨寐鳳城人未起
一窗斜月枕邊來

六月十七日偕味荃貽書彥強三貝子園觀荷
荷香久乃聞荷葉氣彌滿初日加清涼一碧已照眼
澀甘得殊味襲人千步遠深紅絕可念風露凝未散
曲橋映高柳縱望凡幾轉雨餘況無塵渴障解舌本
神清忽

坐忘語妙涉奧衍芙蓉蓮菡萏薏字尤典生機何玲瓏造物巧莫闡從人恣諦視孰究頃刻變豈徒比木樨意會吾無隱諸君熟爾雅釋草卷試展却晒樊川文女婦喻猶淺

莊思緘秋窗感舊圖

媿室平生交子順纔數面披君秋窗圖使我懷難遣
吳初未識實重子順薦三年龍州歸此士不及見
日子初薦吳使主與君晚相得往事積餘恨九原
龍州既莫追短景豈無戀畏廬弄翰墨言外聞悽歎猶能窗
下坐垂盡勤把玩

答王逸齋

讀書不樂更論兵廣武區區易得名誰見龍川新句就

却將經濟歎生平

虎擲龍攄徧九州英雄誰肯死前休功名無與夷齊事
薇蕨空山又一秋

四月二十七日孫師鄭邀集翁文恭公生日分
韻得薦字

翁門萃時賢而我纔一見南皮頗貶翁吾意不謂善是
時帝孤危其傳先被譴大臣黨孝欽卒致天下亂戊戌
膺顯擢實出南皮薦終身不事后百折意難變暮寒哀
此老舊句在詩卷酌酒前三揖往事成積恨

答多竹山

遼海吳天黯夢魂相看悵惘更無言風流雲散吾儕在
絕愛城西舊雨軒

天壇松蓋鬱蒼蒼遺老潛來暗斷腸
便擬爲君閒放筆不知是墨是風霜

竹山求畫松

重九日曹纓蘅向仲堅邀至靈光寺登高

白日銷沈兵氣昏漫持熱淚灑中原
燕遼一戰民應盡江海橫流溺豈援
玉貌無求猶不去西山始到欲何言
殘年殘世還相對便乞餘杯酹斷魂

秘魔岩下讀竹坡先生題詩

腹痛前朝寶侍郎來尋遺墨耐思量
猶留孤女非無後縱識門生亦可傷
士氣幾時成黨錮攷翁垂老自靈光
翠微此日仍重九試掬愁腸問彼蒼

九月二十二日殘夜

四更月方午寒彩怯舉首太空洞凝碧
粲粲著星斗人

間在睡鄉獨起吾何有稍憐東方白世事信難久啟明
爾何疑光影且相守

二十七日殘夜

缺月餘半規爛爛猶至晝玉玦俄成鉤翻出太白後殘
宵袖手人不與世競走先登徒取敗無繼欲奚就

十月初四日殘夜

拆聲極分明冒寒行且擊不疾亦不徐遠去入寥閬何
人爲注聽冥漠自效力萬死趨功名未若抱關客

蘭若初鳴鐘三杵輒小止忽催東方白百餘猶未已來
日行自來爾意豈難俟牛鳴著盜中宮聲頗盈耳繁霜
被屋瓦欠伸我欲起

二十一夜

簷角長庚出未高半規霜月見秋毫胸中已是無波井
却爲雞聲起怒濤

人間倚伏可推尋急却翻騰理最深石爛海枯誰不滅
爲君細說落星心

多竹山屬題澹庵圖

養心莫若澹可爲知者道利欲苟薰心神智必盡耗熱
中滿天下學者尤淺躁平生吾竹山行已有殊操密林
置小軒飛塵不能到猶餘文字業捨此無所好偶然來
舊雨默對即深造祇愁意非堅出戶還媚寵

十一月初三日奉

乘輿幸日本使館

陳寶琛莊士敦從幸德國醫
院考胥踵至遂入日本使館

乘回風兮載雲旗縱橫無人神鬼馳手持帝子出虎穴

青史茫茫無此奇

是日何來蒙古風天傾地坼見共工休嗟猛士不可得
猶有人間一禿翁

附日記

十一月庚戌朔 共產黨散布傳單及平民自治歌又反帝國主義傳單各數萬張辛亥 西報言馮玉祥將爲第三次圍攻北京之舉

召對命速覓屋

壬子 弼庵叔言來密告弼庵曰事急矣乃定赴德國醫院之策 午後詣北府至鼓樓逢弼庵之馬車曰已往蘇州胡同矣馳至蘇州胡同無所見遂至德國醫院登樓

上徘徊窗下獨弑庵從告孝胥曰莊士敦已往荷蘭
英吉利使館張文治奔告醇王且復來孝胥請
幸日本使館

上命孝胥先告日人即訪竹本告以

皇帝已來竹本白其公使芳澤乃語孝胥請

皇帝自決行止於是大風暴作黃沙蔽天數步外不
相見孝胥至醫院慮瀟車或不聽命議以

上乘馬車又慮院前門人甚眾乃引馬車至後門
一德國人持鑰從一看護婦導

上下樓開後門登馬車孝胥及一僮驂乘德醫院
至日本使館有二道約里許一自東交民巷轉
北一自長安街轉南孝胥叱御者曰再至日使

館御者利北道稍近驅車過長安街

上驚叫曰街多華警何爲出此然車已迟馳孝胥
曰咫尺耳馬車中安有皇帝請

上勿恐既南轉至河岸復啟

上曰此爲使館界矣遂入日本使館竹本中平迎
上入兵營弼庵亦至方車行長安街風沙悍怒幾
不能前昏晦中入室小憩

上曰北府人知我至醫院耳莊士敦張文治必復
往尋宜告之孝胥復至醫院醕王濤貝勒皆至
因與同來日館廷臣奔視者數人

上命孝胥往告段祺瑞命張文治往告張作霖歸
作函使禹致之入夜風定星斗滿天 垂禹至

日館進奉果餌 日本公使芳澤以所居大樓
三屋爲


上內寢 隨侍僮李體育十四歲 御者王永江
車右王小龍

海藏樓近刻詩序

海藏樓乙丑至丙子詩刻成遠寄授讀且索題一言記
不佞學爲詩始於龍州軍府奉海藏先生之教海藏爲
詩之功力豈淺學所能道顧向亦未嘗索題今此索題
無亦以不相見久舊遊離索有感於心乃有此諉誑歟
敬題二絕句復之云詩人擁節事專征仰視飛鳶瘴海
行三十年前舊賓客微吟親見塞塵清羈縻勤勞得鬢
霜蕭然無改舊行藏人間若訝今殊昔惟有詩篇老更
蒼旣而得海藏書以爲不悖詩意然仍以序言爲督念
舊之意何其厚也憶龍州入幕時海藏出初刻集相授
其時邊亂大定不佞窺邊事竅要作旁記若干篇行世
世以爲有當於治邊弭亂之綱領與昔人侈張戰伐以

草薶禽獮爲功者不同海藏援功成身退之義累疏求
去驟不得請意頗鬱鬱形於咏歌不佞指詩集開卷第
一首中一聯云三十不官寧有道一生負氣恐全非戲
問海藏今日之求退不得與十餘年前未出山時語氣
相較何如海藏謂出處之故情隨境變未可執也獨負
氣不自謬耳今又閱三十年前言尚可理也又憶前數
年海藏有刊落風華之意謂將不作近體詩今讀近年
詩雖危苦有甚而風致流美無老手頽唐之態然則才
分有定愛好之結習與負氣並行所行皆負氣之事所
作亦皆負氣之詩負氣之事之果爲是非將付難齊之
物論而詩則當世固已無異詞矣詩中於龍州相處之
人亦常往來於海藏之心目此又以集索題於不佞之

本指也丁丑孟夏孟森書於舊都厲次



海藏樓詩卷第十一

王雪澄八十詩 以下乙丑

節庵縱談微近佞南皮不語常凝聽一言中肯絕非阿
坐客論人君獨勝當時量吏迹太驕士夫氣節已寥寥
羨君八十真好漢指日中興更杖朝

袁母唐夫人八十壽詩

命婦豈能忘國忌袁氏一門知禮意士夫或不避御名
風義人間真掃地畫戟森森燕寢香尋常歌舞遠高門
銀花火樹稱觴夕好向君家慶上元 正月十四日生日以
忌辰改十五日

嚴氏三耄耋圖

瓊道揚霞舉八十父祖存其父百二十名曰楊叔連祖
名曰宋卿百有九五年奉使李守忠太平興國間邀李

詣其家遠祖鷄窠仙狀貌若小兒數代在一門事出洞
微志殆非無稽言吾披嚴氏圖奇事嬾昔賢夫婦必偕
老異稟疑由天子云仁者壽豈非人事焉養氣兼積善
可使生命延久生閱世亂空思太平民

櫻花

施朱傅粉在高林光燄旋看曉日侵誰念崇桃成野燒
龍華花事不堪尋

去年龍華被
兵桃林盡滅

坐忘

踈踈過雨濕長廊微倦拋書欲坐忘暮色平林深爾許
却留高柳染斜陽

九日天津公園登高復過李公祠

踈林亦解縱秋聲堆阜填胸故未平如此登高元失路

何須感事任孤行
兵戈豺虎天休問
羈縻君臣世所輕
四十年來老賓客
荒祠猶愴夕陽明

十月初十日貴州丸舟中夜起

海上有孤月流光徧人寰
世人不知敬謂月光以寒獨
有愛月者中宵起盤桓
願從月入海萬頃輕波瀾
月光受之日造化良無端
乘時復爲日舉世方驚看
哀彼無知子狂迷在其肝
孰能迴日月愚智還相安

贈周立之

二十年來周立之
休提往事只論詩
胸中涇渭誰能測
皮裏陽秋竟自奇
亂後獨愁歌舞散
興闌還與海山期
天津橋上重攜手
不飲如何作酒悲

士夫二首

文正利己而損人文裏抑人而揚己惟有益陽真可師
肝膽照人古無比士夫排擠習至陋心地塵汗欠磨洗
不求不忤如此難先行其言竟誰是

世人扼腕誇改革破壁奮飛孰能測奔馳舉國若顛狂
富貴儻來果相逼都將此事讓年少默撫頭顱獨歎息
老翁竊喜郝嘉賓欲覓揚風安可得

磨墨

盥漱衣冠只四更慣將磨墨遣閒情不辭漆黑休燈坐
磨出窗間一日明

李景林討馮玉祥戰於楊村大破之

李紳

世固無忠臣孝子亦難得孝行天所佑神鬼助破敵天
津四戰地無險焉可搯置陣當通衢雷部隨指擊賊來

碎於此駢死若山積元戎整以暇將士自盡力逆豎貫
滿盈天道所必殛號爲名教戰論者猶歎惜一朝收京
師何人能草檄

郭嘯麓招飲齋中

亂世能全不易哉羨君槐國夢初回詩餘小綺寮爲累
酒半微狂亦已衰短榻移來書枕藉虛廊行處石崔巍
平生詞客饒相識却爲斯人惜霸才

十六曉月

鷄待五更能一叫鶴知夜半不須眠沈吟送盡西窗月
回首東方白竟天

奉

勅題錢選觀鵞圖卷

海菴題詩十一
三
仰止乾隆感慨多應天法

祖道如何家鷄莫泥山陰體筆陳中興有鸛鷺

周立之目送歸鴻圖

當時吐氣似長虹情感中年入苦空莫爲張羅更惆悵
驚鴻回首是冥鴻

老胡

老胡行賣餅發聲如長吁必有家國恨變形爲販夫北
風揚市塵冰雪懸髭鬚勞瘁曾不避似非求全軀燕趙
多奇士豈皆藏狗屠眾中試物色支離唯迂儒中宵起
待旦日出趨路隅自哀且相念吾其斯人徒

題徐又淑女士畫蘭

婀娜秋蘭纔數筆無言自有暗香來不書名氏知何意

相念隔年能一歡燕市久留增朔氣密林小坐戀春寒
眇然人物君休歎戮力猶堪犯至難

和琴初張園海棠詩

一年影事又天涯春去空令睡思加衰朽敢期逢絕艷
沉吟終欲表孤花怕寒驚雨頻呼婢銜子移根莫念家
暗憶錦官紅濕處昭君端不慣胡沙

用郭春榆韻却贈

匏庵詩思浩無涯強韻連篇力有加妙手天機元吐錦
高枝老樹自生花興亡過眼論朝士掌故羅胸剩一家
他日從君詢舊事欲編猿鶴記蟲沙

庸庵尚書七十生日

五月三日

黑頭幾人膺重寄投老海濱能避世不教子弟逐時流

易代誰堪匹高義花近樓中十五年年年詩卷積憂天
鬚眉如畫心情在暫許歌聲到酒邊

短狐

射影含沙見短狐高明懸的亦非夫紛紛魑魅爭光者
頗解虛堂息影無

海藏樓夜集

海上無山可似歸登樓詩卷暫相依投閒轉覺憂危集
行意誰令去住違俱老人書真是業孤吟松竹自成圍
今宵招得春申月欲爲知音論見幾

食菜尾羹綠豆澆飯

鷄子調黃嫩似橙芥根縷切不妨生會心正在酸醃外
一啜聞中菜尾羹

似爲騷人惜露才

文心雕龍神騷篇班固以爲露才揚己

人日初樓宴集分韻得啟字 以下丙寅

乙酉津遊主羅氏尺盦幾道善談理移居幕府繞數月
唯有晦若共卧起四十年来歷千劫今年度歲乃在此
虞淵寒日幾追隨徒抱殷憂思有啟人日初樓能召客
一時避亂多名士回首前塵湧萬哀羅嚴李于並爲鬼
眼中之人吾老矣世難滔天何所止酒行舉坐各悲歌
陳郭詩翁誰敢擬

謂張庵春榆

固始吳氏家誠卷書後

介壽稱觴俗所同長言勸誠見家風人生只有思親日
莫付良辰樂事中

孫母蝶異

昔人夢蝶喻其適雙蝶何來伴易簣靈真脫繭欲飛揚
想見離塵生羽翼一念修持八十年好生積善貫華顛
極天兵火無邊劫不礙逍遙是散僊

柳墅公園

三月十三日

十日一風市塵起霾沒花枝尚餘幾河東聞有舊行宮
新綠成林翳春水誰憐繞水數千樹以密勝疎殊可喜
縱步回看始覺深光景蔽虧度寒暑我知惜林不置屋
但設木榻供小止莫教繁華奪野意見地甚高極有理
入林入山必同調孰能解此非俗士日斜未去爲茅亭
歸鳥啁啾忽盈耳

和病山韻

江左非無導與安清談未可制諸桓不辭浮海成孤往

憎濃喜淡理誰參
舌本薑腥漸不堪
綠豆冷淘澆白飯
何如菜蕨苦中甘

秋風

終老樓居意不移
辭樓浮海又何爲
流亡未必人能重
喪亂端令世見遺
仗策初心空鬱勃
探囊餘智奈衰遲
滄波萬疊秋風起
惟有盟鷗識所之

廿九夜四鼓作

冰簟銀牀暑未收
時看螢火墜高樓
明河儘向西南瀉
一夜金風萬斛秋

梅笙邀予及垂禹二子遊環龍路公園

厭看華屋喜山邱
蕭灑誰能從我遊
藉草林深堪卧起
過溪石好任淹留
已知魚鳥親人意
坐領江湖落木秋

來日掛瓢還入海眼明應付接天流

燕台舟中望玉皇頂

七月初六日

青山積恨人何在逝水添波海更深此海此山誰記得
斷魂殘夢欲相尋

贈息存

王髯八十趨行在義膽忠肝氣一伸際遇不應關顯
達艱危何意契君臣能貧遲暮真全節忘老襟懷更絕
倫地下張于必惆悵中興耆望付斯人

張文襄于中丞
蔭霖皆君舉主

息庵招同泛舟佟樓至八里台

蕭然放棹入秋陰得意秋林爾許深雲水光沉波漸遠
蒲荷氣重暑難侵低飛羣燕如閒客彌望高樓亦暮岑
一片夕陽紅到岸莫將塵夢換詩心

曹汝霖母周七十壽詩

棄產求學誠嘉謀約已廣施非常流名言正似儒者語
不爭一日爭千秋古稀康強天所報親朋交口稱母教
侍郎舞綵定開顏曷不從容問移孝

卓君庸自青榭詩

在玉泉山麓

西山駐蹕想當時處處園林竟付誰萬壽玉泉雖僅在
元都紫陌已來遲坐君水榭饒詩趣對我宮牆奈酒悲
懷玉名亭應最稱相看被褐志難移

卓宣謀求爲四十歲詩

老去久蒙天下謗回憶四十真少壯乃索我爲四十詩
意氣畏君正豪宕立名立德未可量奉親日永趨高堂
交遊滿坐將進酒任俠何人識熱腸

九日召客集李氏園登高

閒却西山那忍來登臨正動九秋哀憂中有樂難忘酒
老去行吟苦費才兵氣入南天不弔太微移舍世空猜
一丘一水饒蕭瑟儘戀斜陽晚未回

行嚴揖唐纓衡次公見和重九詩

垂老從亡者知爲舉世非諸公胡不棄異趣或同歸好
亂猶難止當仁孰見幾沈思言外旨相感入精微

李園

蘆荻似江鄉迎寒花已霜一亭傍秋水數客語斜陽漸
遠雙鳬靜孤橫小艇涼不嫌寂寞味來話水西莊

將赴天津

羈旅心知異守官暫歸猶覺別家難看花隔歲休驚老

投袂臨歧敢避寒婚嫁粗完身可去兵戈間阻事無端
小窗短榻裁容膝誰作高樓百尺看

十一月十七日四鼓翫月

落月好顏色東方殊未明徘徊若相顧欲逝轉含情殘
夜成元賞祁寒見獨行此生如此已誰與惜平生

補作城南觀菊酬侗伯息庵蟄雲

黃華爲鞠義無改乙盦引經依古初淵明佳色乃正色
自黃而外皆可誅意嚴獨抱春秋法此法評菊真迂儒
海濱歲歲菊尤盛絢爛平淡態各殊南推揚州北燕市
門奇誇異良可吁疎針闊辦種數變謬造名號堪笑娛
津沽稍蚤江南晚穿街聯袂來吾徒縱觀指點興未盡
返舍弄筆規韓蘇乞歸一月繞籬下却避雄作艱追趨

移盆隨意淡相對何用高論爭區區

述菊二

夫容木樨不足言海棠冷媚愁娟娟金風西來菊當令
坐使秋氣司乾坤花繁種奇態百變緋褐紺紫紛盈園
爭新絕出墨與綠漙醺凝黛埋株根黃者粲金白沃雪
眾色歛避難周旋長廊曉日花圍坐穠香襲寐酣而溫
古人定未得此味詩句寥寥餘寒酸却疑此花不宜詠
愛博轉患情非專誰能刻意出新句關心黃菊吾豈然

述菊三

秋深氣悲天欲霜荷枯桂落晝始涼籬根百本葉轉盛
吐葉未破先含芳園丁辨類若指掌千百不爽何精詳
奇姿異色窮意態風馨日耀隨低昂濃者非肥澹非瘦

逸者疑狷踈疑狂孤花單枝足諦玩傲兀不屑脂粉粧
風懷洗盡愈跌宕如對高士談滄桑一春紅紫絲管賦
解穢羯鼓殊慨慷會心庶爲知者道自怪秋氣歸詩腸
郭嘯麓求題其祖遠堂中丞手寫十三經

舉業銷磨官顯達畢生何時得暇日精勤首尾知幾年
篤學恒心信無匹棚樓避地抱遺書朋輩驚服還嗟吁
背經瀉水初就傳老我梯雲憶舊居余家梯雲里伯叔
諸兄多以點五經
七經捷童子試而新雅先兄以九歲
點寫十三經達泮左文襄大驚異之

夜起庵雜詩十六日

望前及望後未曉見月落明鏡斜入窗可愛伴寂寞連
宵光漸縮半規尚抱魄一瘦成蛾眉悄然傍簾幕吾齋
不施燈幽若在巖壑夜起定何心無心亦無着

二

昧爽趨行在二年如一日我心非有求吾道實於一持是將安窮前途黑如漆暗飛能自照宵行亦奚失

三

息庵阿所好賦詩必龍州龍州我方壯短後經三秋邊民幸安枕將士和無尤興學乃吾罪肇亂終難收彈指二十年滄海方橫流所學作何用徒為知己羞

四

曉出雪猶微須臾飛漸密仰觀若塞空橫鋪路欲沒樓臺頃自明高下同一潔旋風俄焉起眩轉益飄忽浮浮儼簸揚作勢穿牖闥向晚如小衰竟夕乃愈烈詰朝互傳語尺許久無匹宣統三年春元旦差相埒中間十五

載喪亂鮮可悅意者其休徵相看還咄咄

五

溘于諷子與嫂溺援以手避嫌忍坐視毋乃君子咎以
道援天下其義在不苟徒手將何施行權豈可徃枉尺
而直尋逆取而順守本原既不端詎免天下詬

郭侗伯招集寒碧篴爲東坡作生日分韻得遊
字

寒碧篴中降蘇日郭君置酒集名流斯人已若鶴孤往
千載何殊貉一丘鉤黨莫談元祐政清吟聊比月泉遊
蘇齋卷裏衣冠客誰信新亭似楚囚

張庵出示
蘇齋圖卷

人日進呈三首

以下丁卯

豎子亂中國適爲英雄資英雄何足道賢聖難同時

皇清昔御宇湯武其庶幾三王家天下家法孰逮斯戰
戰以兢兢十朝迄今茲辛亥綱紀絕大臣爲姦欺傷哉
億兆人投畀虎與貔剝極行當復天道美所疑

二

我

皇實英武明斷由天授銳意廢中官微行脫狂寇處約
能自宏知新兼存舊隱然恢復氣河源出星宿漢武乃
中主仁義如黼黻不思戢多欲汲直豈能救秦王方十
八龍飛年亦富苟知矜細行孰敢議童幼本朝法至嚴
極盛難爲後舜禹誠可師一洗漢唐陋

三

舉世丁文敝夏道宜尚忠爲臣良獨難所習利與功嗟

彼東周後異端久爭雄丘軻道不施千古多妄庸天開
地將闢孰能當其衝浩氣塞兩間黜明且隳聰一介不
取與聖任在尹躬愚暗空欣慕衰遲得固窮用舍亦何
心沈冥老書叢

答周梅泉

厄窮無悔感知言不待巫陽更問冤投老嘯歌空自遣
餘生心膽向誰論樓居相望添詩卷花事頻年檢酒痕
却笑津沽久留滯媿君高卧道彌尊

十五夜看月落

殘宵孤坐將何待暗裏流光亦可驚夜色蒼蒼收欲盡
却看墜月入天明

雜詩

三月廿五日

去年未見花今年歸非早留花若相待寒雨兼可惱殘
妝偶映日一顧殊草草雨中已堪憐放晴花又老傍簷
復臨池二株稍媚好因寒却成瘦含艷奈微縞盛時嗟
非盛墜片忍遽掃

一月凡幾日默數我將去缺月漸如鉤徘徊惜向曙友
朋見不易簡要擇所語家人話稍繁懽喜若初聚小別
雖甚慣世變良可懼共誇吾未老自省入遲暮檢書且
拂案莫動起坐處秋風我復歸此景還成故

四月十一日唐山丸舟中

東趨正見江流盡北顧膠灣玉半環欲向蓬萊尋左股
却臨渤澥照衰顏禁方誰信老不死樂府空歌往復還
來日抱書依草莽埋頭試養氣如山

海中峭立孤峯舟過其下十一日

破巖如頽墻突兀立窮海群鷗舞驚濤墜日射寒彩有情必見賞終古誰能待桑田定何時滔天爾猶在

王忠愍公國維挽詩

河清難俟濁難止留得昆明一湖水能令湖水共千秋
節義何曾窮此士泰山之重鴻毛輕天下孰敢輕儒生
雲中袒背受戈者誰信由于有不能

五月十三日萬公雨招飲張氏別業步原韻並示同座

莫話蓉城石與丁試招彭澤賦雲停十年閨位憎蠅紫
終古丹心弔汗青悵望虞淵迴落日飄搖便殿勸長星
朱門鸚武猶關鎖欲乞田橫死士靈

座客皆丁巳復辟諸人是日即丁巳

御殿
之日

示伯平

流水不腐理為至行己之道固無異一生乘化同所歸
輒苦形骸作吾累區區攝生何足言所可言者唯養氣
六十始知氣猶水不舍晝夜逝非逝配義與道終不衰
安用養形等兒戲伯平頗究攝生術仁靜名齋得深意
躬行積久必有效所患淺嘗俄復棄樂山樂水性豈殊
子果見仁吾見知

李星冶師輓詩

六月十八夜
卒年八十二

門人雖亦老彌戀授經時異語兒嘗說溫顏弟共窺何
曾見衰憊私意望期頤稱壽文無隱憑誰論事師

苦熱行

六月廿九夜

人言日中有黑子太白白晝吐光芒毒熱十日果不解
脆嫩勞瘁紛死老夫日出趨行在雨汗說書能安詳
小樓床榻皆炙手閉戶獨坐真探湯冰如羊脂瓜翡翠
意表難釋同渴羌或稱竹篷可避暑我謂掩鬱終非良
昨宵視天起殘夜風從何來徐褰裳銀河西流斗北挂
海氣倒瀉侵肌涼飄然仙去不可執瑤池瓊闕生肝腸
揮手濁世便輕舉取取微月猶相望

七月二日偕查峻丞郭嘯麓唐立庵刺船森藪
水光映林林掩水隱約扁舟沒葭葦一往離披數愈深
水複林重凡幾里孤亭瘦塔常在望再轉三迴猶可指
豁然人意與雲平疑有秋聲撇波起

胡琴初五十詩

璋不足謀凱自敗張公孤注尤堪慨胸中劍氣貫牛斗
五十未衰猶故態老謀長慮人豈知識者以比胡潤之
為君舉酒酌太白莫怪殘月還相疑時太白見

瓜爾佳惠興女士事略書後

任事求其濟事敗必死之致死乃不敗用意烈且奇以
名名其事感人何若斯匪同經溝瀆豈曰兒戲為夫人
舍其生復能舍其兒金侯有母風忠義當自期舉世輕
忠義吾意將語誰識者取吾語世難猶可夷

磨墨

半池秋露起元雲宜與幽人伴夜分湛碧凝香徐作暈
鎔脂轉玉靜無紋神遊物表心誰契手挹天漿意已醺
磨墨磨人更休問憑將瀉酖入深文

偃月廳

張園傳達處形如半規因號之曰偃月

帝座真看致客星殺機天發幾曾停西風又作新涼味
閒煞三秋偃月廳

王可莊夫人八十生日

忍盦館我斜街日親見事親共賢匹留得憂天杞婦心
隕及宗周更奚恤八十持門健實難兒孫繞膝競承歡
海山縱遣稱觴隔却感平生酒未寒

九日

西風欺我又三秋抑鬱猶能隱市樓不飲而狂應勝醉
違人誰伴亦成遊元龍用九曾何悔旅鴈隨陽豈自謀
見說戰場叢菊在歸心一放忽難收

王逸塘五十生日

逸塘用世人五十居閒地豈無髀肉歎自詭時未至時
至當云何奈此囊底智控弦雖不發天下識猿臂世途
無萬全欲取宜有棄以我之下駟當彼之上駟一敗而
兩勝老算得深味中年惜精爽勿使疲人事孫武誠難
追孰能比田忌

青島

十一月
二日

昔我遊斯島于今十八年興亡空復爾桑海故依然林
氣猶吞日濤聲欲問天勞山信堪隱獨憶抱經賢

勞王初尉

禮賢嘗講
經於此

萬國公墓

日本德意志戰
士共葬於此

逝者如斯耳空山石像哀殘骸終共掩毅魄恐難灰悵
惘二三子沈吟歸去來受辛誰幼婦情恨滿蒼苔

有西人墓

其華婦碑
語特痛

楊味雲壽枏求作貫華閣詩十九明

容若無雙士梁汾一世才交期緣未盡冥感夢還來巖
壑懷遺韻精廬問劫灰多情鐵厓老手爲闢蒿萊
題扁雖難覓荒庵故可尋林開峰自掩闌曲閣能深僂
作名山主仍編白雪吟詞流重風義應契昔賢心

曹纓蘅味爽見訪

中夜起待旦初非欲人知好我且信我可感孰若斯昧
爽聞叩門是子決不疑歡笑苦未足促坐同啜糜我室
雖云邇里許勞奔馳來時肝肺熱去時懷抱怡氣類喻
針芥聖者難言之持此默自訟無端殆兒嬉豈同訪戴
人興盡情遽移

夜起既有年斯道良可久頗同獻曝心願以遺吾友晦
明轉移間造物露樞紐人身小天地吐納等難朽清明
常當令昏情詎能糅神完形不敝聊用卻老醜死生雖
繫命操縱或在手終時幸無疾何必千歲壽

元日頒賜

御書大吉春條

以下戊辰

奉天惟一大勝怠取丹書吉語元辰降休徵獻歲初墨
華光已耀筆勢意能舒

聖學從容見群情感慰餘邑緬資夏靡興楚待由胥拜
賜空慙愧

微臣

志未據

羅叔言求題所藏楊凝式韭花帖墨蹟

初五日

楊風異人不可測書味淵深見殊力取徑頗難意頗賁
猶是唐賢舊風格石齋論書尚適媚甜滑相尋苦難避
山陰未免俗書譏飛鳥出林誰可至

徐石雪求題文與可雪竹款曰笑笑先生作

雪氣堆山山倒壓竹不見枝裁見葉若使風來一動搖
必碎玉龍散鱗甲與可胸中窮竹態借墨寫真墨猶濕
人間一笑近千年識者何人況能及徐君世守失復歸
我懷此君忽相接

栩栩樓燕集賦文山蟬腹研石齋斷碑研

入春轉寒雪彌日杯酒端宜試詩筆金石書畫藏競出
文山石齋研無匹題襟館中嘗竝列今爲郭君章君物
摩挲咨嗟腸益熱文采風流各殊絕浩氣入石涵碧血

想見難回經百折功名不終終義烈事業縱隨論忠節
吾儕相顧愧孱劣俯仰高齋損心骨

聞笳正月七日

樓窗未白已聞笳舊夢驚回失歲華短後荷戈心縱在
南冠挾策計終差相從休比龍雲逐一往空愁馬齒加
揮洒推敵吾事了不妨斷送冷生涯

卓君庸求賦柳梅詩

綠葉青枝人共識詩老何曾識梅格細看非柳亦非梅
點染春光弄顏色淵明君復一世豪攀條折枝空相高
老夫與汝平章了笑煞庭前夾竹桃

東坡詩云詩老不知梅格在但看綠

葉與青枝謂石曼卿也

又賦

東坡愛梅有神契竹外斜枝稱更好梅幹愈勁花愈奇
此意可為知者道都城花市得柳梅文士紛紛逞詞藻
柳枝柔弱無風骨忽綴梅花堪絕倒却疑對梅不解賞
深淺自呈見懷抱勸君一證歲寒心莫怒狂言被花惱
薊若木求題寫經應瑞圖

暗室何來射明月映澈秋毫久方滅若非發自案上經
毋乃吐從筆端血寫經人往血不枯造因得果理豈誣
鼓盆未信莊生達歷劫猶應看畫圖

李厚基求題所藏李星野先生書冊

強項當年懾萬夫食貧晚歲溷泥塗故交遺墨空惆悵
氣盡傭書李望都

萬公雨求題畫狗

得雋徑竄誠智矣搏噬跳踉何所為旁觀矜寵且宿飽
怪爾相厄無已時子於何處得此態曲寫盡意毫無遺
往者不諫莫惡劇來者視此猶可追

二月初六日進呈二詩

皇清二百七十載惟以早朝治天下東周以降誰能及
文武成康此其亞人存政舉更不論家法百王自陵跨
我

皇出狩雖在外治術精研逮閒暇一朝復辟貴有備嘗
膽卧薪無日夜苟能求衣仍待旦銳氣已足震華夏情
慢邪僻期盡除當使周宣避三舍

寬則得眾理不易居上不寬何足觀明察謂能別善惡
察察為明明亦昏知人善任古所重用人不疑乃至言

有天下者視其量意度闊略爲本根

聖資聰睿願勿用涵蓋天地蘇元元此理至深孰能解
責難敢以陳

至尊

和釋戡元日韻仁胡日

窗下談雞老不晨夢中無患亦無身來遊世外逃虛世
真作人間失路人秦令肯容李斯客新朝難逐子雲貧
繞梁一曲憑誰和應待歌聲與暗塵

閏二月十日中午照以微疾卒於滬寢携景垂自
青島航海十八日到滬

啓棺一視真長訣面色如生識汝哀四十九年緣頓盡
不留十日待人來

傷逝

偕老亦既老所欠唯一死先行子不憚繼往吾何餒小
別良可哀顧此堂下晷叩棺幸未闔累喚甯能起素衣
空輯杖雪涕隨逝水相從五十年十日靳我埃茫茫望
前路目極天與海

入室日已晏離魂在此榻冥追試就枕藥氣猶繞頰中
宵影隨形徙倚還蹀躞吞聲端有失苦淚空凝睫心知
成永訣未免戀一霎我如夢爲周君如夢爲蝶

去年菊花時廊下偶攜手花前憔悴人悵然若難久當
時苦無覺輕別將誰咎一悲悲何窮倏忽餘鰥叟

二十夜

我如夜啼鳥繞枝覓其偶斜月忽侵帷定是魂來否追

尋竟何得遺像空在手東方未遽明默坐復良久

廿一夜

雙枯方競翠東枯忽自枯哲人嗟其萎不祥理難誣自
我羈行在花時歸相娛今年來何晚遇閨緒就途病中
空悵望別語一字無及尸豈爲見終古纔須臾

廿二夜

斯人夜不眠曉帳必猶寢披帷無所見旁皇此爲甚几
榻毋輕移起坐素深諗頗疑接聲歎髣髴氣微凜平生
太常齋如泥恨空飲

廿三夜

死生雖云隔豈能隔吾情吾情無生死一意通幽明新
魂必迷罔自痛離其形旁觀骨肉哀慘悽倍於生生者

能為主依戀終相縈生者苟漸忘無歸愈飄零委形如
爪髮朽腐難爲靈聖人識情狀致齋極精誠立尸而後
祭何疑於禮經

廿四曉

哀情易傷春飛花正如雪花前思往事無處不悽絕昨
朝花始開今日花將歇我雖非落花彈指必俱滅逝者
固已辭存者行漸別眼中親愛者一一愁見奪與君永
今朝爲予誓皎日

廿五曉

人亡月半規今夕已下弦碧玉指甲餘恨何悽妍蘭
干誰復倚杳杳遂長眠我爲夜起翁殘宵獨周旋聊堪
伴孤魂莫言死相捐

三月初一曉

兒女失其母嗟號不欲生我固無以慰朝夕纏哀聲出門暫棄置入門復屏營滅燈人定後銳意趨幽冥鬼神乃餘氣未若人所能冤抑或爲變居常終無靈亡者果已矣何用期遐齡

初二曉

死狀即若寐熟寐元無知有知無知間誰主此可疑生短死則長死安生甚危聞道可夕死既死終焉歸無知信無涯有知能幾時莊生與釋氏母乃皆沈迷

四十九年以來同居之宅約略記之初結禱於南京馬道街合肥試館於復成倉四條巷於廬江黃泥河於日本東京永田町於神戶理事館於南京

教數營縣俠營於上海壽椿里於武昌大潮街水
陸街楊泗堂於漢口鐵路局於上海再居壽椿里
於龍州邊防督辦行台於上海圖南里謙吉里白
克路於北京石碑胡同於徐家匯虹橋路於湖南
藩署於上海南洋路於北京西長安街頭條胡同
於松公府夾道戊辰閏二月初十日酉時終於南
洋路余與景垂二子十八日始至上海叩棺一見
面色如生壽七十二歲余六十九歲矣

初五曉

回首相從五十年真成一夢送華顛他鄉久客姑埋骨
苦調孤彈更斷絃此世人無勝天幸未亡我乃讓君先
誰知夜起庵中客夜夜驚魂落月前

三月十一夕

癡頑可是癡人間死別猶傷去不還漸悟餘生元易散
盡成往事杳難攀子遺豈識天何意磨折方愁老益艱
却道明朝又生日莫將情況問初鰥

十八日

人死斯相惡無能斯相背禮弓亡者豈遂亡存者良不
義家人頻入夢處分到細事簿錄一翻閱使我湧酸淚
餘財雖莫用月廩誰能廢他年稱所蓄聊爲完遺志子
亡我猶存勿患終難繼

西本省三挽詩

親受尚書乙盦叟共尊

聖祖海藏樓商量志事春秋

在欲仗先生訴九幽

嘗從沈子培受尚書箸有
日本文康熙大帝一冊

程子大頌萬鹿川圖

黃鵠臨流天下勝漢怒江哀誰解聽盟鷗謝沒不堪尋
此閣相望若相競武昌一亂由弄兵使我在湘鄂易平
鹿川詩老天留在他日重來話抱冰鷗漢口余所居曰盟
望相

日本渡邊晨畝求題所畫孔雀展屏

手張孔雀惜鬚鬚此畫曾過夜起庵且傍寒泉避牛觸
徘徊吾亦厭東南

旁觀一首

當局固無覺旁觀亦自疑難言天下變未信老夫知囊
底智何在周餘民偶遺後清三百載聊與彼蒼期

答郭筱麓

子詩泠泠如暗泉非行非止聲鏘然每過吾庵必有作
此庵與世元無緣道人庵居復夜起冥行萬里無人煙
賦成自書用草隸偶出小技驚時賢豈知遽已入詩語
妙借老醜增姸胸中抑塞未能和容我小緩調哀絃

五月十七日

子藏不復見萬事已云畢我如魂之遊猶然視白日幽
明均一逝何者爲真實一棺已入土餘地足同穴地下
恐無知生存獨難別行時畏回顧掃榻留虛室去來定
何歸故歌聊作達

十八日

達者失之弛不達多所憂達與不達間君子必有由使
我務棄世存亡等浮漚一切置哀樂木石渠何求有生

依仁義百年殊未休春蘭與秋菊情感終相酬

述隸示陳六句元

禮器超詣含高深史晨淳熙法易尋石門彫踈華山密
閎博蕭括惟蕩陰意理古淡若西狹樊敏難遇懷蕭森
漸方漸厲氛甚惡降及曹魏如寄欵墨本摩挲疑莫釋
一玩墜簡如生擒自流少墜簡出洗墨本之千年無隸
殆欲絕東都作者誰知音墨卿援叟粗可語筆驕意狹
空相鍼積之已久或有得子能起予勤摹臨抗顏舉世
孰矜式當風殊快聊披襟

偕郭侗伯周立之郭筱麓登中原高臺

漸沒樓臺海氣荒倚闌猶及送殘陽碧雲合處燈初上
秋思來時缺已涼攀塔踞天天亦醉促絃鳴夜夜非長

人間那得安心地纔信人間是異鄉

丁澄如求題忠義永肩圖冊

明戶部雲南清吏司郎中鄭爾圻上書請築
思陵圖

長陵一抔土臣子不忍言誓天有大恨神鑒惟孝孫聖
朝禮三恪至仁動乾坤孰能展此圖天道幽難論

岩田愛之助俱遊圓山公園入長樂寺訪賴山
陽墓

春秋空抱尊王志未有山陽史筆功破曉穿林來一揖
暗愁文字掩英雄

八月十二日雨中遊宇治川

雲光掩山萬松靜雙溪鏘鳴碧流迸過橋愈覺諸峰深

竹榭臨流據其勝雨中默坐意良足適暗俄明疑欲暝
飯軟茶香魚味美更喚扁舟取微徑斷碑悽惻一摩挲
回首空林試凝聽

越比叡山至根本中堂日吉神社諸寺

山椒懸瀑極可愛旋越高峰出其背却尋日吉得三橋
雷轉山驚正澎湃藏如伏蟄動如飛冥想泉源自天外
入山誰挾不平意水怒石頑作諸礙開山釋子歷眾苦
巨殿千年陰不壞門前倚閣眺平湖蔬飯猶堪起吾憊

琵琶湖中秋

誰遣琵琶化此湖歌聲終古繞西都錦帆拂水成殊色
傑閣藏林想霸圖一角夕陽山盡處萬家燈火夜歸無
石山寺外唐橋月莫向愁人問故吾

長尾雨山招遊天滿宮金閣寺遂至嵐山

雨山君子人垂老愈豈弟交期四十年白首見不易我
如介之推從亡齒徒隸唯君戒勿餒亟起追天意平生
不計功聊欲正其義斯民詭自聖於我久遐棄傷哉禮
先亡存者蛇與虱意行且縱語林水忽深邃嵐山何陡
絕仰睇若難至山樓坐臨溪微雨轉陰翳借君杯中物
一酌填胸氣栖遲指碧流吾亦從此逝

小倉正恒招宿舞子住友別業

樓館嵯峨倚暮空雨聲竟夕雜松風
逃虛路出滄桑外憤世人來醉夢中
入海扁舟應已具看雲孤島更誰同
白鷗欲下還飛去莫爲高吟怪此翁

近衛文磨公爵招宴星岡茶寮小田切萬壽之

助即席贈詩次其元韻

義士忠臣道在東神州端與陸沈同世間豈可喪人理
天下誰堪論至公逐臭轉丸雖自喜浮花客慧總成空
欲知霧散雲收日正落旁觀屈指中

舉世同汙偶獲全與君握手歎餘年公卿重義應增氣
衰朽投閒欲勝天紅葉正酣傾別酒秋風適起放歸船
申胥見比吾何敢聊爲披肝皎日前

九日雨中日光山湖樓

江戶東趨揭日光泉飛楓醉及重陽正從雲裏窺山態
却向峰頭得水鄉洛下故人殊繾綣雨中吟思極蒼茫
登高莫動將歸感聊借深杯作道場

宿日光山半米屋湖樓

我適來從萬山底目極巉巖高未已誰知林際透湖光
水靜山閒數十里高樓臨水欣小憩微雨掠湖雲正起
復於雲罅露奇峰壓樓插天此何理凌晨拏舟絕湖去
曉日破寒殊可喜霜楓耀眼與日爭使日無光誰戀爾
雨山青厓碧堂叟肯伴海藏窮父子胸中晴雨尚氤氲
餘味莫矜茶飯美

華嚴瀑

縱知瀑來處去處有誰知入澗三百尺莫能窮所之雪
花春石色霧氣變巖姿可怪奔馳者徘徊空自奇

周梅泉五十詩

門巷相望密往來十年歌哭暗相哀收之刻意傷豪興
同父牢愁鬱霸才已對綠陰疎酒醺却尋舊夢就書堆

人間換劫纔彈指莫信吾儕一念灰

循廊

去來誰夢復誰真叢菊年年伴此身又是殘秋增悵惘
循廊來覓看花人

十月十五夜落月

淒清月色無今古寂寞人間有死生霧閣雲窗忽今夕
只將涕淚送西傾

十一月初一夜四鼓寄稚辛

夷災與辛翁童稚同卧起白頭真手足無病差可喜
二親棄我蚤雪涕至暮齒兒孫復滿前略亦識道理世
途如暴風不日當自止吾儕宜小忍稍爲存人紀詩書
雖半忘餘味猶深旨只愁後難繼萬卷空堆几

寄汪衮甫

昔遊江戶三十餘芝荃二公深器余

衮公使參贊

甲午一

戰曲在我捲旗跋浪歸舟俱年將七十忽重至堂堂九
原不可呼郎君持節正壯歲重我視昔情尤殊翠松紅
葉照白髮殘年殘世同欷歔斗樞霞意語何巧文采焜
耀驚東隅高才名門貴風節以義相厲吾豈誣

名

翠松紅
葉二館

和胡琴初歸計韻

置子空期死地生漫漫長夜幾時明心聲只覺辭彌苦
天意誰言亂漸平從老得衰才既盡再興一姓志難成
傭書賣卜真同調末路聊堪小技名

郭春榆輓詩

詩老凋零餘幾輩歲歲相逢向行在昨日傳觀絕筆辭
才思如潮元未退束縛蹉跎效小忠興亡遺恨想填胸
哀榮論定嗟身後畢竟君恩有始終

和鄞縣楊霽園

高人意度吉人辭傾蓋相親勝舊知講學力能動豪傑
從亡世已棄衰遲空山莫憚操孤調邪說憑誰斬亂絲
夜起庵中獨醒者爲公自慰罷傷時

海藏樓詩卷第十二

和胡琴初戊辰除夕韵 以下已已

禮失甯論玉爵揮龍潛莫問在天飛
春王未害書周正中露何堪賦式微
射隼待占高墉利毆魚會見眾心歸
吾儕羈紲應同罪留與人間說是非

正月十五夜

一街寒月光如水七十老翁夜獨醒
回首年華無覓處漫從文字乞餘靈

贈溥俊之侍中赴日本

皇情念手足大器期晚成時哉不可後
揮袂輕滄溟英姿自颯爽猛志宜專精
接人謙而尊奉己儉乃宏晏然處眾中
孰能指以驚譬彼五嶽重無令見真形
世變在

旦暮天道猶難明莫滋君父憂歸來佐中興

正月廿一日進呈

我

皇天亶姿弱冠志恢復安人在修己進德在勝欲天心
屢示警摧折亦甚酷憂患相琢磨轉禍豈非福萬言苦
難切得要意自足出話實樞機片語繫榮辱用財尤貴
當寬大眾所服能除驕與吝氣已絕流俗識出一世上
可使一世伏中興誠至艱十倍開創局無逸且有恆舍
此無聖學

櫻桃花下作

白雲搖曳來庭隅遮樓翳樹何踟躕看雲只宜隔尋丈
愛此雲氣縈衣裾日光斜入雲欲醉雲醉還愁林下墜

一春又去雲爲泥難遣幽人樓中意

黃篤友求題煙霞訪梅圖

空聞二老訪梅年洞掩梅荒事渺然廿載畫圖堪再展
一家詩學更誰先滄桑蚤逝成高躅羈旅長貧信獨賢
莫道湖山終寂寞遺民滿卷足流傳

花下又作

暗林漸分霧猶瀰千花萬蕊皆低迷樓東花氣與雲接
朱酣白醉迎朝曦何人與花鬪早起精爽清明似難比
卻愁斷送幾斜陽付與醉生兼夢死

犀園讀畫圖

亂後難爲山水遊好將遊興畫中收爲君更語讀書樂
只對青山不下樓

謝七十贈詩諸君

俯仰漏將盡踽踽猶夜行夜行何時息所期晦復明友朋頗見哀賦詩勉艱貞用意雖淵默動天如雷聲願君莫輕言相忘實與名

王君九求題胥江屏跡圖

置身杳萬仞世俗非我倫彈指歲三百乘化見遺阡節義有傳人逮此九世孫豈徒繼潛德幽光發至文顧畫曹所畫深情悲且敦展圖欲感涕醺行不自言晚世重名教避名道尤尊此理猶爲淺相看惟喟然

明歲貢生王學伊號道樹老人文恪公五世孫明亡隱居不入城市自營生壙題曰乘化阡爲君九之九世祖君九作胥莊享堂記曹元忠書之顧西津爲之

圖

和惺仲五月十三日原韵

莫向彭咸問所居
稽天巨浸欲焉如
人心未改思清日
士氣難追復辟初
狩久嗟成下殿
從亡聊自託傭書
斷章敢取旄邱什
不用詞臣賦子虛

陳肖三重宴鹿鳴詩

桂林一枝年最少
陵谷難移見高蹈
耿耿秋風晚節心
再及恩榮拜明詔
海外園田恐已荒
孤蹤垂老且徜徉
當時送我投荒者
回首應懷北斗傍

余帥師赴邊防時
陳方為廣州府

侗伯立之立庵同出觀荷

伏中伏處動累日
乘興追涼忽同出
荷塘聯袂一延伫
紅衣離披雜蓮實
夕陽掠波弄金彩
西眺南開極蒙密

水鄉渺渺入無際安得扁舟逐明瑟旋過湖墅蔭高柳
脫帽恣談苦難畢饔餼乳酪甚嘉惠渴吻得之加縱軼
論詩奮欲掃塵語去就案頭先滌筆

立秋

鬱熱不知秋欣然秋已至殘暑雖肆虐時哉當自逝嗟
茲秀不實榮華俄見棄涼風所成就耿耿必天意老夫
世久輕迂妄走仁義旁觀怪未老探囊索餘智北窗窺
曙色頗作來日計百川方灌河行水豈無事

時氣輔諸
河盡決

侗伯立之向元同遊柳墅公園

洶洶河流尚平岸渡口扁舟誰敢喚縱橫卧柳半入池
雨氣蝕林如未散穿林廣道敗八九荒草侵花潦中斷
據亭小憇絕懊惜水木泓嶢猶足翫老羗乞錢抱慙色

烈士窮途深可歎我曹落魄雖勝彼喪志埋名同一竄
低回斜日去何之吾能短歌子其亂

白俄質
或爲巧

或自福州海道見致素心蘭一雙初至即花歎

賞成詠

露根失土等縲囚鬱勃猶花氣更幽越女乍窺天下白
國香欲占九分秋抽枝自帶山泉潤顧影還宜月色浮
夜起庵中尋故事惟將心史伴牢愁

侗伯立之同遊李園

聞道近郊兵已去門前轍跡復堪尋秋花承砌堂初啓
斜照穿簾柳更深水草欲交聊悵望坡陀未沒且登臨
年年携酒題詩地也共神州付陸沈

陳一甫觀察六十雙壽

自奉至約意若吝忽斥千金付災賑賢者固應不可測
莫訝衣冠類寒畯廉吏家風國史存平生阿堵豈輕言
齊眉黻佩能相警猶有圖書遺子孫

陳母劉夫人七十壽詩

博通經史善講肄抗顏爲師德尤備登堂正似老書生
教子還成清白吏濟濟名門眾共稱家風勤學逮孫曾
吉祥文字何妨淺念佛栽花即壽徵

九日中原露臺登高示同遊諸子

枉負劉郎一世豪登臨猶自怯醕醪河流貫市潮痕上
夕照當樓朔氣高逐鹿中原成浩劫飢鴻四野極哀號
諸公更事應同慨試爲蒼蒼念彼曹

題吳藹宸所譯墨索里尼傳後

七年名相世猶疑四海論才亦可知亂世紀綱民未信
中流砥柱事尤危多君奮筆饒生氣使我前籌或更奇
國士無雙非漫許待看魚水出乘時

上書書國士無
雙語以遺意相

雜詩

平生頗自克無病效可見歲寒就搖落違天定何戀短
長雖有期痛苦亦姑遣持此語兒曹聊比勤小善

古人多愛酒以藥助使狂醉則全於天狂則亡其鄉是
皆忘放浪而不甘處常自戕反為樂賢智過益彰

老至未甚衰頗喜躬操作親者覺漸疏愛者意稍薄推
此及耄期孤往極寂寞人生羨長生況味乃殊惡

同產餘一弟每見懷二親相對但惘惘悠悠留此身事
親日何短茹苦莫鮮民墳墓久不至仰天潛悲辛

十月初九日侗伯立之向元同遊羅氏菊圃

今秋爲菊歸稍遲霜風累日如見期北花較早南花晚
三子語我良其時此間花事推羅叟扁舟迎客來水湄
一窗斜日正耀眼殊色異態紛呈姿豐者沈吟若含醉
瘦者縱逸若揚眉舒者紫回若起舞虬者斂抑若凝思
仰黃俯紫已堪念忽有飛白舉雲旗好奇流睇緋與褐
何來粉碧端可疑主人指點賓太息終歲辛苦報以斯
偶獲新種極秘貴不願市擔偷易貲能來數觀誠不吝
吾儕矜癖同此癡

爲溫毅夫題津樓話別圖

從亡寥寥纔幾人居者行者同苦辛政要講義書已畢
何異晨夕承咨詢我聞遺民多避地島族獨能重忠義

丈夫不死天所留不用臨歧揮別淚

沈重烟思親望月圖

逝者誰能留月色獨不改堂前一遇之何異親斯在此
情恐亦亡風木不相待知君經天淚夜夜沈碧海

吳仲瑀求題王忍堪書冊

一見忍堪字皎然在目前同舟下京口彈指四十年北
固山頭酒江波照悽妍異翁獨知此俯仰皆重泉伯符
志不遂吾分當棄捐

殘夜

微燈耀殘夜却顧影在壁几榻雖未移篋笥誰復覲去
留何匆匆存亡兩默默向曙意旋消宵來更相覓

楊一齋所藏顏魯公三表帖

突圍失去得其半何意累年還復歸他日功成名遂後
當令座客想餘威

一齋爲述此帖失而復得始末因題數語

題劉氏從母小像

兒時事歷歷壯歲反多忘一憶姨相喚真同母在堂亂
離負鄉土親愛苦肝腸莫話山兜尾殘年付夕陽

劉左泉遇盜詩

劉子久辟地恃醫餬其口六盜來窺室曾不憎臨湫叩
門云求治二盜掖一婦四盜旋繼入露刃競怒吼舉家
噤不語跽伏莫驚走傾箱更倒篋倏忽入盜手病者續
續來孰能辨誰某劉子神自若一一爲研剖處方復切
脉臨難真不苟諸客固波及速抱救吾狗白晝乃有此

再至蓋已狃友朋各嗟歎念子罄所有如何反召客豐
饗陳肴酒引滿非壓驚壯哉此奇叟

題項墨林朱畫山水

自寫衰容項孔彰朱家畫本意堪傷老夫未合稱遺老
待撥江山反少康

題虎口餘生圖

風行一世金贖命朝處華堂夕檻穽貴人喪膽伍俘囚
此日相憐盡同病窮民無歸阻草萊虎之盜之良可哀
披圖誰念承平日四海康莊任往來

張一桐邀飲分韵得生字

我昔嘗為文襄客文達遺風想顏色公孫好士更瓌奇
不覺名門森畫戟門第誰能保令名當時人傑嗟無靈

累世相韓子房少期君事業在蒼生

夜起庵

一別高樓寄此庵五年況味更誰諳枕堪待旦天難曉
薪已將然卧豈酣滄海徑歸真上策舊京入夢奈空談
丹青自寫靈臺狀莫信人誇蔗境甘

相者謂余
富有晚遇

和弢庵元旦韵

以下庚午

蟪蛄未可言時命那識人間秋與春不憚冰霜成苦節
依然日月見常新行歌莫復悲從徑著論猶思效過秦
海內名流憑屈指却嗟行在盛詩人

人日遺章行嚴

昔與幾道論物理初若不合終有取行嚴理不減幾道
文辭益達真其偶滔天新說蕩忘返徒使學者失所守

山移海覆俄自敗始信吾道可長久子於學術誠善變
非但心悟實身受速宜著書道甘苦後生循循得切誘
世人欲殺定何意正坐名高博眾詬衝寒過我示新作
抑鬱窮愁聊一嘔不妨獨以文爲詩莫與時賢較升斗

題林山腴霜柑閣人日燕集圖

世移人散乃至此人日相思阻萬里宣南朝士猶未盡
舉酒看天雜悲音霜柑小閣著詩翁書尾殷勤置印紅
回首平生銷磨了借君畫卷吐殘虹

答顧壽人祖彭見贈

金陵山似夢千層永憶平生顧子朋卷裏交期猶欸洽
酒邊意氣自曹騰存亡默契餘名節人物銷沈閱廢興
却爲君詩慙北海只將高卧比陳登

顧詩云北海
不爲曹氏下

庚午二月初九夜

屈指相從歲月長，纔如一夢覺旋亡。
心頭常貯疑隨影，遺照時看悟異鄉。
往事詎忘非往日，餘生未盡祇餘傷。
殘宵獨語先歸者，留閱人間更幾場。

張翼桐求題遜廬詩思圖

抹月批風奮筆初，衫唐柳宋力爭餘。
詩人小雅今何在，欲袖葩經問遜廬。

花朝飲東興樓

莫忘人日約花朝，九十韶光已半銷。
吟社何妨期酒肆，詞流最喜共春宵。
揮毫易動承平感，縱飲猶堪塊壘澆。
攬轡澄清定誰屬，相看霜鬢未全彫。

答劉子貞

東遊故友已將盡羈旅逢君猶健飯平生志業無可言
苦節戔戔貫衰晚君能忿世且疾邪下視世士如泥沙
餘年事佛真長策定力應看轉法華

答張岱杉

清明在躬真養氣寡欲可使清且明氣爲之本形爲末
餘事猶足持吾形超觀別杉超超必了此力行實難無
異理若非仗義行人間漫浪長生不如已

題弢庵第六女敏修所作山水

畫筆詩心秀氣鍾含毫不待守南宗螺江嬌女閒調粉
奪得清湘雪後峰

黃溯初求題敬鄉樓圖

世風惡倫紀何有於敬鄉黃君豈弟人作樓抱縑紉叢

刊繼玉海力能發幽光願君昌永嘉莫但雄收藏

陸文烈公鍾琦文子遺墨卷書後

事敗成忠孝而亦能感人感人誠有效死難終懷冤或未竟其用勢去不可援迂謬自取禍功罪猶難言願與知者謀臨事期萬全苟其負君父名節安足論

王彥和求題中泠泉圖卷今為王可莊祠

江去泉留見此祠滄桑滿目不堪思存亡同負千秋業埋沒空哀一世奇兩點金焦殘夢斷廿年吳會再來遲含毫回憶平生語寂寞猶餘地下知

程白菽求題周璵畫龍

遼序云嘗於河見龍騰

退之龍移信奇語巢居插天厭平土永叔盆池意更豪百里中分千丈舉程子真龍幸一見誤信神奇同朽腐

毫釐脫命偶獲赦幾逐蝦魚卷飛雨好龍徒得畫龍本
冥想靈蹤定何許董源能作拔山勢蜿蜒尋常寧可侮
尸居如我不足論龍變云云聊戲汝

和立之極樂寺坐雨韵

六十年來迹孰尋驚聞把臂又雙林含情莫問同光事
只有西山雨意深

答張君玉裁

石遺最知詩未免阿所好學詩吾亦老淺陋豈足道平
生夢韋柳一字不能到次之為韓歐閣筆難其奧隨人
作近體何異蜂蜨鬧從今欲不作蓄智待衰耄近得虞
君詩鎮海虞和欽於杜果深造沈雄出意表纖巧端可掃張
君師石遺吐屬頗兀傲為君道所歷弩末愁魯縞

嚴幾道手書題後

幾道與秋樵清談極神契手書可相亂僂僂真一致學之皆甚勤垂老益姿媚書生抱結習自詡意有寄當時未深許身後始歎異平生歡不再感愴難自制

閏六月廿四夜望月

半玦入我懷碧彩在天際窗間獨徘徊夜起真吾世無涯終不舍聖者亦感逝區區較行藏何異深則厲平生事已畢待盡即長計望舒爾知我默對若有契

時日胡不喪予及女偕亡哀哉不聊生舉世徒慨慷斯民未悔禍負汝肝與腸昊天豈能救兩敗誰降祥盧鵲在其前螳蟬在其旁般機一時發膏血污穹蒼

雜詩

出門何所詣誰可聊與語
鳶飛魚則潛惜子非吾侶而
我斯人徒兀兀豈高舉一言苟有合嗟歎能無取辟言
且辟邑稍狎或予侮人間猶可戀不必心相許

否極泰斯來其機良可見不幸言而中識者頗驚歎中
國非無人隨波為士患東之雖已老猶得稱好漢玉人
甯受教舍汝難自賤袖間惟縮手誰與撥世亂

墜月來枕上哀我如枉顧我卧月明中驚覺月將去意
舉欲從之安得插兩羽山河不難越妖亂可飛度豈如
行空機徒使生民怖夢中未忘世悵恨入遲暮

所求苟在我求之固必得使其不以道雖求亦何益禹
稷曾何求躬親惟稼穡億兆服其仁萬流歸其德詹詹
道未闕天命詎易測知天若操券眾口殆可闕

王病山七十生日

昊天未厭亂烈士老可惜不知何所待歲月等輕擲病翁亦七十鬚髯猶如戟眾中聞微語震駭皆辟易所居裁容膝抱膝視四壁瓶花換春秋嬌女課朝夕悵然觀世變但覺夢痕積勁氣久鬱蟠毫不減往昔年年雖相見把玩惟過隙殘秋當扣門餐飯加努力

劉石宜寒燈課讀圖

冬夜正長燈影寒兒書未熟母不歡母憐兒倦母亦倦窗風入隙聲淒酸兒存母亡圖長在圖中情事今難再舉圖還君更何言惟有孤兒黯相對

黃黎雍千華覓句圖

詩人得名山才氣豈相讓名山得詩人靈秀湧萬狀有

如鄭道昭駒谷長自放至今雲峰刻翠墨森遺唱又如
王介甫鍾阜久跌宕定林專一壑終古想超曠黃子家
遼陽千華閼疊嶂此山正有待人傑與相抗願君出奇
句少慰朋友望

曹纓衡四十生日

少年詩才氣難敵年少漸去才漸厄四十稍稍厭浮語
我信曹子能不惑子詩俊逸多可喜貪多愛好吾所惜
勸君返樸棄聲律敢謂老馬途猶識蹉跎亂世孰有就
恃此不朽當自力安身立命入中年何物堪娛只心得

空房

空房一何慘我意無奈何去日既已久安望重來過遺
容空注目畢世驚蹉跎熟寐不欲覺轉憎人事多

和山本悌二郎見懷元韻

廿年滄海尚橫流
笑童蒙匪我求
一任時賢詡牛後
誰從鄴下數龍頭
試看飢渴歸心易
小待桑榆反掌收
只有二峰能見憶
思君端欲賦重游

卓君庸用筆九法

以下辛未

離婁公輸明且巧
亦特規矩成方圓
世間神妙不勝用
造車合轍真知言
舊傳八法增為九
疑子偶得如有天
乃知秘鑰本至淺
日行不覺誰使然
童蒙得之生羽翼
飛行絕跡追胎仙
此猶金丹換俗骨
草真篆隸從所便
太平至仁寄文字
彌雖日休將統萬類
歸同倫老夫斂
衽心誠悅莫騰訕
笑嗟群賢

二月廿四日歸海藏樓花已半殘

殘花能待我於意良甚厚吾猶及此花於義或無負人
生不相及餘恨常八九至哀來無端顛倒終何有年年
人漸亡自顧亦已叟唯當屏文字縱論且舉酒

梅泉誠善頌惜此蓋世翁惜乎天不與非窮亦非通舉
世如鴻毛泰山在此窮七十何所求哀歌氣填膺友朋
稍見知來往成奇蹤春秋歸斯樓八年更雨風置子魯
陽戈行看日再中

馬詩灋求題劉平國拓本

褒余刻石楊淮表勁瘦無波異漢分每道東西成別派
還從姑墨證斯文

寶瑞臣屬題陽台探杏圖

秀峰杏林不自保年年作花餉諸老過眼承平非我春

只恐詩情被花惱寫取風光幾度吟尋花莫惜入山深
遊蹤歲月須勤記聊慰空山槁餓心

馬仲瑩屬題晏元獻遺集

仲瑩蒐輯

中園賦與五雲記元獻遺文足傳矣千載唯稱珠玉詞
二晏相輝莫父子慈谿仁和發幽光安次晚出加張皇
人生遭遇如同叔何用辭章較短長

淡路丸舟中

同洲二帝欲同尊六客同舟試共論人定勝天非浪語
相看應不在多言

旅順海岸

奔濤數百步勢欲捲人去山惡天無情茫茫向何處海
濱此君臣顛沛亦奚懼朔風莫怒號飢溺吾所慮

龍王堂水源地

澄流千餘頃可飲百萬人長橋若橫帶清媚絕點塵四
山靜相圍種松成層茵豈知萬花谷蹋徧峰巒春去海
不數里鹹波杳無垠智者能行水嗟爾鑿井民

贈甘粗大尉

諒為烈士當如此負咎方知疾惡深意氣人生忽相感
惟將節義見胸襟

旅順禱詩

天戴空桐海度遼高原無際見盤雕廿年熱血心頭貯
猶向寒宵作怒潮

冬暝通宵雨似繩迴風忍作雪飛騰人間遇事憎遲鈍
造化雕鐫恐不勝

彌天四海盡虛名西抹東塗讓後生七十老翁間抱膝
思量次第便收京

繁霜漸覺鬢毛侵揭日移山尚有心狂煞拿翁自天縱
字書難字不曾尋

地闢天開待鉅觀爭教理會到儒酸莫從鼠窟營生活
敢請諸賢放眼看

贈憲有之

忠賢久竇志哲嗣各超特吁嗟此何時為國當盡力少
康初在虞羽山猶未殛見君竊歎異風骨果遺直老夫
頗相士深淺稍能測熱中必懟上室怒市於色一笑契
吾言士固先器識

江知源連山村詩

廿年隱海濱讀易忘其老避亂復居遼植果守荒島諸
孫各勤學玉立盡國寶知子非忘世作計不草草狂夫
來一飯放眼窮蒼昊出門勿相笑動靜或同道

王君九求題其十四世祖明王文恪公鑿自書

洞庭兩山賦卷

具區之藪吾未遊兩山戲湖如雙蚪震澤先生賦其狀
何異浩渺擎扁舟文心嫖姚書雋勁蟬蛻功名獨榮興
一篇謫解意何深誰識先憂理尤勝賈生希文才可爲
天下無事終難施因時察勢有輕重蚤退斯人已見幾

文

恪集
詩
解
篇
中
語

文化台得宅在巖谷間名之曰遐谷以詩紀之

雲峰山中白駒谷中岳先生吟不足此山近市絕市塵

誰抱遐心止山麓谷口微通斜入海海勢彎環山起伏
靜中日月任窺窗歲暮煙雲欲遮屋子真道昭雖往矣
一隻狂歌獨來復遼東避世多名士只有幼安可追逐
真人已出猶龍潛反掌乾坤見新局豈知投老歸何所
夢想舊京倚喬木結隣莫厭暫婆娑自顧未甘棄溝瀆

住山以下壬申

住山意良靜自爾去人遠惟貪養懷抱何用惜朝晚等
之逝不舍所得未為淺處逸而待勞然亦乃善遣

人日晚霽和賓瑞臣

知存豈必兼知退見淺何緣喻見深倚伏孰能窮世變
廢興端欲契天心遼東人日尋吾黨星浦斜陽換暮陰
但飲莫論眼前事度詞聊與託微吟

西園 端午

斯丘聊得暫婆娑正是原頭夕照過高阜蟠龍迴草色
密林瀉綠入池波俊游誰辨閑中味愚叟猶堪勞者歌
却念舊京潁濱老祇憑花事坐銷磨

雅辛寄示牡丹詩

雜詩

新綠新晴暗幾層小亭斜日有誰登
窗間閣筆沈吟者
席卷燕雲且未能

庭除得柳廿三株兩架殘書便有餘
回首海藏五千卷
何年還我舊樓居

行在朝朝事早朝漸看垂柳晚長條
不須坐待秋風起
已覺先生短鬢凋

雙柳駢枝四丈餘披雲拂雨蔭前除
憑誰共話南陽路

一樹當門恐不如

林外明霞一霎明滿庭柳浪碧雲生西風妙解銷殘暑
只在蕭蕭帶雨聲

曹瞞啖葛渾無賴運甓陶桓可笑人夜起庵中人老矣
不須辛苦損天真

廿年夜起迹堪尋習苦如忘老漸侵衝雨衝風渾不避
一生吃著那關心

赫赫行天雷乍驚庭中大鳥正飛鳴周公葛相猶耽巧
流馬南車次第成

題西村真琴博士所寫滿蒙草類蟲類二卷

古有南方草木狀誰從北地考芳蕪西村博物應難及
何異親披爾雅圖

吟思誰如黃魯直一篇演雅絕新奇老夫欲覓寒蟲語
也有鳴秋幾卷詩

九日

壯年猶記戍南荒晚向空桐惜鬢霜自竄豈甘作遺老
獨醒誰與遣重陽菊花未見秋無色雁信常遲海已桑
定有餘黎思故主登高試為叩蒼蒼

弢庵太傅八十五歲生日 九月廿三日

天迴朔漠作神京國老東來舉世驚八十五齡真好漢
重陽半月見耆英中興方略資長策北地雄豪待主盟
細楷清詩時一出知公不減舊心情

述菊

我雖投有北意若輕此鄉所居依高柳偃息聊徜徉殘

秋忽重九頗訝花未黃隣園覓盆菊恣取不靳償涉旬
苞漸放倜儻殊非常抗態已兀傲舞姿極回翔色奇固
難媚骨瘦偏含狂遇之以畸士勃然動詩腸不辭室轉
寒獨賞夜始長得此果意外誰能蔑眾芳

題飛鳶海日

匹夫志難移復國一反手夸父化為禽猶與日競走

十一月四日始乘飛機

莊周論絕迹未若無行地今知行地難凌空乃甚易習
聞氣猶水浮物水不啻仰觀雖迅疾閑暇得下視山川
掌中文嗟此人間世夕陽在我側碧落故無際遲遲吾
行爾父母國可至斯人聊同羣詎作飛鳥逝

利人斯制器而用以殺人此非人性惡得果由種因苟

能正其本萬類自相親必無強凌弱何取力假仁設險
以守國舊策難重陳空中常來往四海爲比隣智者旣
創物始知天牖民王道信蕩蕩請觀行同倫

題于晦若手書卷子

研朱正讀韓非子北院同居幾晦明恰似祖生呼越石
聯床屢起論雞聲

乙酉秋冬與文和同居天津督幕予年二十
六今七十有三矣愴然書此壬申十一月十
日

和弢庵留別韻

忽忽殘年過七旬豈能忘患欲忘身榻傍未可容鼾睡
海內誰云等比隣聊以神州喻唇齒忍看諸夏廢君臣

海難相言十二
破翁老去名尤重應仗新詩悟國人

殘夜

數盆頗惜梅花瘦莫解殘年抑鬱心驚怪暗香來鼻觀
故人魂夢忽相尋

回頭萬恨復千悲投老猶難脫馬羈留取一庭殘夜月
依依還我少年時

夜起

立於萬物先嚮明我得天衰殘何足歎皦日在窗前
中庭力掃除一潔已可喜天下誠吾憂聊以俟君子
弈秋著一子殘劫變新局誰知夜起庵得此柳下屋
舉國欲何依無主自致亂老夫略識塗禱張莫為幻
黃金數萬斤六計皆出奇沛公能不問得以恣所為

擾攘二十載蒼生何以生誰能不嗜殺未可更論兵

和水越成章韻

驚回舊夢悵離羣久別應知過所聞忠孝勞生終有愧
何如白首卧松雲

原作

欽君忠節最超羣赫赫聲名世所聞
應是遊蹤猶在夢湊山松籟甲山雲

東坡生日聚飲

旣毳年來欲費吟舉杯聊敵夜寒侵宿師論將雖非望
猶有眉山緩帶心

時方進收熱河

坡詩云西方猶宿師論將不及我苟無深入
計緩帶我亦可

邊頭白酒香尤烈塞上盆梅瘦不花玉宇瓊樓更休問

且看霜月滿龍沙

十二月廿六日天未明

殘夜不須眠獨起誰同調老我莫徬徨片月猶年少
愚公欲移山恃有子孫在老夫當及身移樓著人海於
收京後必更造海藏樓

除夕

遼左觀天星已迴倒懸未解事堪哀人心漸悔機應轉
殘局誰收劫又來欲以功名付豪傑待看宇宙洗氛埃
老夫依舊窮生活腐鼠鷄雛莫浪猜

正月三日憶小乙以下癸酉

千載匆匆過眼前無端生滅定誰堅幽明歲月應同逝
母子相依又六年小乙卒於戊午吳夫人卒於戊辰

小倉閒齋寄盆松

閒齋越海致盆松
鱗鬣欽崎雪尚封
聊欲對松詢近狀
知君詩思正蟠匄

哀垂

正月二十日卒於滿鐵醫院四十七歲

吾年七十四汝纔四十七老存壯乃亡天道難究悉一
生近好勇才氣太橫軼俗情殊未捐蘊熱成內疾忽如
熟天燄致死止六日傷哉兒之愚捨我為異物

從亡吾父子不恤天下詬老夫雖先登返顧恃勁後嗟
乎天喪我倉卒而遇覆伏弢折右肱必敗焉可鬪沈吟
慮同盡束手不能救誰能從此止先軫甘兔冑

蚤通東西學未暇攻詩書少得讀書力投閑意不愉壯
健如熊羆忽然失其軀婦諧兒女慧割愛情何如獨云

父勿憂指舌空囁嚅汝當目不瞑吾當持眾雖

強死能為鬼子產說何疑又聞李札語魂氣無不之奔
遼有同伴聞耗來已遲逡巡甫出門旋風起前墀捲塵
高丈許南趨若追隨窗間我目擊失聲呼兒垂俄而塵
自息憫默空庭悲死生分已斷欲語將告誰上角利一來
視垂所善也抱吾臂而哭

不敬天降災反躬當自責逆來必順受尤人亦何益事
業姑置之家難殊可戚譬如風拔木龍顛委荆棘孀孤
忽滿眼血點垂胸臆老夫豈長存素志堪痛惜回思平
生心忠孝有微績蓋棺誰論定一逝真過客

戊午勝之亡哭弟賦永訣於詩雖非深下筆頗雄傑今
年吾憶勝入春太慘切幽明歲同逝母子六年別豈知

應在汝十日復夭折驚怪詩為妖不祥禍何烈鬼神果
先告前後如一轍苦吟不自休奈此肝肺熱

附錄垂哭勝詩

哀勝弟

鬱鬱經七年積憤在國事窮廬雖困守所幸共隨侍
世亂將何為承歡期我輩豈知天道遠堅貞觸鬼忌
蘭摧玉樹折橫風吹雁字南行稟巖命歸思怪難制
別來甫匝月倚枕驚憔悴劬勞憂二老促喚心戰悸
倉公不再起乞靈仰異類祇求盡人力遷播敢却避
孰意神早傷毒厲得縱肆藏府迫不支挽救乏藥餌
肢體殆先亡戀親魂暫滯欲呼口無聲覓視淚盈眚
晨興天未曙惡耗倏忽至樓頭悲骨肉感應若相對

恩義數萬千一瞑卒捐棄此恨真綿綿終古淪宿志
還家膚未冰訣別待訓示聚哀恣一慟號泣懷幼稚
黃昏初入殮遺貌似沈睡蓋棺忍回首從此永見背
可憐手足情過眼等離逝識語徵詩篇嫉俗遂厭世
寒宵風淒其迷惘猶夢寐 戊午正月十五日垂稿

殘春

喪我焉知質在亡空教白日照倉皇遭逢殊異謀中絕
魂魄何之氣自強怪事有時書咄咄殘春不奈送堂堂
關張無命腸堪斷頓足喑鳴淚幾行

上海舊作

觀小叫天演碰碑

辛亥後

暮年楊業竟輿尸雲代威名自一時破敵何殊逐雉
兔望風曾說避旌旗晚途供奉成遺老垂死英雄有

駿姿霜月滿天冰作涕暗鳴猶繞李陵碑

題同甲吟草舊作嚴範孫己未六十徵詩

海濱避人如出奔世亂愈甚越九年草木同腐正可
弔俯仰六十休問天侍郎欽崎善自遣遨遊物外兼
逃禪登高一呼忽四應何異舉義揮先鞭我生偶爾
同月日星宮磨蝎殊迢遘向來萬事不信命只信人
定須頑堅灰飛烟滅在一瞬中興赫赫歸周宣橋邊
日者私許我為問諸子然不然

四月八日乞假至大連星浦

挾壁施窗憶壯年推窗海色自無邊人間正有千重恨
呵壁憑誰更問天

含蕊殊濃開漸淡人生花事黯何言花前人與春俱老

惆悵沾襟豈酒痕

星浦櫻園

長春春歸草未綠直為看花乞休沐海上櫻林一夜開
舉國尋春競追逐朝來宿霧猶連海紫氣漲空吐穠郁
日光忽入如貫虹瓔珞漫天散珠玉雲中君下雲四起
飛擁巖腰或山麓又疑蜃氣幻羣姝粉魄脂魂粲盈目
花間士女各携酒席地酣歌挈其族先生微行雜眾醉
豈必獨醒聊曳足當年彩筆已難狀殘錦探懷毫更禿
滄桑回首夢龍華炫書崇桃語誰續

濤聲

曉色能令海氣生夕陽轉覺暮空平靜中別有吞天意
最愛奔濤日夜聲

茶範閣詩 瓜谷長造別莊紀事

深閨麗質少執禮窈窕舒遲雲欲起肅然四坐散茶香
屏氣微聞鑪沸水魚眼蟹眼聊比擬細啜無聲甘似醴
竹瓢陶孟漆秘器傳觀疑年容諦視箏簫隔屏驚且喜
宛轉嬌憨雙稚齒烏盤雪山摹富士咨嗟妙才妹與姊
敬賓及介退乃已門外穠櫻壓桃李

題畫

一翁捨錢與貧者盜及犬躡其後

利傍有倚刀獬犬憎蘭佩禮義苟不愆孤行在我輩

費地山求題露軒小楷卷

翰苑風流墨似金晉唐小楷費研尋老夫臂指僵難使
空有群鴻戲海心

初日

初日垂楊自弄陰曉風過處抵千金麥梁萬頃天如海
換盡詩人出塞心

人定從來易勝天好將錦繡裹山川賣刀買犢傳新法
生聚何須待十年

三章約法未全頒且可從容議入關柳下先生狂作聖
只將夜起示人間

星浦大和旅館賦盆花

南妝尚末麗北宇饒丁香玉簪獨幽艷兼彼二者長此
花小於簪纔可喻釵梁嶢然天下白間色誰能當豈可
無嘉名名之曰夜光聊以比夜合雙璧堪輩行玉氣如
白虹意奇語非常禮經極能事物色收眾芳

星浦

何年奔星墜天闕長扼驚濤作飛雪我來踏星欲浮海
星不能飛海難越家山只隔海一涯廿年國破空思家
國人望我如望歲臨海悵惘還長嗟樓中候朝日再至
潮聲動天破吾寐桑田滄海眼中人袖手沈吟待天意

海岸

玉佩瓊琚困馬羈逃虛入海更安之孟郊老去歌銅斗
却羨翻船踏浪兒

漸苦龍沙歲月深只將夢想寄山林海波汨沒無人處
安得成連為鼓琴

書扇贈武藤大使

峴首羊叔子雲台馬伏波風懷去人遠談吐得天多滄
海當斜照朱樓出翠蛾烹茶留片刻不厭小詩麼

王道

損人利己只一念可使舉世無安土聖人復起更無奇
去其所爭得其所人生託命於天地相資以生義有取
智者創物終相仇孰為蒼生解愁苦

妖亂相尋二十載棄禮蔑義逮今日哀之不若使身受
其氣既餒將自失王道蕩蕩天所開舍是安歸必無術
老夫何異馬識塗却指夷途待豪傑

寄弢庵

意氣當時幾許狂堪憎老境債教償殘年況味今參透
只是生離死別忙

樓外

樓外青山最有情默然相對晚雲生會心不在閒言語

聽取蕭蕭過雨聲

題雷峰塔經卷

雷峰已滅藏經出四十年來事渺茫光緒末劫後遺
民吾尚在却看孤塔過遼陽

青崖雨山竹雨香城夜飲

老去詩人感事多不辭轉海一相過六年如夢依然在
奈此燈前酒後何

遼海新朝莫苟安由來事業出艱難漆身吞炭都經過
憂患餘生亦等閒

讀國公青崖詩題其後

詩能洞三光亦能贊九泉詩人以詩語萬物皆自言我
讀諸子詩稱心如所論如飢自知味如寒自知溫獨有

難言者一生積艱屯非聖孰能達媿我非其人願使深
者淺願使昧者真信哉青厓翁言志無所先

我居神戶日去今四十年避暑得出遊頗思就溫泉所
恨不解語造次無其人爾時逢一姝自名小歌津撫掌
笑使君迂哉何待言意動必可解出語非自然默然驚
其慧負負慙嬋娟回首誠隔世或猶在人間以詩記其
名兼以語雨山

青厓原作

華言我不操聞之意不通與君相對坐不異啞與聾
君心我夙知我意君應識語言雖不通神契久相得
翹首或放眸蒼蒼者何色陰陽四時行終古守元默
我今與君語仍有管城力同文何足言長是同心國

吉林

樓頭山色漾江光
魚麥豐饒見此鄉
地秀可知興學易
亂平應覺卜居良
欲憑禮樂移偷薄
莫遣潢池苦跳梁
他日絃歌聞百里
老夫遊處定難忘

陳立村八十詩

甚欲從君話武昌
追思建業轉惻惶
行年八十垂垂老
入夢千重處處忘
此日神京能把手
半生浩劫莫迴腸
還鄉儻得如人願
且認并州作故鄉

九月初一日晨起

世變方興孰了期
急肩何地事堪疑
睡鄉萬戶雞聲裏
却是閒吟縮手時

動靜元來貫晦明
半生待旦伴長庚
蕭然抱膝燈光下

漸覺人閒萬事輕

九日文教部登高

雪後重陽夕照明
初雪高臺縱目俯
神京平原已覺山
川伏投老翻教歲月輕
燕市再遊非浪語
異鄉久客獨關情
西南豪傑休相厄
會遣遺民見後清

弘庵八十六歲生日

與德國統領興登堡同歲

英豪當代興登堡
名節千秋聽水樓
並世天教繫王室
一時人望重神州
趨朝心尚凌風雪
絕席班應隔輩流
長白中興山萬疊
試憑紫氣候青牛

和高瀨武次郎

聖學千秋久舍藏
救時深切信竒方
欲憑論語平天下
半部誰懷一日長

夜起盆梅正發

尋花呼酒恣清狂，繩匠斜街久斷腸。
魂夢王陳真入座，何來窗下一枝香。

舉頭惟見小時月，見月懷人欲見難。
失馬塞翁過七十，殘宵對月不勝寒。

雜詩

知音絕難遇，不知且何如。
如閉暗室中，日與愚者居。
其言乃冀土，譬解術則無造物。
一何劇，未可輕擲揄。

年華如覆水，一往不可收。
幸有駐景術，猶堪影中遊。
虛名那足翫，豹死皮長留。
文字苟自傳，信有萬古愁。
所恨古之人，終難入吾眸。
宛宛親與愛，伴我無明幽。
彈指三十年，海藏失高樓。
莫言比夢寐，苦吟誰能休。


倉皇任國事倏忽歲再易空拳冒白刃非主反爲客拙
棋受幾子此局難對奕何能貪天功潛轉豈人力一忍
乃致此失馬忽復得塞翁不辭瘁夜起未改昔忠信出
懸流稍驗身所歷

老胡笑且詰何等爲王道新邦如嬰兒古語命曰悼扶
牀猶未能安敢慕桀鵞柔弱生之徒聊避天下媚煦沫
幸得活涸轍逢行潦洶洶强弩末未必穿魯縞仁義殊
可慙甘言姑相報

此都據高原曠闊亦可喜期年增萬戶奔湊無遠邇陶
漁至於帝所居輒成市四海聞新京鼎鑄猶有耳老夫
謬承乏自顧已暮齒求賢竟何得徒愧天下士

插架書無多枕籍止一室拋書尋餘味坐待穿窗日日

光天下奇力解祛抑鬱脫身行日中造化與我一養氣
塞兩間此語真可必



海藏樓詩卷第十三

正月十六日奉

皇帝即位於新京郊天禮成改元康德

以下甲戌

三王家天下傳子以相繼秦政稱一統二世至萬世生
民立之君道在仁與義仁義自無爭豈爲一家計苟以
力假仁上下必征利舉世治此學自謂巧且智日居爭
敝中孰能拯其弊

夏后厄有窮中絕四十載吾

皇歸滿洲二年定遼海中興興開創赫赫有真宰人心
不忘舊制勝若因壘中原可徐復修德猶有待一言幾
興邦惟以敬勝怠勿曰我得天天命固未改

述懷

夜起二十年倉卒當此局依然坐待旦自顧殊錄錄習
氣最難除求治誰能速先富而後教解此意已足爲政
好握權一念等流俗國僑以治鄭葛亮以治蜀區區法
家語王道未易復

使日雜詩

平生肝膽道非孤坐見扶桑奮霸圖四十年前花前客
白鷗年少豈知吾神戶

山路櫻花半未開雲中富士雪猶霏車傍兒女顏如玉
盡道先生覓句來熱海箱根

山樓主客百重歡紅袖銀燈夜未闌諸老熱腸吾自醉
不須借酒禦春寒俵石閣

成圍煖玉莫驚寒詩酒相催特地歡可惜少年心已盡

只將紅袖當花看

獨徃孤行道偶通知音千載最難逢世人盡在酣眠裏
忘却人間夜起翁

西京旅館

塗地誰憐腦與肝千秋轉敗事尤難貪天未可論功罪
翻使英雄淚不乾

甲斐夫人和歌

松際初陽射眼明窗間海色卷雲平越山馳道千車過
也作風濤拍岸聲

甲子園

池館幽奇窗對海最宜風雨看驚濤移情別有成連曲
不借詩人一世豪

瓊島仙姝不自妍莫將脂粉擬天然春潮初漲雲初起
正在朝陽吐皎前

巖島樓花

刻意傷春失夢痕懷人亭下更何言花前白髮風懷盡

不是銷魂是斷魂嘗於神戶署中作懷人亭

處處春山展畫圖登樓小憇茗甌俱兩叢紅白誰來賞
喚起閒情到鼠姑別府龜井旅館

北戒神州久閉關願穿河套越天山天公應被人窺破
鳥道何須取半環

松徑通天暗入林兩峰離立意何深白雲徐度巖腰過
似有微行出岫心

鑪韞原知屬化工陰陽爲炭碧兼紅誰能發問誰能對
子厚靈均只兩雄血池地獄海地獄

噓氣成雲鱷養雛應聲掉尾果堪呼昌黎自愛閑文字
遣與蛇龍作並驅

聰明睿知惟神武德化二千六百年今日日光輝萬國

蒼生還賴舊山川

癡雲堆積天如墨雪浪崩騰海愈明正有萬千身世恨
悲歌來和撼天聲

青島

懷古東來七十翁穿胸貫日氣如虹雙橋倒影金千尺

大淀河頭夕照中

宮崎廣瀨旅館

百歲纔餘廿五年任他修短且隨緣英雄花月應同盡
莫向人間歎逝川

奈良旅館戊辰與垂宿此

兒女傾城爲送迎老夫感涕欲縱橫達材成德真吾黨
願汝同揚一世名

一角元黃漸射金半丸離海欲登臨暗中已有人相待

二十年来夜起心

三月十二日烏蘇里丸舟中

骨肉凋零換劫灰興亡萬狀只餘哀仰天獨憶兒時事

滿眼波濤更不同

海中七十五歲生日

海上羣山跋浪來千蒼萬翠畫圖開
朝陽巧欲施金采湧出參差白雪堆

戶樞流水理殊明
惰慢終教業不成
百歲尋常應易得
何須世外覓長生

一張一弛力常均
天道如弓事在人
夏靡阿衡俱過百
張蒼乳臭不須論

日本漫畫者安田鴉甫求書

已槁蒼顏那復溫
漸銷英氣亦無痕
丹青難寫靈臺狀
皮相紛紛莫浪言

端午後一日雨中

萬重舊夢落江南
翹首燕雲興尚酣
誰覓寒翁談夜起

綠楊深處是茅庵

窗間晝晦欲拋書
閉置長憎出有車
僅得小廊堪曳足
時來放眼即逃虛

野鴿翻空合又分
知時就食忽成羣
黃梁一霎人間事
插翅高飛愧此君

對牀聽雨真佳境
愛說東坡與潁濱
老我廿年耽夜色
雨中偏覺一燈親

淖內藤虎博士

兩京邂逅劇談餘
問疾瓶原見異書
驚歎少微動星象
不堪回首子雲居

腐儒 六月九日

此局端堪稱意無
疲民廣漠暫枝梧
天心或欲收殘劫

王道何妨起一隅尹也就湯應得所禹之行水定非愚
西南億兆當誰寄愁絕乾坤老腐儒

香瓜

轉綠廻黃訝繡紋溫磨鼻觀已微聞味尋甘露酣初證
韻絕醅醪逞半醺荔子先驅膚綽約木瓜永好思氤氲
欲將哈密論風調舌本仙凡豈易分

七月二十六日乘飛機赴哈爾濱齊齊哈爾二
十八日返京

莫攀龍鱗附鳳翼空中沈吟駒過隙計程三千何所見
明滅洪流賁沙磧松嫩雙江爭流處濱市嵯峨耀金碧
龍沙萬戶半疲氓況有跳梁藏草澤老夫探囊失餘智
心雄萬夫究何益明年欲濬萬頃湖先出窮黎登衽席

王道樂土吾未信歸鳥競飛暮天赤吁嗟孤掌果難鳴
不有君子何能國

八月三日飛行自承德歷榆關至錦州

萬峰刺天氣揚波奮翼高舉蒼穹摩白雲排空蕩銀海
虹光鳥影如飛梭離宮梵宇壓關塞當年萬乘頻來過
中更世亂雖久廢遺跡猶足輝山河南循長城歷諸口
戴河秦島生微渦海天一碧深可悅人世迫窄煩張羅
腰纏騎鶴興所至老去兩息道與魔蘇仙華表歸有日
舊京在眼毋蹉跎

和朝鮮朴榮喆韵

剗餘文物久銷沈忽枉新篇愜素襟在遠披函情已達
相逢傾蓋意殊深文書遮眼頻投筆塵土填胸欲廢吟

可笑杜陵懷稷契三年尸位定何心

孔子生日

堯舜與人同孔子豈獨異而吾異夫子高遠若難至絕世作妙語出之一何易古今萬明哲未必躋此地假年欲學易孰能解其意造化雖無窮日用理非邃人莫不飲食反省鮮知味以此求聖人或者得所志死生何足道後聖必相契惜哉無孟軻誰與告來世

世人樂久生固以生爲樂樂生必惡死佛老均束縛聖云夕死可豈謂甘冥漠哭顏遂三慟懷抱亦已惡我生踰聖年自省甚可作功名意頗厭嗜好情更薄生存何以遣又不耽寂寞鳥獸難同羣吾徒尤落落古人或放達縱酒以自託儻然不終日是非昧今昨大哉死乎歎

乘化聊一噓

熟計老將至時時欲息肩
不如有營者汲汲常忘年
尼山不知老幼學遺憂煎猶云樂忘憂其憂固難捐孜孜斃乃已治易姑勉旃孔顏何所樂壽夭從其天老學若炳燭吾意殊不然多能實鄙事作繭真自纏頽然且放浪如魚躍于淵毋爲學所役益智滋可憐無憂豈非樂至樂還隨緣縱老樂不改以此得終焉

九日

天外飛翔莫計程登高誰憶舊詩名
半生重九人空許七十殘年世共輕
晚倚無閭看禹域端迴絕漠作神京
探囊餘智應將盡却笑南歸計未成

張庵和作

培風在下御而行宜若登天不可名一代詩豪
舒眺遠萬鈞國重著肩輕最難臆館聯雙壁猶
許霜鐘接兩京乘正圖南知有待蒼蒼元是積
陽成

寄張庵

年年必出關耄期見筋力諸夏如相諒豈亦好懿德太
公歸乎來避紂豈長策天下之大老舉世當矜式以詩
收人心斯文有正色神州論漸改丕變未可測一朝獲
頓悟相率銷鋒鏑重華生諸馮得意行中國敢言時無
人救世待深識

二

張庵八十七天意使久留自有高世名群雄資懷柔群

雄各垂老民勞可小休苟爲功名計紛爭欲何求何時
一杯酒解兵民恩讎同心扶日月王道興神州老夫必
退讓放之出一頭以齊猶反手諸賢有意不順逆與難
易借箸聊前籌

朝日十二月初一日

朝日入我窗晚日射我廊自我有此日歲月亦已長所
思親與友明明同日光此日彼共有舍我歸何鄉九原
不見日傷哉斷人腸聖賢如皦日何嘗異存亡顧語千
載人視影毋倉皇

十二月十七日從 幸旅順

向時魚服賦來歸果見龍騰破壁飛暫息遼東懷未展
迴看赤縣事終非五銖祚永知當復三輔民秋感式微

小待太平頻拭目乞身猶欲遂初衣

戊亥去國圖

以下乙亥

人海藏樓事有無西山銜闕歲將徂卷中七言何曾見
爲展殘年戊亥圖

和黃默園傷足

歸心如箭車垂發卻曲偏嗟足偶傷攷叟頻煩寄聲至
舊京想見爲詩忙竒情蟠鬱容徐吐好句吟哦亦自償
留取假期遲兩月城南花事趁春光

陳文忠公輓詩

攷庵功名士文字興不淺少年負盛望騰躍至貴顯中
間忽垂翼在野久偃蹇六十方還朝乃復丁國變倉皇
作遺老耄及志未展一生若三世老眼差自遣石交惟

簣齋極意爲論辯何至抑忍堪相輕似微編其詩必可
傳五言晚尤善和章兼細楷重疊盈篋行街悲檢殘墨
駒隙餘一泣

九原

王室中興豈妄言待時未可議南轅張翁忍死猶東望
難慰斯人在九原

新邑

黨人駭很絕無顧意輕死灰不復然老夫傭書居滄瀆
歲易鉅萬年復年忽聞奉帝奔日館坐得國寶俱垂涎
穿窬竊寵各自喜流毒南北成滔天天迴地轉有新邑
赫天吐燄燿山川舉世驚疑空拭目自怪熟視無泰山
東來二帝更攜手此輩眩伏將何言津沽蜷局有群賢

留取微命思舊恩

吳菊農七十壽詩

戊戌正如乘軒鶴武漢栖遲懷甚惡垂簾朝局恥彈冠
一語文襄爲驚愕仲張長逝不可招菊翁晚見我入遼
故都遺老天留在人壽河清屬後凋

辛丑春日於武昌節署共飯惟仲張菊農及余
在坐南皮詰余何故不換頂戴對曰不願事女
主耳南皮默然良久乃微喟曰報國有日

買宅

四月九日

三年況瘁人得此一區宅何如舍桑下三宿情難釋自
比柳下惠援止非有擇此窗容膝地敷坐親書冊休日
須作字支板劣五尺意中苦未展紙素亦頗積稍欣廊

下步羣鵠久就食無機自無怖飛集繞我側初夏柳始
芽默計好將息婆娑廿株樹暫輟磨人墨舊京數寄書
花事如過客南歸興不淺來日誰能測

四月十九日辭國務總理得允

行年七十六自詡好身手雖曰非健兒亦未齒羸叟今
朝得解官快若碎玉斗屈伸數張臂噓嚙煩撮口千秋
酸寒徒豈易覓吾耦營營鼠窟中莫復論誰某造物定
何意留此老不朽知我者天乎問訊堂下柳

述意

投門避地久周旋遼左龍飛信有天紀事會須成本末

崎嶇又歷十三年

自癸亥至乙亥

皎然進退自分明中止休疑業未成天道從來看後起

只將白髮待還京

老去

端午

平生無他長不受世束縛貧賤與富貴殊未改其樂造物欲窮之相戲亦頗虐守邊向南荒建國就朔漠三年氣難挫一舉若孤鶴蟻封水曲間馳騁等寥廓何曾顧鴻鵠況乃語燕雀惟老不可避俯首羈朽索老去終未甘無使懷抱惡

夏至

五月二十二日

手書日記罷趨衙便覺閒廊足歲華十日雨晴喧曙雀半庭綠暗長秋花故人頻問詩情好新局微聞國論譁拂拭書窗入長夏試評沉李與浮瓜

題胡琴初詩後

尸位三年我自評乞歸衆怒尚難平老夫罵世殊無謂
何怪時流出惡聲

負重堪嗟忍辱時勤攻吾過欲誰期杜門毀譽今奚較
奮筆詩人莫太遲

杜門

杜門旣無營魂夢殊安貼此身真我有不復念事業平
生南方强暴虎何所懼脫韉忽颺去袖手聊自愜或疑
老猶龍意乃周之蝶閒廊長幾許徐步閱塵劫惟餘還
京興觀闕映眉睫

寄李拔可六十生日

蜩螗震沸意難堅優世相如信獨賢風雨聊看過小劫
園林端易遣華年高吟頗動江湖色雅興彌增翰墨緣

法華經詩一三
莫向遼東歎微管書來猶及月初圓

坡詩云六十小劫風雨疾

中秋寄稚辛

天際昂頭孰可留逍遙篇外更遨遊
燕遼來往纔經宿坡潁追隨又一秋
人物西山須野老畫圖喬木待高樓
長廊徐步閒吟地定有乾坤眼底收

重九

登高還有壯心無詩酒闌珊興亦孤
付與閒人話心史却收餘論作潛夫

天傾西北漫倉皇地缺東南孰主張
俯視中原三萬里不妨抱膝過重陽

閉戶

退休進取事何窮吾道當如日再中閉戶著書時未晚

造車合轍意難同雲陰晝短長催暮寒色林疏更反風
積葉滿階誰共飲空將情況話遼東

長庚 十月初一夜

杞憂無盡思無邊都在人間曉夢前偶起推門看夜碧
長庚流皎正橫天

月丁

千金不換今宵月歷劫難銷往日心不道人生不如夢
人生是夢苦難尋

治水

七六得乞休平生事已畢人間猶可樂付與閒歲月
淹萬餘里國勢頗鬱勃功成何必我長策宜早決預期
二十年治水未可忽北境湖波平南疆河流達次之比

湘贛上之比蘇浙他時水鄉人樂土好生活豈知今朔
漠一變爲於越所嗟悠悠者或作而或輟肉食不足謀
繼起孰人傑自餘小得失姑置勿強聒天心果助我吾
志行當徹

乙亥除夕

父兄持我來京日屈指騰騰七十年丙寅七歲入都果見興亡真
脫命偶全名節豈違天餘生已置浮雲外空手曾趨白
刃前剩與藥城期對榻看山聽雨儘華顛

周立之六十生日以下丙子

入山勝具誰能伴離坐狂言衆盡驚輕世固應先却老
放懷未信果忘情平生相許空慙色晚節何堪更盜名
便欲南歸作園叟與君試約賦還京

乘化

神完自無營不復計修短可行亦可止乘化遂忘反形骸猶足用樂此緣未滿人間事萬千漸倦欲閉眼存亡意難遣情感誰能斷

與陳仁先傳治鄉徐愈齋會飲

塞下燒羊老尚饒深杯樂聖亦能銜為君一說江湖味
免肺魚頭便不凡

諸老銷沈等可哀酒餘話舊苦低回新京殘客能相見
喚起同光百感來

語及沈文肅劉忠誠李文忠張文忠諸老

杜門謝客忽經年王道衰興豈偶然醵雀醵魚非我力
有人抱膝待回天

自詡知微且見幾聊將聚飲卜南歸江湖粗辦魚羹飯

何幸 君恩聽拂衣

閏三月十二日示坐客

余生於庚申閏三月慙已卯戊戌丙子凡三遇閏三月矣

餘年兄弟未全衰只似機雲入洛時一代名流多見許
千秋佳傳定能竒信天豈易閒方信知命非難老自知
不解尼山孜孜者假年學易欲何爲

一閒

坐聞車馬喧始覺身已退免爲世人役未改少年態一
閒氣自充渺爾千百輩無求信至樂造化猶我載庭除
日洒掃甚潔頗可愛意中有高樓何日果相對及時先
掛木逸興誰能敗我懷柳下惠不易三公介

神往

閑閑一老人衣食不須紀平生了萬事抱膝忽在此耳

聰目亦明無病聊自喜已忘胸中書并掃文字軌逍遙
輒終日諸念絕不起夢中惟舊京神往即我里城西得
荒園種樹今稍美淵明歸去來足以娛暮齒

名流詩話

蒼虬曰人有恒言觀其詩可以知其世毋寧謂觀其詩可以知其人耳其人之志氣性情襟抱遭遇皆于詩中見之人之一生由少而壯而老所經歷有不容已于言者言之斯已矣不貴多也若無所爲而強爲之累矣且人之精神意氣發洩于盛年旣已成就不必更添蛇足昌黎病起泛舟詩有無窮之慨味東坡海外詩另換一境地詩亦換一面目故佳若二公晚年更作南山秦州八觀等詩則不類矣後人不知此詣年七八十猶若與少年爭勝者殊可笑耳故晚年之詩著墨不多神理內斂皆其應得之象不可以爲疵也但觀其自立之地如何耳少年之詩貴有干將莫邪之利芳香通體之美迴

腸盪氣惘惘不甘之情中年之詩貴其精力彌滿波瀾壯濶驚心動魄一字千金晚年之詩貴其枯而實腴老而彌辣秋景方中天地正色朱子謂少陵中年夔州諸詩極精嚴晚年則橫逆不可當此深于詩者也海藏晚遇既異可言者多詩中大有事在故精悍之氣不遜于前也

東坡有云三分作七分讀特戲語耳然吾每聞海藏誦其所作或間誦古人之詩節奏抗烈倍覺警動開悟甚多始知平昔于古人之詩隨意瀏覽輕易忽畧過去埋沒古人之精神爲不少也大約文字之由聞根入者較由見根入者爲深凡人于所見之書多不記憶若聽人說一故事則終身不忘此其驗也昔桓伊誦陳思王爲

至良獨難一篇安石爲之流涕蓋此等詩如慷慨高歌
顛挫而出之自然聲情激烈感動心脾若徒目覽則減
色矣桐城家言因聲以求氣此至精之言也讀海藏集
者當知此意

少陵云爲人興癖耽佳句詩雖以氣格爲上佳句亦不
可少者也然必以真切爲貴作詩不外情景事三端言
情言景言事必不可移之于他人移之于他地移之于
他時滿題中之量而又不溢出一分恰到好處意味有
餘乃爲真切近世名家或琳琅滿目然按之當時情事
不必定合可以驚俗眼非愜心貴當者也詩意不足或
換一二新奇之字遂以爲佳失之遠矣集中佳句皆真
切不可移者此甚不易到之境可與知者言也海藏刊

近詩若干卷見示屬隨意書其所見于後因書此數則殊無當于高深也

靈貺曰讀海藏樓詩日久如飲沆瀣時有清景置人勾
高間觸處便與神會如祇覺樓臺勝人物欲馮山水遠
風塵西湖也斜街長日見花飛舊京也却認鍾山是故
鄉金陵也乙丙歲居遼左誦公俛視中原三萬里不妨
抱膝過重陽句爲之神王

韓公豪多於曠大蘇曠多于豪而公詩如其書純以氣
勝前無古人則豪曠固是本色

惜抱平歐公峴山亭記曰神韻縹緲如吸風飲露蟬蛻
塵垢者絕世之文也天津李園七律幽雋中淡而彌旨
磨墨一首精氣入而麤穢除覺涪翁猶有時不免楂枒

著力處

乙亥歲來塞上無登覽之樂朋酒之驩但誦詩自適記
得亂峯出沒爭初日殘雪高低帶數州是放翁詩偶檢
公集忽見此聯驚歎不已

少陵近九章太白近九歌公年年重九詩練蕭寥懨懨
之氣以平淡語紆折出之而自然深雋宜一世推鄭
重九也

不知日之入蒼然暮色自遠而至至無所見而猶不欲
歸柳州文也公詩一丘一水繞蕭瑟儘戀斜陽晚未回
尤精警又殘年付夕陽五字蒼茫無盡游日本詩仰天
獨憶兒時事滿眼波濤更不回直使人回關懷愴焉
畫家空濶處寓意最難時欲寫公星浦詩作海天一碧

無際光景又嘗承謠誦晝夜起庵圖索諸粉本不觀但
哦公夜色不可畫畫之以殘月句而筆蹇拙終不能摹
繪清景也

一閒神性二首純乎陶矣一閒氣自充五字足抵退之
答李翊書此學養到可以自信語紀文達謂東坡纔出
杭州詩便深警識得此意又如手書日記罷趨衙便覺
長廊足歲華神似蘇之短籬尋丈間寄我無窮境也

曩曾舉意中流水遠愁外舊山青句質諸公曰此情與
景俱會也又嘗述公養題貴活一語教諸生以爲禪家
上乘

其不能誦公悲壯之作讀之心如中刃如題從母劉氏
小相云一憶姨相喚真如母在堂鮮民之生胡忍卒讀

余往過海巖樓詩云藪菊高於閭字孫意中常有好詩
存云云蓋公胸次落落不著纖埃惟時與朗月清風會
合楞嚴所謂無世間心同世行事者邪



海藏樓詩前未刻稿

海藏樓詩行世最早曾由埽葉山房印行歲甲寅刊於武昌凡八卷嗣後續刻乙卯至辛酉壬戌至甲子之詩為第九至第十兩卷至丙子乃刻乙丑以後詩為第十一十二三卷所謂海藏樓近刻者也世傳皆八卷本九卷十卷本而十三卷本最少見近日有影印本流傳矣海藏沒於戊寅年二月廿七日年七十九其丙子以後稿未刊偶見上海同聲第二卷十一號曾載之爰錄一過并記其段刻於此

海藏樓詩後稿 丙子至戊寅

閩縣 鄭孝胥

題林贊虞登岱圖

補鈔癸丑藍作

我嘗登岱未及頂雪斷天門空引領夢中日觀與黃河
鬱意填胸猶耿耿此山坐視易姓事七十二君待俄頃
哀歌未斷我輩來梁父云亭眼中冷公今與我皆遺老
老去更看人問鼎由來五嶽視三公愧作人臣淚如綆
泰山何知安足歎頑石荒松遍諸嶺不及新亭對泣人

送盡山河話風景

仁先壁間懸胡曾左李影象漫書三絕

強敵難撓我獨當不辭一挫意堂堂讓功猶易名兼讓

肝膽何人似益陽

羅羅山援鄂胡公以疲兵先戰羅乘之

江左文襄晚僅存英雄氣盡尚銜恩雪巖舊誼何曾報

咄咄書空只獨言

左侯在江督日自感未能援助胡雪巖

晚歲文忠極可哀久安折辱儘低摧小兒林旭崢嶸甚

慨嘆惟堪避此才

戊戌七月文忠語于頔見林旭真異才也

與立村談沈文肅事

沈公治民用武健殺人數千方自奇魯論不熟乃至此

哀矜勿喜豈忘之

濫刑則不仁近名則不義奈何以儒生而欲為酷吏

立秋

秋風吹一世使我亦殘年
饑溺為憂者澄清徒慨然
塞翁曾失馬長叔久違天
百世猶興起西山信獨賢

傅冶薌六十壽詩

緇衣好賢賢斯至致君惟懷道與義
南皮養士多楚材
歲晚貞忠貫文字每逢休日話文裏
辣性相看似老薑
不礙鄉談頻倚杖為君更作展重陽

包胥

青史同名有幾人直從荆楚接甌閩殘年誰與論興復
才信包胥不為身

東坡生日和仁先

殘歲真堪惜年年就老坡古人吾不見坐客苦無多舉
酒向千載當筵還放歌存亡與窮達著意試吟哦

誦豈
與窮

達俱存
亡一首

蘇集猶能誦當年手自丹平生再丙子回首雜悲歡世
已波難挽心如井不涸杯行春又入聊與抗餘寒

榮叔璋求題朱拓磚塔銘

書體且百變下筆豈一致周秦逮漢晉歷代殊風氣後

人謬主張輒與立同異某書出某派惴惴若夢寐後叟
矜其書自說本篆隸最輕館閣體姿媚尤所忌六舟強
使跋難抑不平意吾觀作書者塗抹等游戲姑從性所
近安用奮私智何書逞狂躁亦未契高味此銘不自高
媚麗果能事

滿州報社求題官子圖

乘除元有數倚伏豈無機應變固多術何人獨見微
鴻鵠忽將至游心已八方至人未神聖勝負不能忘

二月十一吳夫人忌日

以下丁丑

往事誰言在眼前老來處處付雲烟九原獨卧應相念

萬苦千辛又十年

斜陽

書窗迎日硯池香把卷沈吟晝已長一帶平林春又動
留人堅坐是斜陽

泛舟淨月潭

疏雨回春好放船浪花飛處水如烟江湖滿眼伊何地
魚鳥移情又一天千尺虹垂芳草外四山綠到夕陽邊
京塵縱不論新舊夢想昆明又十年

蔡法平求題其曾祖韶九大令慕陶圖卷

子房念家世出身報韓讐豈知郗嘉賓父子還相尤蔡

侯懷高曾巨卷列前修歸遼乃先志忠孝誰與侔嗟嗟
科名子叛主為世羞我歌以刺時寶此真貽謀

新京

萬綠蔽虧軟紅靜流水遊龍時一聽市聲隱約六街清
出入園林得諸勝新京形勢但平遠蕩蕩高原承斗柄
土厚水深居不疾民所趨往以其政潢池跳梁風漸革
設教猶須待賢聖老夫不出夜觀天或有異人起相應

石遺卒於福州

狂且之狂能幾時歷詆名教始自欺闔然媚世靡不為
使我不忍與言詩石遺已矣何所遺平生好我私以悲

少喜老睽將語誰聽水而在其知之

老如待決囚死期固必至勇哉子曾子得正斯可斃石
遺獨大言閻羅方我畏入川且登華八十又加二諸郎
雖早逝晚子還幾輩忽然作長別蓋世信豪氣平生喜
說詩揚抑窮一世所言或甚雋所作苦不逮乃知詩有
骨惟俗為難避牧齋才非弱無解骨之穢

乘化

歲月堪把玩逝者知難追乘化如許速豈意猶謂遲譬
子囊中錢採取恣揮之漸揮囊漸竭懊恨空爾為
營營彼有營寸陰不自惜投閒才幾時暇日反戚戚人

生抱俗腸好喧而惡寂短衣均一逝未死誰能息老夫
去非早餘興猶有擇葢京幼所戀巷陌甘混跡吾樓何
時就去去行捨宅

弢庵有佳作說詩乃未妙頗求對偶工場屋習難埽抱
冰氣稍橫久官才轉耗憤憂入九原吐語或深造二翁
當作者世士豈易到石遺與師鄭媚俗徒取鬧

步行出短巷遂不識返宅散原遊以天浩浩無所擇世
亂名愈高盜賊亦辟易廬山嗟何地怪子能久客終然
不磷緇老死歸闕北弢庵薨少早弔唁頗相逼子獨見
賊敗文字徒復惜

哀哲維

倉皇被害誰奔救取禍吾哀彌正平陷賊故難存性命
亡身或更助詩名潛吟豈坐遼東累既餞空懷卯酒傾
太息石遺方猝逝不教月旦出新評

將詣北京懷釣魚臺

松邱高拱靜猶風如楫螺洲九十翁遼左再興堪俯視
中原一戰更誰雄魚臺鶴地棲魂地赤縣黃圖夕照中
留得孑遺能夜起端教扶杖謁離宮

懷陳伯嚴

一世詩名散原老相哀終古更無緣京塵苦憶公車夢

新學空傳子弟賢別派西江應再起死灰

豈重然

胡沙白髮歸來者會有廬峰訪舊年

沈硯齋索題郭侗伯詩冊

辟地津沽數來往每得吾詩能激賞晚將文采入承明
今望清才更無兩晚子詩人頗自憐空吟元白比殘年
孤兒他日收遺稿獨感平生沈下賢

題日本甲斐虎山畫水

有聲出筆端奔瀉入尺素尋之更無門入我意中故

吳燕紹求題湖州絕域乞援記

鉄爐千鈞不可舉一蹴額崩倒庭廡如有射墻沒半塲

南八男兒誰與伍為神為吏總相隨
屬鬼殺賊心未灰
突圍不遂蠟書在逸事空傷廣雅題

寄雅辛
丁丑除夕

與其拙用長何苦巧用短安坐且徐行
政爾託於嬾平生惟操勞俛仰忽衰晚
乘剛得貞疾佩章聊自緩明年樓當成
孰能制吾眼棠櫻數百樹可老亦可隱
辛翁與夷叟舉爵必無算憂樂行兩忘
相對充粥飯

戊寅正月試筆

我緣在東北偶為六年留六年一彈指
莊嚴成皇州忽然思舊京去意不可收
老懷豈奮飛抱膝聊自休東坡

既南歸何不依子由吾計殊不爾猶堪營高樓種漆待
成器古有樊敬侯

直隸玉田縣人李長有年百有八歲自云道光十
一年九月生來長春七十年家屬十三人僅餘一
孫女壯年鬻技晚年種園賣葫蘆為業既而不能
自活依義女李氏以食戊寅正月廿六日以車迎
來問訊良久步履猶健目光炯然音吐宏亮齒缺
有新生者惟耳稍聾擬書摩基上瑞以貽之

辛苦人間過百年長生久視轉堪憐看君來去無牽掛
如此生涯即地仙

錄貞曜先生詩題後

復古孤莫立佞今羣所廢初非榮世物而亦為名勞風
雅業墜地士心滋淫惱先生不偶生結束歸堅牢咄嗟
浮游子沒齒徒滔滔

高意屬秋迴惠心屏春華手揮海上琴衣綴巖間霞詩
濤湧退之束手徒咨嗟羌以意表論邈茲神理遐不為
一世可坐使千秋詳

五年南國遊一卷東野詩寄余獨往意重此絕世辭連
城必良玉三染必素絲勿驚絢爛文終與太樸期夷厚
含陶思超異同謝規誰言中唐聲此是小雅遺太息貞

懿士老死山巖巖

端人思無邪篤行言自文運思雖匪涯立義各有云下
士逐紛華百年心如熏性情蕩不支榮枯隨世氛行跣
而言夷此語非所聞余表先生節以振頑愚羣

畢生獨吟詩得此物外身中有感懷篇惻愴難具陳玉
堂悲玄鳥故國望星辰素月忽經天鵲鴉不可因憂時
匪吾事遠念何酸辛位卑思為罪言遜遇益屯春暉一
終曲忠孝兩斷斷咄哉眉山叟銅斗豈足論

錄韋蘇州詩題後

違華即沖漠散性難自整豈云與俗殊意獨得沈省平

生一深念異代愛雋永三歎古之賢曾同惜徂景

錄柳州詩畢題卷後

河東文章伯童冠拔時選翻飛觸世網壯歲坐遷轉盛
名自取病衆詬實不淺懲疚辭徒悲晚景遇益蹇麗思
鬱欲流驚才踣未展橫經眇心貫讀騷儼躬踐蓄悲語
離奇取幽氣奧衍發為澹蕩作嘔吸出境典五言暨七
言老手廢雕篆每放寂寞遊偶託釋老辯鮑謝方抗行
李杜足非覲以茲竄妙篇千古解宜鮮當代競宗韓北
辰故易顯那知東方曙啟明上雲嶽晴窗與往復塵慮
得驅遣心折弔屈文語息特修寥偉人不世出我輩類

狂狷懷哉文先生吾硯蝕秋蘚

YORK UNIVERSITY

MAY 13 2001

EAST ASIAN STUDIES

海藏樓詩：

十三卷本并附
前未刻詩及遺墨

撰者：鄭孝胥

發行者：鄭文

發行所：天風出版社

香港九龍上海街五百六十七號二樓
電話：三・〇四一八三一

經售處：港九各大書局

線裝本上下二冊

港幣：四十元

卷四十四

狂獨懷哉先生集 續編本十二冊

野書集：新八卷大舊編

野語：三〇四一八三

香齋八韻十韻五百六十卷二冊

楚詩：天風出韻

楚詩：天風出韻

楚詩：天風出韻

楚詩：天風出韻

十三卷本共四冊

YORK UNIVERSITY

EAST ASIAN STUDIES

